

सुजुनाय बिजाब

(गोजौसिन गेजेरारि नैथि बोसोरनि थाखाय)

(For Higher Secondary 2nd Year)



आसाम गोजौसिन गेजेरारि सोलोंथाइ गथुम

किताप समलय

पान बाजार, गुवाहाटी-1

SUJUNAI BIJAB : A text book of Bodo MIL for Class H.S. 2nd Year (New Syllabus prepared according to National Curriculum Framework (NCF) 2005, edited by the Editorial Board (Bodo), AHSEC and published by Kitap Samalaya, Ananda Ram Barua Road, Pan Bazar, Guwahati-1 on behalf of Assam Higher Secondary Education Council.

फोसावगिरि :

आसाम गोजौसिन गेजेरारि सोल्लोथाइ गथुमनि जानानै

किताप समलय

आनन्द राम बरुवा रोड, पानबाजार, गुवाहाटी-1

दिहुनगिबि :

एप्रिल, : 2011 इं

जुलाई, : 2014 इं

मे : 2016 इं

मे : 2018 इं

मे : 2019 इं

अक्टूबर : 2020 इं

आगष्ट, : 2021 इं

साफायफिननाय : जुन, 2022 इं

© A.H.S.E.C.

बेसेन : 90.00 रां

साफायसालि :

आङ्गिक प्रेस

आमबारी, गुवाहाटी-1

गासै मोनथाइ बेखननाय

- * दिहुनगिरिनि गनायथिनि अनगायै बे दिहुनथाइनि जायखिजाया बाहागोनि साफायनाय हाबा एबा इलेक्ट्रोनिक बिजों, जुन्थियारि बिजों, जेरेक्स, रेकार्डि एबा गुबुन माबा राहाजों फिन दिहुननाय खान्थिनि महरजों बेखौ बुथमनाय एबा अरसिन होनाया आयेन बेरेखा।
- * बे बिजाबनि फाननायखौ रादाय खानायनि गेजरजों बानायनाय जादों दि फोसावगिरिनि सिगांनो गनायथिनि अनगाा बे जिबाजनि मोखां बिलाइ 'बाइण्डि' नि अनगायै गुबुन माबा राहायै फालांगि खालामनाय हावलाद हरनाय, फिन फानफिननाय एबा भारा होनो हानाय नड।
- * बे बिजाबनि गनायथाव बेसेना बे बिलाइआवनो साफायनो नांगोन। राबारनि प्टाम्प, प्टिकार लागायनाय एबा गुबुन माबा राहायै आखिनाय जायखिजाया फोसाबनाय बेसेनआ गोरोन्थि जागोन आरो गनायजानाय नड।

फरा बिजाब सुजुग्रा आफाद

मुस्री मधुराम बर'

बारग' प्रफेसार,
गुवाहाटी मुलुग सोल्लोसालि,

मुस्री बिरूपाक्ष गिरि बसुमातारी

बिबुंगिरि, बर' बिफान
कटन कलेज, गुवाहाटी

मुस्री उमेश बर'

बिबुंगिरि, बर' बिफान
ग रैश्वर कलेज, ग रैश्वर

भारतारि संबिजिर

रायफोरथि

जों भारतारि फोरजा सुबुंआ भारतखौ गंसे जारखुंथाइ समाजबादि दोहोरोम खनालायै सुबुंखान्थियारि फोरजा राइजो माहरै दानो थाखाय, लोगोसे बेनि गासैबो नोगोरारिनि थाखाय, समाजारि, रांखान्थियारि आरो राजखान्थियारि नियाय, सानथाइ, फोरमायथाइ, फोथायथि, दोहोरोम आरो सिबिनायनि उदांसि, गायसंनाय आरो खाबुनि समानथाइ मोननो थाखाय आरो बिसोर गासैनिबो गेजेराव सुबुंनि मान आरो हारियारि खौसेथि आरो गोरुबथि थि खालामारि बिदा-फं बाय साननायखौ बांहोनो गोथौ फोथायनायजों रादाय लानानै जोंनि बे संबिजिर आफादआव दिनै 1949 मायथाइनि नवेम्बर दाननि नैजिद' सानाव बे संबिजिरखौ नाजावबाय, आयेन बानायबाय आरो गावखौनो गथायना होबाय।

बुंफोरथि

गियान-बिगियाननि गासै बिथिंआवनो जा सोमोनोथाव दावगादों, बे जाउनाव सोलेंथाइ खान्थि आरो फराफारिखौ थाब थाब सोलायाब्ला जोंनि फरायसानि सोलेंथाइयारि जौगानायनि बेलायाव बेखाबुनि मोगामोगि जानांनाया जाथावसिन जाबोदों। बे नोजोरजों बिजिरनानै भारतनि गुबुन गुबुन खनायाव जानाय सोलेंथाइयारि सोलायनायजों सोमोन्दो लाखिनानै आसामआवबो फराफारिनि गोनां सोलाय-सोल' खालामनायनि नाजानायखौ आखाइयाव लानाय जादों।

'सुजुनाय बिजाब'आबो बिब्दि नाजानायनि मोनसे बाहागो। गुबुन गुबुन आयदाजों लोगोसे 'सुजुनाय बिजाब'नि फराफारिखौबो गोदान नोजोर आरो गोदान सानथौजों साजायनाय जादों। बे फराफारिखौ आबुथियै फरायसाफोरा फरायसंनो हानाय बादियै बिजाबखौ बानायनाय जादों।

बे फरा बिजाबखौ जथायना होनायनि थाखाय सुजु गिरिफोरिनििसिम आंनि गोबां साबायखर थाबाय। साफायना दिहुननायनि थाखाय किताप समलयनि मावथिफोरनििसिम गोजोननाय थाबाय। बे हाबाजों लोब्बा गोनां गासैनोबो गाहाम हामब्लायथि बाउबाय। फराबिजाबखौ इयुनआव साबसिन-हामसिन खालामनो गोरोंफोरनि सुबुरुन हास्थायबाय।

जों मिजिं खालामो दि बे बिजाबआ बे आयदानि सोलेंथाइनि थांखिफोरखौ जाफुंसारहोनो हागोन।

गोजोनथों,

बामुनीमैदाम
गुवाहाटी-1

नेहाथारि
आसाम गोजौसिन गेजेरारि सोलेंथाइ गथुम

**SYLLABUS FOR HIGHER SECONDARY
SECOND YEAR COURSE**

BODO (MIL)

One paper Time : Three hours Marks : 100

Unitwise Distribution of Marks and periods:

Unit	Topics	Marks	Periods
Unit-I	Prose	20	50
Unit-II	Poetry	25	40
Unit-III	(a) Adolescence Education (b) Value Education	10	20
Unit-IV	Grammar	20	25
Unit-V	Essay writing	15	10
Total		100	140

फरा बिजाब : सुजुनाय बिजाब (नैथि बोसोर)

(आसाम गोजौसिन गेजेरारि सोल्लोथाइ ग 'थुम)

Unitwise Distribution of course contents

Unit-I (खोन्दो-1) : Prose (रायथाइ) : (Marks -30)

1. एण्डेल मुगानि बर' थुनलाइ : बिहुराम बर'
2. आलारि दामब्रा : खुगा सल'
3. गोनोखोआरि गोसो माबोरै दानो हायो : ड° दीनेश ग 'स्वामी
रा.सो. बिरूपाक्ष गिरि बसुमतारी
4. बुथुवा थुंग्रि : नीलकमल ब्रह्म
5. बर' राव थुनलाइयाव प्रम 'द चन्द्र ब्रह्मनि बिहोमा : मंगलसिं हाज 'वारी
6. जारिमिन आरो बर' माहारि : कामेश्वर ब्रह्म
7. कासारनि हरिटिकर : म 'हिनी म 'हन ब्रह्म
8. खेराइ मोसानायाव फावथिना नायबिजिरनाय : धिरेश्वर बर' नार्जी

Unit-II (खोन्दो-2) : Poetry (खन्थाइ) : (Marks -25)

- | | |
|--------------------------|------------------------|
| 1. छरखौ जं नायन बान | : मदाराम ब्रह्म |
| 2. संसारनि अन्नाइ | : प्रम'द चन्द्र ब्रह्म |
| 3. बेसे गोजोन बेसे गोजों | : नीलेश्वर ब्रह्म |
| 4. सम बेसम | : अरबिन्द उजीर |
| 5. मोनाबिलि | : समर ब्रह्म चौधुरी |
| 6. गोथां गाब गाथोंसै | : अनजु |
| 7. दावदो दे दाव बर' हारि | : नन्देश्वर बर' |
| 8. मौदै | : धरणीधर औवारि |

Unit-III (खोन्दो-3) : (a) Adolescence Edu.(b) Value Edu.: (Marks-10)

- | | |
|-------------------------------|--------------|
| 1. बेसेन मोन्दांथिनि सोलोंथाइ | : ड° दुलुमणि |
| ग'स्वामी | |

रा.सो. बिरूपाक्ष गिरि

बसुमतारी

- | | |
|--|--------------------|
| 2. लाइमोन बैसो आरो बेनि गोनां सोलोंथाइ | : ड° स्वर्णलता दास |
| | रा.सो. : उमेश बर' |

Unit-IV (खोन्दो-4) : Grammar (रावखान्थि) : (Marks -20)

बेखेवफा, सोदोब बेखेवफा, आरो मावरिजा बेखेवफा, दाजाबदा, थारजा, दाजाबदा, बां सानराय दाजाबदा, थि फोरमायग्रा दाजाबदा, बाश्रा खोन्दोब, बाश्रा फान्दाब, बाश्राफाव।

फरायनो गोनां बिजाब : 1. गोजौ रावखान्थि : मधुराम बर'

2. गोनां रावखान्थि - कमल कुमार ब्रह्म

Unit-V (खोन्दो-5) : Essay writing (रनसाय) : (Marks -15)

रनसायनि आयदा : क) आसाम आरो भारतारि हारियारि जिउनि सोमोन्दै

ख) थुनलाइ आरो हारिमुनि सोमोन्दै

ग) बिगियान आरो जुन्थियारि बिद्यानि सोमोन्दै

घ) सुबुं अनजिमा आरो आरो भारत हादर

ङ) समाज आरो रांखान्थियारि हालसालनि सोमोन्दै

च) सोलोंथाइ आरो गेलेनायनि सोमोन्दै

छ) दावबायनायनि सोमोन्दै

फरायनो गोनां बिजाब : 1. राव आरो रनसाय - मधुराम बर'

2. रनसाय निश्चर - नीलेश्वर ब्रह्म

नायखां बिलाइ

खोन्दो- I (रायथाइ आयदा)

- | | | |
|--|--------------------------------|----|
| 1. एण्डेल मुगानि बर' थुनलाइ | बिहुराम बर' | 1 |
| 2. आलारि दामब्रा | खुगा सल' | 10 |
| 3. गोनोखोआरि गोसो माबोरै दानो हायो | ड° दीनेश ग'स्वामी | |
| | रा.सो. बिरूपाक्ष गिरि बसुमतारी | 24 |
| 4. बुथुवा थुंग्रि | नीलकमल ब्रह्म | 34 |
| 5. बर' राव थुनलाइयाव प्रम'द चन्द्र ब्रह्मनि बिहोमा | मंगलसिं हाज'वारी | 43 |
| 6. जारिमिन आरो बर' माहारि | कामेश्वर ब्रह्म | 56 |
| 7. कासारनि हरिटिकर | म'हिनी म'हन ब्रह्म | 61 |
| 8. खेराइ मोसानायाव फावथिना नायबिजिरनाय | धिरेश्वर बर' नार्जी | 66 |

खोन्दो-II (खन्थाइ आयदा)

- | | | |
|---------------------------|----------------------|-----|
| 1. छरखौ जं नायन बान | मदाराम ब्रह्म | 80 |
| 2. संसारनि अन्नाय | प्रम'द चन्द्र ब्रह्म | 84 |
| 3. बेसे गोजोन, बेसे गोजों | नीलेश्वर ब्रह्म | 88 |
| 4. सम बेसम | अरबिन्द उजीर | 91 |
| 5. मोनाबिलि | समर ब्रह्म चौधुरी | 94 |
| 6. गोथां गाब गाथोंसै | अनजु | 99 |
| 7. दावदो दे दाव बर' हारि | नन्देश्वर बर' | 103 |
| 8. मौदै | धरणीधर औवारि | 107 |

खोन्दो-III

- | | |
|-------------------------------|--------------------------------|
| 1. बेसेन मोन्दांथिनि सोलोंथाइ | ड° दुलुमणि ग'स्वामी |
| | रा.सो. बिरूपाक्ष गिरि बसुमतारी |

113

- | | |
|--|-----------------------|
| 2. लाइमोन बैसो आरो बेनि गोनां सोलोंथाइ | ड° स्वर्णलता दास |
| | रा.सो. : उमेश बर' 122 |

एण्डेल मुगानि बर' थुनलाइ

बिहुराम बर'

फराखौ सायख 'नायनि थांखि :

हारि मोनसेखौ सिनायनो थाखाय हारिनि जारिमिनखौ मिथिनो हानाया जोबोद गोनां । बेनि गेजेरजों हारि मोनसेनि सोमोन्दै गुबुन हारिनि मानसिफोरनोबो सिनायथि होनो हायो । जारिमिनआव गोदोनि राजा महाराजानि अनगाथैबो हारि मोनसेनि समाज, हारिमु थुनलाइ आरोबाव बायदिसिना आयदानि सोमोन्दै फोरमायनाय थायो । बेफोरनो हारि मोनसेनि बायदिसिना गोग्गाथावनो हानाय सम्पद । बेफोरनि सोमोन्दै दावगाफारि बादियै लिरनानै फोरमायलानाय आयदायानो जारिमिन । बर' थुनलाइनि सोमोन्दै फारि दावगाबादियै लिरनाय थुनलाइयाबो बर' हारिनि सम्पद । बेनि गेजेरजों बर' हारिनि थुनलाइजों लोगोसे बर' हारिनि समाज, हारिमु, आसार खान्थिफोरनि सोमोन्दैबो मिथिनो हायो । मानोना समाज थाफायाबा थुनलाइ जानो हाया । गुबुन गुबुन समफारिनि बर' थुनलाइबादि बर' समाजनि गुबुन गुबुन दावगाफारिनि सोमोन्दैबो मिथिनो हायो । रेभारेण्ड सिदनि एण्डेलनि बे सायख' जानाय फरायाव मिसनारि मुगानि बर' थनलाइ आरो बै समनि गुबैयै सुबुं हारिमु समफारिनि बर' समाजनि सोमोन्दै मिथिनो हायो । बेनि थाखायनो फराखौ सायख 'नाय जादों ।

लिरगिरिनि सिनायथि :

“एण्डेल मुगानि बर' थुनलाइ 'नि लिरगिरिया बिहुराम बर' । बिहुराम बर' नि जोनोमआ 1941 मायथाइनि 14 जानुवारि मागो दमासिखलि जादोंमोन । जोनोम जायगाया दरं जिलानि बेसिमारि गामियावमोनब्लाबो उनाव बिफा चन्द्रकान्त मोसाहारिया रौतानि बालिसिहा गामिसिम खारबोनानै नबथि लुफैदोंमोन आरो बे गामियावनो गोदानै गायसंनाय गुदि फरायसालिनिफ्राय बिहुराम बर'आ 1952

मायथाइयाव जोबथा आनजादखौ उथ्रिदोंमोन। बेनि उनाव दलगाव गोजौ फरायसालिनिफ्राय 1962 मायथाइयाव मेट्रिक आनजादखौ सेथि थाखोआव उथ्रिनो हादोंमोन। 1964 मायथाइयाव कटन कलेजनिफ्राय प्रि-इउनिभारसिटि (बिगियान) आनजाद आरो मंगलदै कलेजनिफ्राय प्राइवेट आनजाद होनानै बि.ए. आनजादखौ उथ्रिनो हादोंमोन। बेनि उनाव रौतायाव जयभद्र हागजेर मेम 'रियेल गोजौ फरायसालि गायसंनानै बेयावनो गाहाइ फोरोंगिरिनि मासियाव थानाय समावनो मंगलदै बि.टि. कलेजनिफ्राय बि.टि. दिग्रिखौ लादोंमोन। बिहुराम बर 'नि नख 'रनि हालसाला मोजा नडमोनब्लाबो बेनि गेजेरजोंनो आरो मालायनि मदद लानानैब्लाबो फरायनाय, गेलेनाय, हारिमु आयदायाव बाहागो लानाय, फरायसा आफादआव खामानि मावनाय, समाज सिबिनायफोराव जेब्लाबो सिगांमोन। फोरोंगिरि जाना थानाय समावनो बियो बर 'साहित्य सभानि खामानि मावबोनायनि उनाव नेहाथारि, गेजेराव लेडाइ आफादगिरि आरो बेनि उनाव थैजासिम नेहाथारिनि बिबान लानानै दंमोन। नैजिसे बोसोर गोलाउ नेहाथारिनि बिबानाव थानानै बियो कलेजआव बर 'एम.आइ.एल. थिसननाय, बर 'रावखौ लोगो हादाबारि राव गायसंनाय, बर 'फरायसालि आरो फराय बिजों गायसंनाय, फराय बिजाब दिहुननाय, दानि बर 'इंराजी-हिन्दी मोनथाम रावारि सोदोब बिहुं लिरनाय, गुवाहाटीयाव जयभद्र हागजेर भवन लुनाय बादि गोबां गिदिर गिदिर थाजिम खामानि मावनानै बर 'हारिखौ सिबिलांदों। बेबादि मेंनोरोडि "सोरबां" मावथि मानसियानो 1980 मायथाइनि 27 सेप्टेम्बरखालि सिनायहायि थिउरियानि सिलाइनि गुलिजों मुख्लं जानादोंमोन। बियो गुबुन हारिजोंबो मोजां गोरबनो हायोमोन। बर 'नि बाथौ धोरमखौ फोसाबना फोसावफिननो बियो नाजादोंमोन। बेनिनो नेरसोना बिनि थुनलाइ बिजाब हिसाबै नुजानाय आसारबा (1983) आरो गिबि बिथाय (1984), बिनि हारि मोजां मोननायनि नेरसोना जादों इंराजी रावै लिरनाय Introduction of Bodos आरो बर 'जों लोब्बा थानाय राभाफोरनि सायाव असमीया रावजों लिरनाय राभा जातिर इतिवृत्त, बेनि अनगायैबो गोबां बर', असमीया आरो इंराजी रावनि रायथाइ लिरलांदों। आसामनि रावफोरनि गेजेराव खौसेथि आरो गोरबथा लाबोनानै गांफा रावखान्थि आरो सोदोब बिहुं दिहुननोबो बियो नाजादोंमोन।

गुबै फरा:

बर 'थुनलाइनि जारिमिन बिजिरनो थाडेब्लानो सासे मानसिनि सासे महर मोखां आरो मुड मेगन सिगाडव गसंखाडे - बिथाडनो जादों रेभरेण्ड सिदनि

एण्डेल। हारसा रावखौ बोखांनो रबिनसन, ड० नाथान ब्राउन, ड० माइलस ब्रन्सन आरो रेभरेण्ड अ.टि. कत्तरमोना जायफोर हाबाखौ मावदोंमोन बर' रावखौ बोखांनो थाखाय रेभरेण्ड सिदनि एण्डेलआ हारसिडैनो बैफोरखौ मावबायनो नाजादोंमोन। एण्डेलआ आसामाव स 'फैनाय समाव गोजौआव मख 'नाय ख्रिष्टान मिसनारी साहाबफोरा दिहुननाय "अरुण 'दइ" मुनि मोखां बिलाइ गांसेनि बिजोडै हारसा रावा गोबाडै-नो दावगाखांबायमोन। अरुण 'दइनि थुलुंगा मोननानैनो आनन्दराम डेकियाल फुकनबादि हारसा थुनलाइगिरिनि जोनोम जादोंमोन। हारसा थुनलाइ सिबियारि मिसनारि साहाबफोरनि सोमोन्दै गोदान मुगानि हारसा थुनलाइ सिबियारिफोरा दासिम गोबां बाथ्रा सावरायबाय। नाथाय बर' थुनलाइ सिबियारि रेभरेण्ड सिदनि एण्डेलनि बाथ्राखौ जामबा जामथाफोराथ' मिथियानो, गोरों गोरफोरनि बांसिनाबो मिथिया।

बेफोर जेखि जादोआ बेयावहाय एण्डेलनि बर 'राव आरो थुनलाइनि सोमोन्दैल' सावरायनाय जागोन। इंलेण्डनि तटेनेज मुनि थावनियाव इं 1840 मायथाइयाव सिदनि एण्डेलआ उजिदोंमोन। बिथाड इं 1964 मायथाइयाव आसामनि तेजपुराव बर' ख्रिष्टानफोरनि धोरम गुरु हेजेलमियार (Hesselmyr)नि लेडाइ जानानै फैयो। बै मायथाइनिफ्राय इं 1907 मायथाइनि जुलाइ दानसिम बिथाड बर 'फोरनि गेजेराव थानानै गावनि धोरम फोसावनाय हाबानि लोगोसेनो बर' रावखौ फोथांफिननोबो नाजादोंमोन।

बर' थुनलाइनि बिफाया सोरमोन - जों दाबो मिथिया। मानाव गेदेर बिष्णु प्रसाद राभानि बादिब्ला ताम्रेश्वरी मन्दिरनिफ्राय आह 'म राजाफोरनि दिनाव सोरबा खावखोमाना लांनाय बर' रावजों लिरनाय बिथाइखौ मोजाडै-नाजायोब्ला दाबो मोनफिनगोन होननानै सानो। बेखौ मोनफिनोब्ला बर' थुनलाइनि जारिमिनखौ गोदानै लिरफिननो गोनां जागोन। दा जों एण्डेलआ आसामआव सफैजेननायनिफ्रायसो बर' थुनलाइया उजिजेनदों होनना सानना लानांगोन।

सिगाडव थुनलाइ गैजारोडै रावजों थुनलाइ दाजेननाया गोरलै नड। बर' थुनलाइ दाजेननायनि सिगां सिगां बिथाड सोलोंनादोंमोन बर' राव। बे रावखौ सोलोंनायनि लामायावबो इसेल' हेंथा गैयामोन। थेवबो बिथाड बर' रावखौ सोलोंनानै बर' रावनि थुनलाइ सोरजिजेनदोंमोन। बर 'फोरा बिथांखौ अननानै 'गामिनि ब्राइ' होनोमोन। मानोना बिथाड बर' गामि गेजेर गेजेर थाबायदिंबायना बर 'फोरनि हाबा-हुखा, दामनाय-देनाय, मोसानाय-मुसुरनाय, रंजानाय-बाजानाय

जेरावबो नुजाहैना बिसोरनि गोसो खंखराव उरफ्लेहाबना बर' हान्जामानि आसारफोरखौ बुरनबुसि सोल्लो नो नाजायोमोन आरो बर'फोरनि सुखु-दुखुनि बुल्लियाव गावबो गसंफायोमोन। सोरनिबा नख'राव मानसि थैब्लाबो गुरब्ला नुजाहैयोमोन सिदनि एण्डेलआ, मानो? दुखु दाहानि बिबान लाफाहैनो आरो बर'फोरनि गोथै बोगारनाय बाउगारनाय आसारफोरखौ बुथुमनो। बबेबा गामियाव सल' खिन्थानो गोरों बर'ब्राइ दंब्ला बे गामियावबो गुरब्ला नुजाहैयोमोन - गामिनि ब्राइ एण्डेलआ, मानो? सल' लिरथुमनो। बबेबा गामियाव समायना रमायना गोमो गोथां बाथ'गां गाबनि आगर गोनां बर' सि दंब्ला बेयावहायनो सहैयोमोन एण्डेलआ, मानो? बर' सिनि फट सेबखानो। बबेबा गामियाव मेथाइ खननो गोरों मानसिफोर दंब्ला हामफ्ला-सिफ्ला नुजाहैयोमोन - एण्डेलआ, मानो? बर'खुगा मेथाइफोरखौ लिरखानो। बेफोरखौ बुथुम-बुसि लानानै "The Asiatic Society of Bengal" आ दिहुननाय Research paper फोरार बर'फोरनि सोमोन्दै गोलाउ गोलाउ रायथाइ लिरना मुलुगनि जिंगासुला पण्डितफोरनि सिगाडव बर' नखांखौ बुरब्लाना होदोंमोन बिथां एण्डेलानो। बेनिफ्रायनो बर'फोरखौ लानानै पण्डितफोरनि गेजेराव दावराव दावसि जाबोदों। इं 1884 मायथाइयाव बिथांनि "An Outline Grammar of the Kachari (Baro) Language" मुंनि बर' रावखान्थिया साफायसालिनिफ्राय ओंखारो। बेयो रावखान्थिनि बिजाबब्लाबो बेयावनो रावना-रावनिनि सल'खौबो (The Kachari Theory of Thunder and lightning) बर' आरो इराजी मोनैबो रावजोंनो दिहुनफादेरो। दासिम जों मिथिनो मोननायाव बे मोनसे सल'आनो साफायनानै दिहुनजाजेननाय बर' सल' आरो बर' थुनलाइनि गोगगो बेगर। सिदनि एण्डेलनि बे हाबायाव उनाव आरो सासे साहेबा लोगो नांफादेरो - बिथाडनो जादों बै समनि दरं जिलानि डि.सि. जे.डि. एण्डार्सन। बिथाड बर' गामि थाबायदिंबायना बर' मेथाइ आरो सल'फोर खनथुमो। बिथांनि A Collection of Kachari Folk Tales and Rhymes मुंनि बिजाबा इं 1895 मायथाइयाव साफायखुलिनिफ्राय ओंखारो। दासिम जों मिथिनो मोननाय बर' थुनलाइनि बिफा रेभारेण्ड सिदनि एण्डेलआ इं 1907 मायथाइनि जुलाइ दानाव बे मुलुगनिफ्राय गोमोरलाडो आरो बर' थुनलाइनि एण्डेल मुगायाबो बेखिनियावनो जोबो। बिथांनि 'The Kacharis' मुंनि बिजाबखौ बै समनि आसाम सरकारा इं 1911 मायथाइयाव साफायना दिहुनो। बेनिखायनो इं 1864 आरो इं 1911 मायथाइयाव साफायनाय गेजेरनि मायथाइ 47 खौनो बर' थुनलाइनि एण्डेल मुगा होनजायो।

दा बाथ्राया जाबाय - एण्डेल आरो एण्डार्सना लिरना गालानाय सल' आरो मेथाइफोरखौ थुनलाइनि सिरियाव खोख्लै जायो ना जाया। बेखौ बिजिरनायनि सिगां थुनलाइया माखौ बुडे - बेखौबो मिथिग्रोनो नांगोन। जों बेखौ सिमान लाखानांगोनदि बर'गाराव (सोदोब) 'थुनलाइ' आ संस्कृत 'साहित्य' एबा इराजी "Literature" नि बिजिरथि बानसनो हायाखै। साहित्यनि बिजिरथिया जादों-गोरोबथाइ (मिलन)। बे गोरोबथाइया जादों गोसोनि साननायजों खान्थिगोनां रावनि गोरोबथाइ, आरो सुबुंनि दुखु-दाहा, गांनाय उखैनाय, मिनिनाय गाबनाय आरो अननाय बोराबनायजों खबाम गोनां रावनि गोरोबथा, बायदि बायदि। बे गोरोबथानि बिजोंजोंनो सुबुड माब्लाबा गोदें दैखोजों गारां बोहाब बोहाब गावनि गोसोनि बाथ्राखौ गुबुननो खिन्थायो-बेनो खुथि (संगीत) एबा मेथाइ, माब्लाबा खबाम गोनां गारांजों गावनि गोसोनि साननायखौ गुबुननो मिथिहोयो - बेनो खन्थाइ आरो बे खन्थाइनि फारि आरो आखला बांनो गोलाउ जायोब्ला बे खन्थाइया माब्लाबा मोनफा मोनफा गोदोनि एबा दानि जाथाइयाव गाब फुननानै गोदें गोथाव रावजों बेखौ गुबुननो खिन्थायो। बेनो सल' आरो बेनो फारि आरो आखला बांनो गोलाउ जायोब्लानो बेनो सल'मा, माब्लाबा दानि एबा गोदोनि जाथाइ मोनफाया बोरें जादोंमोन, बेयो जानाय समाव सोर, बहा मा बुंदोंमोन, बोरें बुंदोंमोन, बेफोरखौ आव-फाव खालामना गुबुननो नायहोनो, खोनाहोनो थाखाय बै जाथाइनि खौरांफोरखौ बुंफिनो-बेनो नायजाब, आरो बेफोरखौनो बुंनाय जादों जयै थुनलाइ। सुंद'थै बुंनो थाडोब्ला थुनलाइया जादों मोनफा मोनफा जाथाइनि आयना। बेफोर जाथाइयाव थायो मोनफा मोनफा आखल, आखलनि उनाव थायो सुबुं, बे हारिया मोनसे हारिमानि, आरो बे हारिमाया मोनसे देसनि। दानिया थुदो, फरायग्राफोर। एण्डेल मुगानि बर'लिरबिदांफोरा थुनलाइनि सिरियाव गोग्लैयो ना गोग्लैया बुरला-बुरसि नायहैदिनि।

'The Kacharis' मुंनि बिजाबा गांसे बर' रावखान्थि, जारिमिन आरो सुबुं थुनलाइ। रावखान्थि आरो जारिमिन खोन्दोआ इराजीयाव लिरनाय। बेनिखायनो बे खोन्दोआ बर'थुनलाइ जानो हाखाया। सुबुं थुनलाइ खोन्दोआ र'मान हांखोजों बर' रावाव लिरनाय। बेयावहाय एण्डेलआ गाव लिरनाय रावना-रावनिनि सल'खौ An Outline Grammar of the Kachari (Baro) Language निफ्राय देखांनो दोनदों। लोगोसेनो एण्डार्सननि A Collection of Kachari Folk Tales and Rhymes मुंनि बिजाबनिफ्रायबो 'दैमा-दैसानि खुरां', 'सासे अलसिया गथ'नि खुरां, 'बामुन

आरो साकरनि खुरां', 'आब्रानि खुरां', 'मोखा आरो सेसानि खुरां' आरो 'सासे फालांगि गथ 'नि खुरां' सल 'खौबो दैखांन गालांदों। बेफोरनि अनगायैबो बे बिजाबाव दोंनै खुगा मेथाइ दड'।

गोजौआव मख 'नाय एण्डार्सननि बिजाबाव बै मोनद 'नि अनगायैबो आरो मोनजिसे खुगा सल' दं, जैरै - 'गथ' मामरानि खुरां', 'माइ आरो दाउखा दन्दानि खुरां', 'ब्राइ सासेनि खुरां', 'खुसुं आरो मोखा', 'आब्रानि खुरां', 'खाना खुजानि खुरां', 'सासे आब्रा बोराइनि खुरां', 'बिदा -बिनानावनि खुरां', 'एम्बु बंग्लानि खुरां', 'सा स्नि आब्रानि खुरां', आरो 'ब्राइ ब्रुइनि खुरां'। बेफोरनि अनगायैबो बे बिजाबाव मोनजिस्नि खुगा मेथाइफोरबो दं। बे बिजाबनि रावा बर' - हांखोआ र'मान। बर'नि लोगोसे इंराजीनि दानस्लायनायबो होखानाय जादों।

खुगा मेथाइ : 'The Kacharis' मुंनि बिजाबाव थानाय खुगा मेथाइनि दोंसेजों जों बर'नि बैसागोखौ मिरौ जिरौ नुनो मोनहरो। सेंग्रा सासेया बैसागो रंजानो ओंखारदों। नाथाय हारसिं बोरै जालायखो ? लोगो बुरजा नडब्लाबो सासेथ' नांफागोन। बेनिखाय बियो मेथाइ दोंसे खननानै बैसागिखौनो लोगो लाहरदों।

“आगै बैसागि, फायदो नों

दाना बोथोर जानायखाय रंजागोन जों।”

सिख्ला बैसागिया थाब ओंखारबोनो हाया। मानोना हिनजाव सिख्लाफोरनो गाननाय जोमनायाव इसे सम नाडे। बेनिखाय बियो सेंग्राखौ बोराबा लाबानो दसे नेथ 'नो मेथाइजोंनो गाबहरदों-

“आदा पुवाराम, लोगो लोगो थांदों,

गामसा हादों, फालि हादों, मानो बोराबदों।”

बिसोर सानैजों उनाव लोगोसे रंजा बाजा ओंखारलानानै सासे आंगो फारियानियाव (मौजादार) बैसागोनि थाखाय दाउ अमा जुरिनो (बुथारनो) थोनहैदों:

“आदा रगुना, फारिया ओइ फारिया,

नामैसो, गुनैसो फारिया, आदा फारिया,

अमा मासेयाखौनो जुरिया, आदा जुरिया

दाउसा मासेयाखौनो जुरिया, आदा जुरिया।”

गुबुन दोंसेयाव बेरखांदों - गोसो थोना गारजानाय सासे सिख्लानि बोराबनाय

आरो मुगैनायनि हांमा। बिखौ गोसो थोनाय सेंग्राया गुबुन सासेखौसो हाबा खालामबाय। नाथाय हाबानि साननैसो उनावनो बिसि गोदाना थैना थांबाय। बियो दा मा खालामलायखो ? सानै हयै गाव गोदो गोसो थोजेननाय सिख्लानि खाथियावनो मोजां मोजां गानै जोमै थांफिनबाय। नाथाय सिख्लाया आरो बिखौ फोथायफिनबावनो एबा नाजावफिनबावनो हालिया। बेनिखाय मेथाइ दोंसे खननानैनो बिखौ हुहरस्राबाय :-

“दां दालिया, दां दालिया,

मोजां मोजां गानब्लाबो

नोंखौ नांलिया, नोंखो नांलिया।”

एण्डार्सनआ खनथुमना गालानाय मेथाइफोराव बै समनि बर' हानजामानि आसारफोरनि गुमुर मोन्दोंमोन।

सोदोबथि:

हामफ्ला-सिफ्ला - खारला-खारसि मेंनानै

गाराव - सोदोब

खुथि - मेथाइ

मिरौ-जिरो - रिउ रिउ नुस 'नै गोजान, लोर्बा

जुरि - बुथार, हाथार (दरं रावसा)

फारिया - मौजादार (दरं रावसा)

हानजामा - जथाइ हारि

सोंथि :

1. सिदनि एण्डेलआ सोर ? बियो बबेयाव माब्ला जोनोम मोनदोंमोन आरो आसामआव माब्ला सोरजों फैफादोंमोन। बियो बबेयाव माब्ला रंसारि जादोंमोन ?
2. सिदनि एण्डेलखौ बर'फोरा मानो 'गामिनि ब्राइ' होनना गाबत्रियोमोन ? बियो बबे बर' ओनसोलाव थानो लादोंमोन ? बियो बर' गामि गामि मानो आरो मा थांखियै थाबायदिडोमोन ?

3. सिदनि एण्डेलनि लिरनाय आरो बुथुमनाय बिजाबफोरा मा मा मुंख 'ना लिर । बेफोरखौ माब्ला लिरदोंमोन आरो माब्ला सेबखांनाय जादोंमोन ? बर' थुनलाइनि एण्डेल मुगाखौ माब्लानिफ्राय माब्लासिम हमनाय जायो ?
4. जे.दि. एण्डार्सनआ सोरमोन ? बियो बर 'नि जथायनाय बिजाबनि मुझ मा ? बेयाव मा दं आरो माब्ला सेबखांनाय जादोंमोन ?
5. लिरगिरि बिहुराम बर 'नि मुंख 'नाय मोननै थुनलाइनि बायदि बाहागोफोरनि बुंफोरलुफोरखौ लिर । बिनि बादियैब्ला थुनलाइया मा ?
6. The Kacharis मुंनि बिजाबखौ सिदनि एण्डेलआ माब्ला लिरदोंमोन आरो बेखौ माब्ला सेबखांनाय जादोंमोन ? बेनि सिडाव मा मा आयदा दं ?
7. एण्डेल आरो एण्डार्सननि बर 'नि सायाव लिरनायफोरा थुनलाइ नंगौना नछ सावराय ।
8. लिरसुंथाइ लिर:
डः नाथान ब्राउन, डः माइलस ब्रन्सन, अरुण 'दइ ।
9. बेखेवथि लिर:
(क) बे मोनसे सल 'आनो.....थुनलाइनि गोगो बेगर ।
(ख) सुंद 'थै बुंनो थाडेब्ला.....जाथाइनि आयना ।
(ग) एण्डार्सनआ खनथुमना.....गुमुर मोनदां मोनो ।

फरा गियान :

बर' थुनलाइनि जारिमिनखौ खायफाया लिरनाय आरो लिरि बे मोननै गुबै मुगायाव फारिथाइ रानग्रोयो । लिरनाय मुगाफारिखौ गोजाम आरो गोदान बे मोननै दालाइ बाहागोआव रानफिनो । खायफायाबा बेखौ खुगा थुनलाइ, मिसनारि, गोजाम आरो गोदान मुगायाव रानो । मिसनारि मुगाखौ सिदनि एण्डेल फैजेन्नाय एबा 1884 मायथाइयाव An Outline Grammar of The Kachari (Baro) Language मुंनि बिजाब दिहुननाय समनिफ्राय 1930 आरो 1940 मायथाइनि गेजेर बाहागोआव हमना लायो । बै समाव बर' लिरगिरिफोरनि बिबार, अलंबार, हाथर्खि हाला बादि बायदि मुंनि बिजाब एबा लाइसिफोरनि मुगायाबो समब्रा समब्रियै सोलिलांदांमोन । थेवबो ख्रिष्टान मिसनारिफोरनि बर' राव लिरनाय, बाहायनाय

राव, बिजों हांखो आरो आयदाफोरनि फारागथिखौ लानानै बेखौ जर 'खायै मिसनारि मुगा बुंनो हो । बे ख्रिष्टान मुगानि गेजेरावनो सिदनि एण्डेलनि सोरजिनाय 1884 मायथाइयाव लिरजेनना दिहुननाय An Outline Grammar of The Kachari or Mech Language (as spoken in the District of Darrang) बिजाबनिफ्राय बिनि थैनायनि उनाव बियो लिरनाय The Kacharis मुंनि बिजाब सेबखांनाय 1911 मायथाइसिम 27 बोसोर हमना लायो । नाथाय रायथाइनि लिरगिरि बिहुराम बर 'आ गावनो एण्डेल मुगाखौ दरं जिलानि तेजपुर खाथियाव फसंनाय Anglican Church नि बिबानगिरि हेजेलमियेरखौ सिदनि एण्डेलआ हेफाजाब होफैजेननाय 1864 मायथाइनिफ्राय बिनि The Kacharis मुंनि बिजाब सेबखांनाय 1911 मायथाइसिम 47 बोसोर हमना लादोंमोन । बे मुगानि सानै गाहाइ लिरगिरिनि गेजेराव जे.दि. एण्डार्सननि जथायनाय Kachari Folk Tales and Rhymes आ बुंनो थाडेब्ला खुगा थुनलाइ बादियै लिरगिरिनि सिनायथि, लिरनाय जायगा आरो लिरनाय मायथाइनि फोरमान गैयिखाय थुनलाइनि फारियाव फैया । बेबादिनो सिदनि एण्डेलनि An Outline Grammar of The Kachari or Mech Language आबो रावखान्थिखायनो थुनलाइनि सिरियाव गोलैया । सिदनि एण्डेलनि The Kacharis बिजाबा बर' हारि आरो बिसोरनि थुनलाइ हारिमुनि सोमोन्दै लिरनायखाय थुनलाइनि फारियाव फैयो ।

फोरोंगिरिनिसिम :

फोरोंगिरिया फरायसाफोरनो जारिमिना मा, थुनलाइनि जारिमिना माबादि आरो बेखौ मानो फरायनांगौ बिजिरना होनांगोन । जारिमिना राजा महाराजानि खौरां बुंनायबादि थुनलाइनि जारिमिना थुनलाइनि फारि दावगानि सोमोन्दै फोरमायना दिन्थियो । जारिमिन गैयाब्ला गावनि सिनायथिबो होनो हाया । बर 'फोरा सिगां थुनलाइ सोरजिथाइ गैयामोन नाथाय ख्रिष्टान मिसनारिफोरा सिगांग्रो बर 'थुनलाइ सोरजिनायाव आखाइ होदोंमोन । बेनि उनावसो बर 'फोरा गावनि रावजों थुनलाइ सोरजिनो लायो । बेफोर खोथाखौनो बर ' थुनलाइनि जारिमाव जथायनानै बर ' हारिनि सिनायथि होनो थुनलाइ सोरजिलांनांगौ । बेबादि खोथाजों फोरोंगिरिया फरायसाफोरनो थुलुंगा होनांगोन ।

आलारि दामब्रा

(खुगा सल')

फराखौ सायख 'नायनि थांखि :

थुनलाइखौ लिरनाय आरो लिरि मोननै बाहागोआव राननाय जायो। लिरि थुनलाइयानो खुगा थुनलाइ एबा सुबुं थुनलाइ। गोदो गोदायनिफ्रायनो सुबुं समाजआव खुगा खुगा सोलिबोनायखाय बेखौ खुगा थुनलाइ बुडे। बर' रावावबो बे मोननै बाहागोनि थुनलाइ दं। समाज नडाब्ला थुनलाइ जानो हाया। जायखि जाया थुनलाइयावनो समाजनि सावगारियाबो थाफायो। बर' खुगा थुनलाइयावबो गोदोनि बर' समाजनि साननाय हनाय, मावनाय दांनाय, जानाय लौनाय, सुबुं फोथायनाय, धोरोम, आसार-खान्थि आरो हारिमुनि सावगारि थायो। 'आलारि दामब्रा' सल 'बाथायावबो बर' समाजनि राइजो जानाय, फिसा फिसौ खानाय, आबाद मावनाय, गेलेनाय, रंजानाय, सि जोम दानाय, हाबा खुंनाय बायदि बायदि बर' हारिमुनि सावगारिबो दं। बेनि अनगायैबो बर' हारिनि माखासे सुबुं फोथायनायनि सावगारिबो नुनो मोनो। जेरै - दैज्लां मेसें बोथोर, दैज्लाडव अखा हानाय, मेसेडव रानस्राव जानाय, बेफोर सोमजिनायनि गुदि जाहोन आरो सुबुं फोथायथिनि सोमोन्दैबो गोबां सानब्लाउरि हाबनानै दं। बे सल 'बाथाखौ 'रावना रावनिनि सल' मुनि गुबुन दौंसे अखा बोथोर सोमजिनाय बर' सानथौ आरो सानबोलाउरिनि आखुथाइ गोना सल 'बाथाजौं रुजुनो हायो। गोदोनि गोजाम बर' समाजनि बेफोरबादि गुमुरखौ मिथिनो थाखायनो बे फराखौ सायख 'नाय जादौं।

खुगा थुनलाइनि सिनायथि :

खुगा थुनलाइनि लिरगिरि गैया। लिरनाय थुनलाइबो नडा। गोदो गोदायनिफ्रायनो सुबुं समाजनि खुगा खुगा सोलिबोनाय थुनलाइ। सल' एबा सल 'बाथाया खुगा थुनलाइ एबा सुबुं थुनलाइनि मोनसे रायथाइनि महरयै मोनसे गुबै बाहागो। बे गोजाम थाखोनि सल 'नि गेजेरजौं बोसोन गियाण थाफायो।

सल 'बाथायाव मोनसे सानबोलाउरि हाबनानै थायो। सुबुं समाजनि आसार-आखु, हिंसायनाय-अननाय दुखु-सुखु, सुबुं फोथायनाय बादि सानस्रिफोरखौ लानानैनो सल 'बाथाफोरनि गिबि बाहागो। सल 'फोरनि मोनसे आखुवा गाहाइ आखु। आखुफोरा मानसि, मोदाइ-दावदाइ, गुबुन जिब जिबि, बिफां लाइफांबो जानो हागौ। मानसि आरो मानसि नडिफोराबो सोरगो, फाथालावबो गिदिलाबायनो हायो। थासारि लानानै बिसोर हरखाब महर सोलायनोबो हायो। सल 'फोरा गोमोथाव आरो गोसो बोगथाबनो हायो। बेफोर गथ 'साफोरनि आखु दानाय आरो सानबोलाउरि फेहेरनायाव मदद होनो हायो। बेनि गेजेरजौं मोजां गात्रिनि गियाण लानानै इयुन जिउनि थाखाय बोसोन गियाण मोननो हायो। सल 'नि रावफोरा थौंजौं, गोरलै आरो गथ 'फोरनि रायज्जायनाय रावबादि बुजिथावना। सल 'जौं मेथाइ आरो फेसला बिदै थानयखाय गथ 'फोरखौ रंजाखां होयो। सल 'फोरा गुबैयै गथ 'फोरनि थाखायनो गोदोनि सानसुमा बोराइ-बुरैफोरा गथ 'फोरखौ रंजा होनो सानबोलाउरिजौं सोरजिदौंमोन।

गुबै फरा :

मोनसे समाव गंसे गामियाब हालिसे बोराई बुरै दंमोन। बोराइनि मुड "एहेम" आरो बुरैनि मुड "दे" मोन। बोरायलांबाय बुरैलांबाय, थेवबो बिसोरहा गथ' सासेबो गैयामोन। बेनिखायनो बोराइ बुरैया गोसोआव जोबोद दुखु।

बोराइ बुरैया सानफ्रोमबो गाबै गाबै इसोरनियाव बोर बियोमोन - हे आफा आनान गसाइ सोरजिगिरि, नौनो मुलुगनि गिरि। नौनो मुलुगनि मुनस मैया, मोसौ मोसा, एम्फौ-एनला, दंफां लाइफां जेबो जिरातखौ सोरजिदौं। खांदौं, जुलि खादौं, फिसा-फिसौ हरनानै राइजो जाहोदौं। एम्फौ-एनला दाउमा-दाउसाहाबो फिसा-फिसौ दड'ब्ला जौंखौ मानसि दानानैबो जौनो मानो फिसा फिसौ हरदिया ? बोर सारस्रि हरदो आफा, जौनो फिसा-फिसौ रहदो। बेबादिनो बुंग्रामोन।

बे बोराइनि गामियाव बार 'खुरै बार 'जोन सेंग्रा सिख्लाफोर दंमोन। गावसोरनि गामि खाथियाव आसु फाथो मावनो जायगा गैयिलाय सानसे खालि गामिनि सेंग्राफोरा फामु जानो हा नागिरनानै बोराइखौ लिंनायसैनो। होमब्लासो बोराइया सानसेखालि गामिनि सेंग्राफोरखौ लानानै जानजियाव माइंरं खिन्दासे बोननानै थाखो थाखो साथ थाखो हाजो बारनानै-

दै जिजिरि साम' खिंखिरि,

लाइहुलाइ जग्रब, नास्राय मासे मेंब्रब

बाथा रेवा सुबासे
औवागोनं जायगा दाबसे

मोननायसैनो। बोराइया बुंनायसै - दे फिसौफोर, थफ्लाफोरा खेवदोदे।
बेयावहायनो फामु जानांगौ जाबाय नौसोरो। बेयाव हाया हासार थाखागोन। माबार
जायै लोडै-बाथाबारि, खांख्लाबारि, थाराइबारि मैखोम हाग्राखौ अर लागायनानै
होनायसै -

रिड रिड रिड रिड
आय' हे बाथाराजा देरहाबाय।
बरमा राजा जेनबाय,
फैदो हे बावबुलि महाराजा,
हेफाजाब होफैदो।

बाथाबारि, एंखोरबारि रौ-रौ-रौ खामनो हमनायसै। हाग्रा सावनायनि हांगारा
उखुन्दैजो सोरगोआव बिरदावनानै अखांखौ दाखिफबजोबनानै अखा दोमैनायबादि
खोमसि दरसि खालामनायसै। “दे” बुरैया सिथलायाव हांगार गोलैनाय नुनानै
हासिबजो सिबझानाय जायगायाव सोरगोनिफ्राय गइ थाइसे फाथै गांसे जल्दब
गोग्लैफैनायसैनो।

बुरैया नुनानै - “आय’ मा बोजोनिफ्राय गइफाथै गोग्लैफैखोसै सिथोर-
बाथोरलाय। दा बोराइ फैब्ला सानैजो खावनानै जालायसिगोन हाय” होननानै
गइ फाथैखौ जलंगायाव बोननानै दोननायसैनो। उनाव बोराइया हाग्रा सावनानै
नआव फैब्ला बुरैया गाव जलंगायाव गइ फाथै दोननायखौ बोराइनो खिन्थानो
बावलांथारबाय। बिबादिनो सान जखायनै जाब्ला हरसेखालि जलंगायाव ख’ ख’
सोदोब खोनानायसै।

बोराइया बुरैखौ बुंनायसै - “जलंगायाव एनजर हाबदोंगोनलै बुरै। गाबोन
सानाव बुथारनांगौलै।” अखा नायब्ला एनजर बुथारनो बोराइया लावथि गंसे
लाबायनो आरो बुरैया जलंगाखौ खेवनो हमबायनो। होमब्लासो जलंगाखौ
बेखेवब्ला सासे हौवासा गथ’ गोरलै मोजां गावदांदां जारौरौ नुनायसै। गोरलैखौ
नुनानै बोराइ बुरै सानैबो गोमो हाबनायसै। उनाव रंजाखानायसै।

बोराइया बुंनायसै - हाबाब माथो आनान ग’साइया जो गाबै गाबै बोर
बिनायलाय जोंनो गथ’ सासे हरमारबाय। नाथाय बे गथ’खौ दा बोरै मानसिफोरनि
सिगाडव खिन्थाथिबावनो? मानसिफोरा गथ’खौ नुब्लाथ’खावनानैसो लाबोदों
सानगोन जोंखौ। बिदिब्ला जोडो बे गथ’खौ न’ सिडववनो दोनखोमानांसिगौ।

दिनैनिफ्राय दखना सिडव सि खादेरनानै लादो। गथ’खौ सानफा एफा फेदरबोदो।

सानसे गामिनि बार’खुरै बार’जोन सेंग्रा सिख्लाफोरखौ लेंहरनानै गइ फाथै
जाहोनानै बयखौबो दाबोराव मुजुसोम होनानै हरावनो बे दाबोराव सजोमदो
आरो अखानायै आं “बुरिहा गोरलै जोनोम जाबाय” होननानै खिन्थालाबायनोसै।

बोराइया हाथाइखालि गइ फाथै सुनि बायनायसै। हाथाइनि अखानायै गामिनि
सेंग्रा सिख्लाफोरखौ गइ जानो लिंगोनायसै। बुंनायसै - “नौसोर दा बेलासेयाव
जोंनियाव गइ जानो थानांगोन दे। आरो गइखौ जानानै बयबो दाबोराव मुजुसोमनानै
दोननांगोन। रावबो हायाव मुजुनो मोननाय नड। बुरैया बे दाबोरखौ खर’आव
रुजुननानै मुजुदैखौ गारहैनांगौ। होमब्ला गथ’हौवा जोनोम जानायबादि फोन
मोनगोन।

बेलासेयाव गामिनि बार’खुरै बार’जोन सेंग्रा सिख्लाफोरा बोराइ बुरैनि नआव
थानानै गइ फाथै जायै जायै बयबो दाबोरआव मुजुसोमनानै फैनायसै। बेनि हराव
बुरैया बे दाबोराव जसोमनानै सि गाननायखौ फिसिनायसै आरो अखानायै गोरलैखौ
बामनानै थाबाय थानायसै। बोराइया गामिनि बुरै सानैसोखौ खिन्थाहैप्लानायसै।
गामिनि बुरैफोराबो फैनानै गमामा गोरलैखौ नुफैबाय। उनाव बयबो खोनानायसै
दि बे बुरैहा दासो बुरै समाव गथ’ हौवा सासे जोनोम जाबाय। मानसिफोरा
खायसे बुंनायसै - “जागोन थ’ आरो, सानफ्रोमबो आनान ग’साइनियाव गाबै
गाबै बोर बिबायथाबाय नालाय”।

गथ’आ मद’द’ गब्ल’नायसै। सिख्लाफोरा थानानै बामहैयो, मोसा होहैयो।
सोडो नै गथ’! नौं मा मुं लानो? बैसागु लानो? गथ’आ खर’ सिथियो। “बाथा
बोराइ लानो? खर’ सिथियो। बेबादिनो मोनब्रै मोनबासो सोंब्ला खर’ सिथियो।
उनाव सासे सिख्लाया सोंनायसैनो” नौं आलारि दामब्रा मुं लानो नामा? होनब्लासो
गथ’आ खर’खौ थेद खालामनायसै। बेनिफ्रायनो गथ’नि मुंखौ आलारि दामब्रा
दोननायसै।

आलारि दामब्राया देरदेखोन देरनानै सेंग्रासा जाबाय। गामिनि लावखार
गथ’फोरजों गेलेग्रा जानायसै। लोगोफोरजों गिला गेलेग्रा जानायसै। आलारि
दामब्राया सानसेखालि बिफारखौ बुंनायसै - “आफा, आफा, मायनागिरि हाजोआव
गिला फिथाइ थाइसे गाहायाव गंग्लायना दं। बे फिथाइखौ नौं लायनायसाय।
नाथाय मिथिखा आफा, नौं खानो नागिरब्लानो गिला फिथाइया लासैनो गोजौआव
जौखोलांगोन। बेबादि जौखोलांनयाव नौं मोनहास’आब्ला बुंल’ “दहाय आलारि
दामब्रानि। नौं आंनि फिसा आलारि दामब्रानि गिला फिथाइब्ला आंजों खाजागोन

आरो बिनि नडब्ला नों जौखोलांबावगोन ।”

एहेम बोराइया फिसाज्ला आलारि दामब्रा थोननायलाय गिला फिथाइ लायनो मायनागिरि हाजोआव थांनायसै । थाडै थाडै थांनानै मायनागिरि हाजोआव सहैब्ला गिला फिथाइ थाइसे गाहायाव गंगलायनाय नुनायसै । बोराइया खानो नागिरब्ला गिला फिथाइया गोजौआव दावखोलांनयसै । बियो आज्लंबायदोंमोन । थेवबो मोनहास 'आखिसै । होमब्लासो बोराइया बुंनायसै- दहाय आलारि दामब्रानि । नों आंनि फिसा आलारि दामब्रानि गिला फिथाइब्ला आंजो खाजागोन आरो बिनि नडब्ला जौसिनबावगोन ।

बोराइया बेबादि होनब्ला गिला फिथाइया गाहायाव गंगलायफिननायसै । होमब्लासो बोराइया गिला फिथाइखौ थाब खानानै न 'फारसे थाबायबोनायसै । लामा लामा थाबायबोब्ला गिला बेगरा थब गोलैखोमानानै माब्लाबानो आलारि दामब्रानि गस्ला सिफियाबसो हाबफैजोबबायनो । बेखौ बोराइया मिथिथाराखिसै । नआव सफैनागै गिला फिथाइखौ फिसाज्लानो होनो नायगिरब्ला गिला बेगरा गरसेबो गैलिया । “हाबाब, मा जाखोलै होमब्ला आंनि गिला लाबोनाया ? माथो गरसेबो सफैयाखिसैलै । - बिदि होनब्ला, “नै लै आफा, नोंनि गिला लाबोनाया आंनि गसला सिफियावसो हाबफैजोबबाय ।

बोराइया सोमो नांबाय । आय 'बोरै जाखो बिलाय - होनना गोमोहाबबाय । आलारि दामब्राया गिला फिथाइखौ लानानै लावखार गथ 'फोरजों गेलेहैनायसै । गेलेनायब्ला लोगोफोरखौ गिला साहोनानै बुंनायसै - “नोंसोर हरै मोखां जानायसाय ।” लोगोफोरा दाबसेथिंजाय मोखां जानायाव आलारि दामब्राया गिला सानायखौ गावगासिनो गावनानै गिलाखौ सोखाव जोबनायसैनो । गथ 'फोरा नायफिननानै गिलाखौ गावजोबनाय नुब्ला बिसोर बयबो आलारि दामब्राखौ दुब दुब दाब दाब बुनायसै । होमब्लासो आलारि दामब्राया “र र-रथ' नोंसोर दाबसेथिं नायफिन होमब्ला” होननानै लावखार गथ 'फोरा दाबसेथिंयै नायहरब्ला गिला फिथाइफोरखौ मोजां खालाम फिननायसै । उनाव बिसोर औरै मोखां जाफिनब्ला गावसोरनि गिलाखौ नुफिननानै बयबो गोमोहाबनायसै । सानसेखालि बेबादिनो गिला गेलेबाय थानायाव गिला गावगासिनो एं- उर होनलानानै साथेनानै दोननाय गिला बेगरखौ सौखुबसे सौखुबनानै एं एं एं थांनानै आसागि बैसागि सिख्लाफोर सि दानायावसो खुन्दुं सौस 'नानै नआव श्रोब हाबहैनायसैनो । खुन्दुंसो बस 'लायबाय । बोरो गिला बेगरा बहाय थांखो होननानै न' सिडव हाबहैनागै गिला बेगरखौ

मोनब्ला दौबायाव खननानै लानायसैनो ।

आसागि बैसागिया खुरिया बोराइ खुरिया बुरैनि फिसाजोमोननो । बिब'-बिनानाव सानैबो दानो लुनो जाबोद आखाफाखामोन । बिब'आ सिथला गेजेबाव जनानै बिनानावनो खिन्थाहरग्रामोननो - नै दाउ मैना बिरलांबाय । होम्बानिया बिनानावआ थाबनो दाउ मैनानि आगर दैखांलायबाय । नै दाउराइ बिरलांबाय-होनबाथाय सियावबो थाब आगर सिखारलायबायनो ।

नै मै गाबदों होनबाथाय मैनि आगरा थाब सियाव जाखांलायबायनो ।

दानायाव लुनायाव जेरै आखा-फाखा, दामनाय मोसानाय, मेथाइ खननाय आरो हाबा हुखायावबो आसागि बैसागिया रावनिबो गेजेन नडमोन । बिसोरहा बावबुलि मुंनि बिदा सासे दंमोन । बे बावबुलियानो गावनि बिनानाव आसागि बैसागिखौ हाबा खालामनानै लानो माबोरैबा गोसो सानपलांगारदोंमोननो । नागरनाय नडमोनगोन बावबुलिया बिनानावफोरखौ हाबा खालामाब्ला । नाथाय इसोरासो बोखानायसै ।

आलारि दामब्रानि गिला बेगरा जेरै एं-एं होननानै हाफाव हाला सिंखावलांदों बेथिडै थाडै थाडै थांनानै आसागि बैसागिनि सि दानायाव थांनायसै । बिनिफ्राय गिला खारलांनयनि हांखो नुयैलाय दसे गसंनानै आसागि बैसागिनियाव सोंनायसै - नोंसोर औरैहाय गिला खारबोनाय नुदों नामा ? आसागि बैसागिया आलारि दामब्रानि मोखांखौ नुनानै गोसो थोखांनयसैनो ।

बिनि बिमा बिफाया जोंखौ नायफैब्ला हामगौ साननायसैनो । नाथाय लाजिगुसु सिख्लाफोरा बाश्राखौ बोरै रायथिलायखो ? उनाव बिफाया फैनांथों साननानै सानैबो बुंनायसैनो - मानोसै नोंनोलाय ? नुदोंबो नुआखैबो जों । थोनहर नोंनि नोमफाया; होमबासो गिलाखौ मोनलांगोन । आलारि दामब्राया खर' खुरै खुरै लुसुर लुसुर फैनांफिनबाय । नआव फैनानै बिफाखौ बुंनायसैनो - आफालै, आंनि गिलाखौ आसागि बैसागिया लाखिबाय । हराखिसै । आंखौसो बुनानै हरबाय । नों लायदो ।

बिफाया बाश्राखौ खोनानानै जोबोर दुखु मोनबाय । “बोराइ समाव इसोरनियाव बिथै बिथै गथ' सासे मोननायखौलाय हावरियानि फिसा होननानै मानो जायनो मोनो बियो बुयोसोलाय आंनि फिसाखौलाय” होननानै दुखु लानानै बोराइया गिला बेगरखौ लायनो थांबायनो । आसागि बैसागिनि नआव सहैब्ला आसागि बैसागिया हाखु दाखु जनो खामपलाइ होबायनो । “फा, गिलाखौ हरा हरा, नायल' जाल' आंनि फिसा सासेल'खौलाय मानो बुनानै हरनायसै नोंसोरलाय” । हा सोर

बुनानै हरखोसै नॉनि फिसाहौवाखौलाय ? थां नोमफाया खिनथाहर जौखौ नायफैथों होननानैसो बुंहरदोंमोन जों लाय । बेलाय माथो गिलाया ? - होननानै गिलाखौ दिहुननानै हरनायसै । बोराइया गिलाखौ मोनफिननायजों गावसोरखौ बिहामजो लांफैनो लेंहरनायजों हारसिडैनो हाथाइ लोमाजासे नफारसे आगान सुरफिननायसै । आलारि दामब्राया होमबासो गिलाखौ मोनफिननायसै ।

(बे बाश्राखौ रायथिनाय जायो दि गिला गेलेनाय आयुंखाय आलारि दामब्राखौनो गिलारि दामब्राबो होनोमोननो) ।

बोराइया होमबासो सानसेखालि गामिनि सासे सानैसो लानानै आसागि बैसागिया नौनायनो थांनायसैनो । नआव सहैब्ला बार 'हात खुलिनि सैमा हेंगालिया फौ फौ सोंहरनायसैनो । आसागि बैसागिया मानसिफोरखौ नुनानै हाखु दाखु खामफ्लाइ बना होनायसै । खारनलाय खारखोलाय थांखु लागायनानै होफैनायसै । बयबो ज' जनानै आसागि बैसागिनि बाश्रा रायज्जायब्ला बावबुलि राजाया बुंनायसैनो बे जानो हाया, आं थासानदियाव आंनि बिनानाव आसागि बैसागिखौ गिलारिया हाबा खालामनो हानाय नड ।

बाश्राखौ खोनानानै आसागि बैसागिया न' सिडव थांनानै फे-फे, फु-फु गाबखोमाबायनो ।

एहेम बोराइया मोखां सायर' जानानै नआव फैफिननायसै । बिनि साननै सानथाम थानानै बोराइया आरोबाव मानसि हादुंगोराफोरखौ लानानै बावबुलि राजानि नआव आसागि बैसागिखौ नायनो थांफिनबावनायसैनो । बे खेबाव थांनायसै दाउब' राजा, दाउखा राजा, सिखोना राजा, माहादेब राजा, स'ना राजा, रुफा राजा आरो सोरबा सोरबाफोर ।

बिसोर गासैबो सहैब्ला बार 'हात खुलियाव थानाय सैमा हेंगालिया फौ फौ सोंलायबाय । सैमा सोंनाय खोनानानै आसागि बैसागिया हाखु दाखु न'सिनिफ्राय बार 'ननानै आजलं गोदोना फोलाउनानै लामाथिं नायहरब्ला एहेम बोराइखो नुहरनायसै । नुहरनानै हाखु-दाखु खारनलाय खारखोलाय खामफ्लाइ दखला थाम थिम खालायनानै दोननायसै । उनाव बिसोरबो सहैनानै खामफ्लाइयाव जनायसै । बावबुलि राजायाबो जदेरफाहैनायसै । हादुं गोराफोरनि बाश्रायाव बावबुलि राजाया गंग्लायनानायसै आरो बिनानाव आसागि बैसागिखौ गिलारि दामब्राया गोरजिया थानायनि रादाय खानानायसै ।

रादाय खाना फैना एहेम बोराइया फिसाज्जा आलारि दामब्राखौ गोरजिया थानो थोनहरनायसै । आसागि बैसागिया होजोंहाय रंजा बाला बाला रंजानानै गिलारि दामब्रा जोहोलावखौ लामा नायबाय थाबाय ।

आलारि दामब्राया थप्ला फिसा बेनसाबनानै आफाखडव एथेबना लानानै गोरजिया थानो खुरिया बोराइ खुरिया बुरैनि नआव फैनायसै । सफैमारैनो आसागि बैसागिया आथें सुनो दै होफैनायसै आरो न' गंसेयाव दोनहैनानै " बैयावहायनो थानांगौ नोंहा " होननानै आलारि दामब्रा जोहोलावखौ बुंनायसै । आलारि दामब्राया आथें आखाइ सुनानै दसे गोमजोर गावखौ थानो होनाय न सिडव जना थानायसै । बेनिफ्राय दसे थानानै खामानि मावनो ओंखारनायसै ।

बेबादिनि मावै दाडै बोसोरसे थांब्ला आलारि दामब्रानो आसागि बैसागिखौ दिहुननानै हरनायसै । दिहुननाय समाव हाबा गिदिर जादोंमोन । बे जायगानि बयबो हौवा हिनजाव बोराइ-बेन्थो, सेंग्रा-सिख्ला, गथ' गथाय फैनानै जौ लोंदों, मायब्रा अफ्रि जादों । बेदरनि बेदर, ओंखामनि ओंखाम जादों लोंदों, गइ ददेरे, फाथै सिनारि, साम' खिंखिरि सुनै - बेसे जादों, बेसे रंजादों बिसोरसो मिथिसिगौ । बर' बोराइया बुडो - जौनि फुखि, बेदरनि आखाय, ओंखामनि आलि - मा जानो एम्बु खुगा । आरो मा मा बाव । आरो खाम सिफुं जथा आरो सेरजा । गोमोमथार । फारा दरसेया गोमफब जोबबाय । हाबा जालांबाय । बावबुलि राजाया मेगन साबाय थाबाय । बौरै बे आलारि दामब्राखौ सिथारनो हानो बेखौल' सानबाय थाबाय । सानसेखालि बावबुलिया गिलारि दामब्राखौ सिथारनो सानखोमानानै ना होनो लिंनायसैनो । ना होनायाव गाव गोलेर जानानै जेआव नांफैनो आरो बेनिफ्राय गिलारि दामब्राया ना होननानै हमब्ला बिखौ अरथारनो । ओजोंहाय मालाय बिनानाव आसागि बैसागिया मिथिखागौनालाय फिसाइनो खिन्थाहरनायसैनो - नों जे साथेनानै बोरियाव थाबाय था । दैआव दाहाब । ना फैब्लाबो नाखो दासु । दैआव हाबब्ला नोंखौ गोलेर जानानै अरगोन ।

होमब्लासो बावबुलिजों आलारि दामब्राजों ना होनो थांनायसैनो । आलारि दामब्राखौ जे साथेनानै दोननो थोननानै बावबुलिया गावहा ना होनानै लायनो थांनायसै । आलारिखौ बुंखालांदों - ना फैब्लानो हमदे । होमब्लासो नाफोर दुम दुम, दाम दाम फालो फालोनो फैनानै गिदिर गिदिरनो जेयाव नांफैबायनो ।

आलारिया ओजोंहाय ना हमब्लानो बोरियाव जनानै थाबाय । उनाव बावबुलिया गोलेर जानानै जेआव नांफैनायसै अब्लासो आलारिया जं लानानै नायहाबनायसै आरो गोलेरखौ ब्रे सुनायसै । होमबासो गोलेरा " आं बावबुलि राजासो, गोलेर

जानानै ना होबोदोंमोन । नों मानो आंखौ सुखो” होननानै बुंनायसै । आलारिया – “हे दोहोरोम, गुमैसोलाय होमब्ला” होननानै बोरियाव थिखांनायसै । उनाव बावबुलिया ग्रीब मानसि जाफिननायसै ।

आरोबाव सानसेखालि बावबुलिया आलारिखौ मै होनो लिंबावनायसै । होमबाबो आसागि बैसागिया फिसाइखौ बुंहरखानायसै – खबरदार, नोंखौ दिनै मोसा जानानै अरथारनो नाजागोन । नों जे साखांनानै बिफां सायाव गाखोनानै था । मै नांफैब्लाबो मैखो दासु जेब्ला मोसा नांफैगोन होमब्लानिया बिफां सानिफ्रायनो बिखौ जंजों सुहर ।

आलारि दामब्राया मिथिखानानै बिगुमैजों मै होनो जे बाननानै थांनायसै । हाग्रायाव सहैनानै आलारिखौ जे साथेनानै मै जमहोनायसै । बावबुलिया गावहा मै होनानै लायनो हाग्रायाव हाबलांनायसै । “खबरदार आगै नों मै फैब्लानो मोजाडै सुथार । होमबासो बावबुलिया दुम दुम, दाम दाम मै हुहरननायसैनो । मैआबो फालो फालो खारबोनानै जेआव नांफैबायनो । थेवबो आलारिया सुवा । बिफां सायाव गाखोनानै नायबायसो थाबाय ।

उनाव जेब्ला मोसाया फैयो अब्लानिया बिफां सानिफ्रायनो जंजों थांखि हरनायसैनो । जड थाक थिक खर’आव नांनानै मोसाया बाग्रायनायसै आरो बुंनायसैनो- “हाबाव । नों मानो आंखौ सुथारनो नागिरखो ? आं बावबुलि राजासो । मोसा जानानै मै होबोदोंमोन आं ।” होमबासो गिलारि दामब्राया – आय’ गुमैसोलाय होनना बुंनायसै । जंखौ बोख’ना होनायनि लोगो लोगो बियो मानसि जाफिननायसै । बेनि उनाव सानैबो नआव फैफिननायसै ।

खननैबो नाजानानै बावबुलिया गिलारिखौ सिथारनो हायाखिसै । दानिया दाय खालामनानै गिलारिखौ हुहरनो सानखांलायबायनो । बावबुलिया आलारिखौ बुंनायसै – “दिनै नोडे हाग्रा एवसि एवनानै साथदुलि बेसरखौ फोजोबथानांगौ” । होमबासो आलारिया एवसि एवनानै साथदुलि बेसरखौ हा दरसेयावनो फोजोबथारनायसैनो ।

बावबुलिया बे हा दरसेयावनो साथदुलि बेसरखौ खनखांफिननानै साथ दुलिखौबो गोदोनि बादि थिब थिब बुंहोफिननो थोननायसै । आलारिया होमबासो दाउथु दंनायमानिखौ लिंहरनानयसैनो । खनखांजोबब्ला साथदुलि जाजोबनो दुलिसेया एसे थाबावनायसैनो । मानोना दाउथु मासेया थपलायाव लानानै दड’ । दुलि बुंजोबैखाय आलारिया दाउथु माफ्रोमखौबो थथलायाव सेग्रोमजोबनायसै । सेग्रोमै सेग्रोमै दाउथु मासेनि थथलायाव ब्रायैनो बेसरखौ मोनदांमारनायसै ।

होमबासो बिनिफ्राय साथदुलि बेसरा गोदोनिबादि थिब थिब जाफिननायसै । बावबुलि राजायानो बेबादि खालामदोंमोन ।

आरोबाव सानसेखालि बावबुलि राजाया गिलारिखौ बुंनायसै – “गाबोन फुडव नों आंखौ दैखरनि दै खावनानै थुखैनांगोन” । होमबासो आसागि बैसागिया फिसाइनो खिनथाखाबायनो – “नों दिनै हराव बे दैखर खाथियावनो गुबुन दैखर खरसे खुर’नानै सायाव आबजाफोर होनानै श्राय श्राय हा सारनानै दोन । बेनिफ्राय बेनि सायावनो खामप्लाइ गंसे लासैनो बनानै दोनखा । जेब्ला नोंखौ दै खावनो थोनगोन, होमब्ला नों बिखौ बे खामप्लाइयाव जनो थोन । बे खामप्लाइयाव जब्लानो बियो गोलैलांगोन । अब्लानो बियो लेंग्रा लेंथा जागोन ।

आसागि बैसागिनि बाश्रा लानानै आलारिया हराव दैखर खाथियावनो गुबुन खरसे खुरखोमानानै सायाव आबजाफोर होथेनानै श्राय श्राय हा होनानै दोननायसै । आरो बेनि सायाव खामप्लाइ गंसे बनानै दोननायसै ।

अखानायै बावबुलिया गावखौ थुखैनो आलारिखौ लिंहरनायसैनो । सानैजों दैखराव सहैब्ला बावबुलिया आलारिखौ दै खावनो थोननायसै । गिलारियाबो बावबुलिखौ थुखैनो होननानै खामप्लाइयाव जनो थोननानै गाव दै खावप्लानाय बादि फाव लानायसै । बावबुलिया खामप्लाइयाव जनायनि लोगो लोगो दैखर सिडव गोलैलांबाय । बेबादिनो बैयावहायनो बिखौ आखाइ खंगा, आथें लेंग्रा खालामनानै दोननायसै ।

बेनिफ्राय आलारि दामब्राया आसागि बैसागिखौ लानानै खार’नलांनायसै । बिसोर खारब्ला बावबुलिया बारहुंखा, सार’न्थाइ जानानै उन उन होसोनायसै । बिसोरबो अखां सा सा बिरलांनायसै । बिबो दुम दुम, दाम दाम होसोगासिनो थानायसै । बेबादिनो खारै खारै खारैनो बैसागु अखाफोरनिफ्राय भादोर अखाफोरसिम खारनायसैनो । उनाव आसागि बैसागिहा बे समाव मोदोमाव दंसैमोननो । बेनिखायनो बारा बारा मेंनाय मोननानै ग्रीबनो बालाबारियाव बिरख्लायनानै जिरायनायसै ।

भादोर अखाफोरनिफ्राय सैथोनि अखाफोरसिम बेयावहायनो जिरायनायसैनो । बे समावनो आसागिया दाउदै दैसे आरो बैसागिया जखायसे दैने दाउदै दैना नै बालाबारियाव फबनानै दोननायसै । बेनिफ्राय दाउदैफोरखौ दाउ थि थि थिउखौ नायनो थोननायसैनो । देनां बिदैआ बेरफुब्ला सोरगोनिफ्राय आदार लायनो खिनथालांनायसै । गावसोरा आरो अखां सायाव बिरदावबायनायसै । उनाव आसागिनि बिदैआ बेरफुनानै हौवासा सासे जानायसै । आरो बैसागिनि बिदै

दैबाया बेरफुनानै साबा हौवासा आरो उनाव बेरफुनाया हिनजावसा सासे जानग्रसै ।

बिदैया बेरफुनानै फिसा ओंखारजोबनायलाय दानिया आदार नांसिगौ जाबाय । होनबासो दाउ थि थि थिउवा बिरदावनानै आसागि बैसागिनिफ्राय आदार लायनो थानायसै । आसागि बैसागिया बबेयाव हरनो साननानै उनाव थस 'लाइयाव जुनानै हरनायसैनो । दाउ थि थि थिउवा आदार लानानै बिरबोब्ला लामायाव फानफिउवालि दाउवा नुनानै थस 'लाइखौ खेबसिनानै हरगारनायसै । होनब्लानो आदारा गासैबो गोग्लैजोबनायसै । दाउ थि थि थिउवा बिलाइ गिजियाव जा इसे थाबथानानै थादोंमोन बेखौनो लाबोनानै बिसोरनो होफैनायसै । बिसोरनो बेखौनो बयबो सोलानानै थानायसै ।

(फानफिवालि दाउवा लाइ खेबसिनानै आदार सेनानै जाना गथ 'फोरखौ उखै होनायनि थाखाय आसागि बैसागिया बिखौ साव होनायसै - "नों जैरै जॉनि फिसाफोरखौ आदार उखैहोदों बिबादिनो नोंबो जेब्लाबो दै गांबाय थागोन, आदार उखैबाय थानानैनो थांबाय थागोन" । दा बेनि खायनो फानफिउवालि दाउवा अखा हाब्लाबो फिउ फिउ होननानै अखा लिंहर नांगौनो । थेवबो बिहा दै गांगाया जाबाय)

आसागि बैसागिमोनखौ बावबुलिया होसोयै होसोयै होसोनानै अगिनि खनथिंहाय हुहुरनायसैनो ।

(बोराइ बुरैफोरा बुडो जे समाव आसागि बैसागिमोना होसोजायो बे समावनो दैज्लां जायो आरो जे समाव बिसोर जिरायो, बे समाव मेसैं जायो) ।

ओजोंहाय फिसाफोरा बालाबारियावनो गोदाव-सोराव दंलाबायोमोन । दाउ थि थि थिउवा बिसोरखौ खंगासिनो दं । बे आसागिनि फिसाज्लानि मुंखौनो होनदों "हौ हौ" । बैसागिनि गथ 'फोरनि मुड जादों - गिबिया रांरासि, बिनि आनजाइया फारियै बारिगंथाम, मैथा हाजि, बारथेफाइ, गलाफारसै । दुइसिनथारा जादों बार थिरसाइ । बेनो हिनजावसामोन ।

सोदोबथि :

गाजलं - आफाथाला दैखांन गसंखां
लुसुर लुसुर - गिलिर आगानजों लासै लासै हायलाय हुयलाय
हाथाय (हाथाइ) लोमा - बाराद्राय रंजानाय,, खुगा ब्लां जानानै मिनि खुसि रंजानाय
आयुं - आखा-फाखा
हादुंगारा - दैदेनगिरि, गामि समाजनि सालायग्रा

थामथिम - थाखथियारि, गासिबो थियारि

रादाय - बाथ्रा खानाय, बाथ्रा होनाय

आबजा - माबा माबि, माबाफोर मुवा

श्राय श्राय - गोबा गोबा समानै, सिहि समानै जाबनानै

मोखां सायर' - मोखां सोमखे, हाथासि जानाय ।

सोंथि :

1. एहेम बोराइया माबादि जायगाखौ सिदोमा हासारगोनां होनना फामु खुंनो लादोंमोन ?
2. बर 'फोरनि हाग्रा एवझांन आबाद मावनाय खान्थिया बे सल 'आव माबादियै बेरखांदों ?
3. एहेम बोराइया गामिनि सेंग्रा-सिख्लाफोरखौ मानो गइ जानानै मुजुदैखौ दाबोराव मुजुसोमोनो थिनदोंमोन ?
4. आलारि दामब्राया मानिफ्राय माबोरै जोनोम मोनदोंमोन ? बिनि मुड माबोरै आलारि दामब्रा जादोंमोन ? बेखौ आरो मा मा मुंजों मिथिबावो ?
5. सल 'नि गिला फिथाइया बबे हाजोआव माबोरै थायना दंमोन ? बेखौ एहेम बोराइया माबोरै लाबोनो हादोंमोन ? लाबोनाय समाव लामायाव मा जाथाइ जादोंमोन ?
6. लावखार गथ 'फोरजों गिला गेलेब्ला आलारि दामब्राया मा मा गोमोथाव हाबा मावदोंमोन ? बिनि गिलाया माबोरै आसागि- बैसागिनि न' मोनहैदोंमोन ? बे गिलाया आसागि-बैसागिनि मा खहा खालामदोंमोन ?
7. आसागि-बैसागिया सोरमोन ? बिसोर मा मा खामानियाव माबादि आखा-फाखामोन ?
8. आलारि दामब्राया मानो आरो माबोरै आसागि-बैसागिनि नआव सहैदोंमोन ?
बिनि बिफाया आसागि बैसागिनि नआव मानो थानोगोनां जादोंमोन ?
9. आसागि-बैसागिखौ फिसाजो आलारि दामब्रानो हाबा खालामनो थाखाय माबोरै आरो खेबबेसे थानोंमोन ? बे समाव मा मा जाथाइ जादोंमोन ?
10. बावबुलि राजाया सोरमोन ? आसागि-बैसागिखौ बियो आलारि दामब्राजों

हाबा जानायाव मानो हेंथा होदोंमोन ? उनाव माबादियै सिमान जानांदोंमोन ?

11. आलारि दामब्राया आसागि- बैसागिजों हाबा जानायनि सिगां बिसोरनि बिमा बिफानि नआव माबादि गोरजिया थानांदोंमोन ? आसागि-बैसागिनि बिमा-बिफाया सोरमोन ?
12. आलारि दामब्रानि हाबाया मा खान्थियै माबादियै जादोंमोन ?
13. हाबानि उनाव गिलारि दामब्राखौ सिथारनो बावबुलि राजाया मानो आरो खेबबेसे मा मा राहायै सिथारनो नाजादोंमोन । नाथाय मानो आरो माबादियै फेलें जानांदोंमोन ? उनाव बावबुलि राजाहा मा जाखो ?
14. नाजानानैबो सिथारनो हायियाव बावबुलि राजाया आलारि दामब्राखौ मा खामानि होनानै माबोरै दाय हमनो नाजादोंमोन ? बेबादि खेबबेसे मा मा राहायै दाय हमनो नागिरदोंमोन ? नाथाय खेबफ्रोमबो माबादियै मानि थाखाय फेलें जानांदोंमोन ?
15. आलारि दामब्राया बावबुलि राजानिफ्राय बारग 'नो आसागि बैसागिखौ लानानै माबोरै बबेथिं खारलांदोंमोन ? बावबुलि राजाया बिसोरनि उनसंनानै माबादि बबे लामाजों होसो लांदोंमोन ? बे समफारिया मा बोथोरमोन ? बै समफारियाव बिसोर बबेयाव थानांदोंमोन ?
16. बबे अखाफोराव मानो आसागि बैसागिया अखां सानिफ्राय बुहुमाव बिरख्लाय बोनांदोंमोन ?
17. बुहुमनि बालाबारियाव बिरख्लायबोनानै आसागि बैसागिया गथ ' गोरलै जोनोम होनायनि अनगायै दैबेसेयै बिदै दैदोंमोन ? बिदैनिफ्राय बेरफुनानै सोरहा मा मा गथ 'सा जोनोम जादोंमोन ? बै समाव आसागि बैसागिया बबेयाव दंहैयोमोन ?
18. आसागि बैसागिनि फिसाफोरखौ सोरनो दै - आदारफोर दौनानै खांनो थाखाय बिबान होदोंमोन ?
19. सोरगोआव दै आरो आदारखौ दाउ थि थि थिउआ बिमाफोरनिफ्राय लाबोनाय लामायाव मा दाउआ मानो आरो माबोरै हेंथा होदोंमोन ? बेखौ आसागि बैसागिया मा साव होदोंमोन ?
20. आसागि बैसागिनि गथ 'साफोरनि मुडा मा मामोन ?
21. आलारि दामब्रा मुंनि सल 'बाथाया बर' बाथौ धोरोमजों मा लोब्बा दं

बिजिरना दिन्थि । बे सल 'बाथानि आखुफोरनि मुंफोरा बाथौ धोरोम आरो बर' आसार खान्थिनि मा गुमुर होनो हायो ?

22. बै सल 'बाथायाव थानाय बर' खान्थि मतै साननाय बोथोरनि मा गुमुर आरो सानथौ बेरखां होदों होनना साननो हायो ?
23. दैज्लां बोथोर आरो मेसें बोथोरजों " आलारि दामब्रा " सल 'बाथाहा मा सोमोन्दो दं ? " आलारि दामब्रा " आरो रावना रावनिनि सल ' मोननैखौ रुजुनानै बर 'फोरनि " अखा हानाय " समनि सुबुं फोथायथिखौ बुंफुरना दिन्थि ।
24. बे सल 'हा बाथौ धोरोमजों माबादि सोमोन्दो दं ?

फरा गियाण :

" आलारि दामब्रा " या मोनसे सुबुं सल ' एबा खुगा सल ' । बे सल 'नि गेजेरजों बर 'फोरनि गुदि बाथौ धोरोमनि गुमुर आरो सुबुं फोथायथिखौ मोनदांनो हायो । बर 'फोरनि हारिमु आरो आसार खान्थिनि सोमोन्दैबो मिथिनो हायो । बर 'फोरनि राइजो जानाय, जुलि लानाय आरो हाबा जानाय खान्थि, आबादथिलि सायख 'नाय आरो आबाद मावनाय, गेलेमुं गेलेनाय, सि जोम दानाय, हिंसायनाय, अनज्जलायनाय, बायदिसिना आसार आखु आरो हारिमुनि सावगारि नुनो मोनो । बुहुमखौ दिसोमा, हासार बहरा आरो सोरजिसुलि खालामना लाखिना दैज्लां बोथोरनि बार-अखा, जोमैनि गोनांथि बायदिसिना सानथौ आरो गुमुर बे सल 'आव थाखोमाना दं । सुबुं हारि जोनोम जानायनि धोरोम फोथाइथिबो बे सल 'आव दंफादेरो ।

फोरोंगिरिनिसिम :

खुगा थुनलाइया मा आरो बेखौ मानो नांनाय जायो फरायसाफोरनो फोरोंगिरिया बेखेवना होनांगोन । खुगा थुनलाइया दि हारि मोनसेनि गोदो गोदायानि आयना बेखौबो बुजायनांगोन । जारिमिना बुंस 'हाथि खोथाफोरखौबो खुगा थुनलाइया बुंफोरना होनो हायो । बेहा लिरगिरिनि मुं आरो थं गैया । गोदोनि सोरबा सानसुमैफोर गथ '- गथायफोरखौ रंजा होनो, गियाण होनो आरो बिसोरनि गोसोखौ सानबोलाउरिजों गब 'सारहोनो बेफोरखौ सानखानानै सोरजिदोंमोन । बेफोर हारिनि दौलत आरो गोगानो हानायनि जाहोन । बेनिखायनो फरायसाफोरखौ गावबागाव ओनसोलाव मिरौ-जिरौ थानानै थानाय हालतनिफ्राय बुरखांनो बुथुमना लाबोनानै बेफोरखौ गोमानायनिफ्राय फोथांफिननो दिथा होनांगोन ।

गोनोखोआरि गोसो माबोरै दानो हायो

ड° दीनेश चन्द्र ग'स्वामी

रा.सो. – बिरूपाक्ष गिरि बसुमतारी

फराखौ सायख'नायनि थांखि :

आथिखालनि मुगाखौ गोनोखोनि मुगा होनना बुंनय जायो। गोनोखोनि दिहुनथाइफोरनि थाखाय सुबुंनि जिउ खुंनयनि माना आथिखालाव गोबाडैनो जौगाबाय। ओजोहाय जौनि समाजाव स्कुल कलेज आरो डिग्रीगोनां सुबुंनि अन्जिमा बांदोब्लाबो गोनोखोआरि साननाय-हनाय एबा गोनोखोआरि गोसो जाबादि हाराव नुजानांगौमोन, बे नुजायाखै। जाउनाव गोबां खोमसि फोथायनाय आरो गात्रि आसारनि गोहोमाव गोगलैनानै दिनैबो समाजनि माखासे सुबुड गेजेर मुगानि साननाय हनायजो दैबथिजानानै गोबां गात्रि हाबा मावगासिनो। बिब्दि गात्रि हाबानि मोनसे बिदिन्थिया जादो दाइनि बुथारनाय।

फरायसाफोरनि गोसोनिफ्राय गात्रि आसार आरो खानाफोथायनाय खारहोनानै गोनोखोआरि बानबुंथाइ आरो सानस्रिनि बेगर गायनाया जोबोरै गोनांथार। मानोना फरायसाफोरानो जादो समाज आरो हादरनि इयुन। समाज जौगानायनि थाखाय फरायसाफोरा गोनोखोआरि गोसोनि बिगुमा जानाया गोनांथार। बे बिथिडव इसेब्लाबो बिहोमा होगोन होनना साननानै 'गोनोखोआरि गोसो माबोरै दानो हायो' मुंनि फराखौ फराफारियाव सोनाय जादो।

लिगिरिनि सिनायथि :

ड° दीनेश चन्द्र ग'स्वामीया 1949 मायथाइयाव जोनोम जायो। मुदांखा गोनोखोगिरि ड° ग'स्वामीया रडिया हाइस्कुलनिफ्राय 1963 मायथाइयाव मेट्रिक आनजादाव उथ्रिनानै गुवाहाटीनि कटन कलेजाव सोलोथाइ लायो। उननि समाव गुवाहाटी मुलुग सोलोसालिनिफ्राय बेसादबिगियान आयदायाव मास्टर डिग्री आरो पि.एच.डि. डिग्री मोनो। गुवाहाटी बि. बरुवा कलेजाव फोरोंगिरि महरै

जिउ खुंनो लानानै ड° ग'स्वामीया उननि समाव कटन कलेजाव फोरोंगिरि महरै, गोदान दिल्लीनि गोनोखोगिरि आरो दारिमिनारि बिजिरसं परिसद (सि.एस.आइ.आर.) आरो ज'रहाटाव थानाय ओनसोलारि बिजिरसंसालि (आर.आर.एल.) आव गोनोखोगिरि महरै सिबिनाय होयो। ओनसोलारि बिजिरसंसालिनि सामलायगिरि थाखोनि गोनोखोगिरि आरो बिथोनगिरि महरै 2009 मायथाइयाव बिथाड आजिरा मोनो।

असमीया गोनोखो-थुनलाइयाव ड° ग'स्वामीनि जुनिया बिहोमा दं। बिथाड सुबुं मोजांमोनग्रा गोनोखो (Popular Science), सानबोलाउरि गोनोखो (Science Fiction) आयदानि नैजिबासो बिजाब सुजुयो। बेफोरनि गेजेरनि मख 'जाथाव बिजाबफोरा जादो 'बैज्ञानिक-मन बैज्ञानिक मानसिकता', 'शताधिक महान बिज्ञानी', 'ज'नाकीर जिलिकनि', 'उष्ण प्रबाह', म'हनीय बिश्वब्रह्माण्ड' आरो 'शब्द निरन्तर शब्द'। दासिम ड° ग'स्वामीया गां जिस्नि बिजाब दानस्लायना दिहुनदो। 'दृष्टि' मुंनि गांसे गोनोखो आयदानि लाइसिनि बिथाड गोबां बोसोर सुजुगिरिमोन।

असम साहित्य सभाया दिहुननाय 'बिश्वक'ष'नि गोनोखो आयदानि मोनथाम खोन्दोनि बिथाड गाहाइ सुजुगिरिमोन। बेनि अनगायैबो ड° ग'स्वामीया सुजुनाय गोबां आबुं खारि गोनां रायथाइफोर गुबुन गुबुन लाइसिफोराव नुजादो। 'गोनोखोआरि गोसो माबोरै दानो हायो' मुंनि फराखौ 'बैज्ञानिक मन बैज्ञानिक मानसिकता' मुंनि बिजाबनिफ्राय फोसाबना-सुजुनाय असमीया रायथानिफ्राय बर'आव राव सोलायनाय जादो।

गुबै फरा :

सुबुड अरायबो मिथियि बाथ्राखौ मिथिनो आरो बुजियि बाथ्राखौ बुजिना लानो नाजायो। गोदो गोदायनि सुबुंनिफ्राय आथिखालानि सुबुंसिम साप्रोमनिबो गोसोआव बे मिथिनो लुबैनाया दं। बेनि अनगायैबो सुबुंहा दं बाथ्राफोरखौ जेथो सिफायना नायनो हानाय, बिजिरनानै नाजावनो हानाय सोलो। सोलो आरो मिथिनो लुबैनाय गोसोनि थाखायनो सुबुड जौगानायनि लामाजो दावगा लांगासिनो दं, बे गोहोजोनी सुबुड मिथिंगानि गोबां सैथो गोबां रहस्य संनो हादो आरो मिथिंगानि गोहो आरो सम्फद गावनि जिउनि मानदान्दा जौगा होनायाव बाहायनो हादो।

बेसाद आरो जाथाइ नोजोर होनो हानाय गुन, बेखौ मिथिनो-बुजिनो गोसो

दुंनाय गुन आरो बुजिना लानानै बै बेसाद एबा फिनजाथाइखौ गावनि आवथायाव लाबोनायनि गोसो दुंनायनि जाउनाव सुबुडा गोबां बेसाद आरो जाथाइ दिहुनलांगासिनो थादों । बे खान्थिजोंनो गोनोखोनि खान्थियाबो जुरि जादों ।

जोंनि मुलुग संसारनि गुमुरखौ संनायनि राहायानो जादों गोनोखो । गोनोखोआव जों नुनाय बेसाद आरो जाथाइफोरनि मोनसे आब्रुथिगोनां बुंफुरलु होनो नाजानाय जायो । नाथाय बे बेखेवनायफोरा आनाजाद नायनो हानाय जानांगोन ।

बिब्दिनो नायबिजिरनाय, सुनाय, सैथो संनाय, बेसाद एबा जाथाइनि दोहोरोम एबा आखल बिजिरना नायनानै बेनि सोमोन्दै मोनसे गरन्थ'आव सफैनाय-बेफोरनो जादों गोनोखोगिरिनि हाबा । नों-आं बादि सरासनम्रा सुबुं सासेहा बेफोर खान्थि एबा हाबाजों मा सोमोन्दो दं ?

आगु सुबुंनि सासेया औरैरो अनथाइयाव अन्थाइ खुबैबाय थानायावनो अर जोंदों । बै नोजोर होनायनि उनाव बियो अर जोंहोनाय हाबाखौ जावले जावले मावना नायनायसै । बियो अरनि दोहोरोम फरायसंबाय, अरनि गुबुन गुबुन बाहायनायखौ सोलौंनो लाबाय । बे गिबिसिन गोनोखोगिरिनि खान्थिया दानि मुगायावबो, इसेबो सोलायजायाखै, खालि बे रासिन गोथौ, बांसिन खुदगैयि जादों । दिनैनि गोनोखोगिरिया मेगन गोजायै, आखाइ गोजायै नासंनाय आरो आनजाद लानायनि सोलायै जौगानाय जोन्थोरारि, जौगानाय आदब बाहायदों । नायबिजिरसंनो थाखाय बिनि आखाइयाव एक्सरे सानरोदानि नुगोजान दाजेम, सोराडरि एबा रेडिअ' नुगोजान दाजेम, नुगेदेर दाजेम, लेजार रोदा, अप्टिकेल फाइबर बायदि दं । आनजादनि थाखायबो बिनि आखाइयाव गोजौ आगजुनिफ्राय जुरिनानै मुवा गुन्द्रा सुग्राबादि रोजा रोजा बेसाद दं ।

गोनोखोगिरिया गिबियाव गावखौनो सोंदोंमोन- अरा माबोरै जोडो ? माबैरो बे अरखौ गुबुन जायगासिम लांनो हागौ ? बेनि फिन नागिरनानै बियो गुबुन गुबुन बेसाद हुथुदनानै नायदोंमोन, गुबुन गुबुन बेसादजों अर सुनानै दोननो नाजादोंमोन । दिनैनि गोनोखोगिरिया गावखौ सोंनाय सोंथिफोरनि बिदिस्थिया इसे जुदा : मेलेरिया बेराम दि जायो, मानो जायो, माया बे बेरामखौ गोसार होयो ? माबोरै बे बेराम गोसारनायखौ होबथानो हागौ ?

एबा दाउफोरा अखाडव बिरनो हायो, माबोरै हायो ? जोंहा जेबोना गां गैया, बाराव गोजाव लांथाव जों माबा बानायना लाजाया नामा ? एबा जोंनि बुहुमा माबोरै, जोनोम जाखो ? बुहुमनि महरा मा बादि ? माबोरै दाजादों, बेसे बैसोआ ? गोनोखोगिरिफोरा बेफोर सोंथिनि फिन नागिरनो थानायनि थाखायनो जोंनि

आदार,न', सि जोमनि गोबां जेंना दिनै सुफुं जादों । मिथिंगानि गोदान गोदान मुवा, गोहो आरो फिनजाथाइखौ जों सुबुडा गावनि आवथायाव लाबोना हारों आरो जोंनि गियाननि गांनायखौ गांगा होनो हादों ।

नाथाय बेफोर बिहोमानिखुइबो गोनोखोनि सुबुं समाजसिम गोबाडै-गोनांसिन बिहोमाया जादों गोनोखोआरि साननाय-हनाय, गोनोखोआरि सानसि, गोनोखोआरि खान्थि । गोनोखोगिरिफोरा नायो एबा नोजोर होयो, बेनि उनाव खारिफोरखौ मोजाडै साजायनानै लाना बेयो बिब्दि बेसाद एबा बेयो बिब्दि फिनजाथाइ जानांगौ होननानै उफेरा सानो एबा मोन्दांना लायो । बेनि उनाव गोदान खारि, गोदान बिजिरसंनायनि गेजेरजों सिगांनि उफेरा साननाय एबा मोन्दांनाया गेबें ना गोरान्थि मिथिनो नाजायो । जेब्ला नुजायो दि गोदानै मोननाय खारिफोरा सिगांनि सानथाइ एबा गरन्थ'खौ गनायना लाया, अब्ला बिसोर जेबो गोनोगोथो जायाब्लानो सिगांनि गरन्थ'खौ नागारो ।

बेनो जादों उदां गोसोनि बाथ्रा । गोनोखोनि गासै खान्थियावनो बे उदां गोसोनि गोनांथिया बांसिन । आथाखिथा जाना गोजाम बाथ्रायाव नांबाय थायाब्लानो गोदान बाथ्रा, गोदान गरन्थ' नाजावनो हानाय गोसोआ सुबुं आरो समाजखौबो जौगानायनि जांख्ळांजों दावगा होहोना लाडे ।

'आबै-आबौमोननि समनिफ्रायनो बिब्दिनो आबाद मावबोदों - दा बैफोर जोंनो मा फोरोंनो फैदों ?' होननानै सासेया गावनि जेग्रेबग्रेब जोलैजों, हासार दै जगायनाय गोजाम आदबजों आबाद मावबाय । गुबुन सासेया आरोबाव गावनि उदां गोसोनि थाखाय आबादगोरानि बाथ्रा लानानै दखरसे हायाव आनजाद नायनो लाबाय । बियो गोदान, जौगानाय जोलै लाबोबाय । हानि नमुना आनजाद नायहोनानै रोंग'सारा बुंनाय रोखोम आरो बुंनाय बिबांनि जुनिया हासार होबाय । बेनि आबादा जोबोरै मोजां जानायसै ।

बिब्दि गोबां बिदिन्थि होनो हायो ।

गथ'नि बेराम होबथानायनि थाखाय गोनोखोगिरिफोरा गोबां नाजाथाबनायनि उनाव गुबुन गुबुन बेजी-भेक्सिन बायदि दिहुनदों । बेफोरखौ हादरनि खना खनलाबो मोननो हानाय जादों आरो बेखौ होनो थाखाय सरकाराबो गुवारै फोसावदों । नाथाय 'जोंनि गोबां फिरिया गथ'-गथायनो बेफोरखौ होआब्लानो खांबोबाय' होननानै दाबो गथ'खौ बेजी-भेक्सिन होआब्लानो खैफोदाव खोख्खैनाय गोबां बिमा-बिफा जोंनि समाजाव दं । बिसोर गाव गावनो माबा मोनसे राहा लानायनि सोलायै बरादनि सायाव बांसिनै सोनारो ।

सिगां, जेब्ला गोबां बाथ्रानि हाबा – फिथाइनि सोमोन्दै सुबुंफोरा मिथियाखैमोन अब्ला बेफोर मोदाइ-दावदाइ, बुहुत-बिरानि हाबा होननानै, माबा नुनो मोनि गोहोनि हाबा होननानै गनायना लादोंमोन। गिदिर सिथर, फिसा सिथर बादि लोन्थि एबा बसन्त बेरनायाबो बिमा मोदाइ (शीतला देबी) एबा गुबुन मोदाइजो रागा जानायनि थाखाय जादों होनना सुबुंफोरा फोथायनायमोन। बिब्दि मोदाइ दावदाइ- बुहुत-बिराखौं गोजोन होनो बिसोर गोबाडै फुजा-फाथाल, आरज गाबनाय आरिनि राहा खालामोमोन। नाथाय गोदान फाहामग्रा गोनोखोगिरिया फोरमान खालामदोंदि लोन्थि एबा बसन्त बेरामा मोनफा जोबोरै गुन्द्रासानि भाइरास एबा जिवसाजों सोमजिनाय बेरामसो। भाइरास् मुंनि बे जिवसाजों गाग्लोब जानायनिफ्राय देहाखौं रैखाथि होनायनि राहाबो बिसोरो दिहुननायसै। जोबोर गोमोथावै गोनोखोगिरिफोरा गासै बुहुमनिफ्रायनो गिदिर सिथर बेरनायखौं फोजोबस्रानायसै।

फिसा सिथर आरो गेदेर सिथरा दासिमबो दं। नाथाय दा बयबो मिथिबाय दि बे मोननै बेरामाबो भाइरासनिफ्राय जायो।

जोंदि सिथर बेरोब्ला बिमानि मुं लायो, आइजोफोरा आरज गाबो बेफोर थारैनो दोहोरोमारि आफादसो। बेरामजों बेनि जेबो सोमोन्दो गैया। नाथाय बेरामिनि नआव आरज गाबनानै प्रसाद जाब्ला बेनि गेजेरजों बेरामि आरो आबार लाग्राफोरजों लोब्बा जानायनि जाउनाव सुबुंनि देहायाव बे भाइरासा गोसारनो हागौ।

सिगाडव जेब्ला जों सिथर ओंखारनायनि जाहोनखौं मोजाडै मिथियाखैमोन, अब्ला बाथ्राया गुबुनमोन। दा भाइरास आरो बे बेरामनि थोंजों सोमोन्दोनि बाथ्रा मिथिनायनि उनावबो जों सिगांनि हाबा-हुखाफोरखौं सोलायनो हायानामा? बेरामिनि नआव आइजोनि आफाद एबा आरज गाबनानै बेयावहाय उन्दैफोरखौंबो लेंहरनानै लाबोना बिसोरनो बेरामनि जाहोन रानना होनायनि मोनथाइ जोंहा दंना?

जोंनि हाथाइयाव एम्फौ जायो, बेफोर एम्फौखौं जों गोबाड साननाय बादि जोबोर गिदिर माबा मोनसे नडा, बेफोर जिवसासो, मेगनजों नुयि, बे बाथ्राखौं मिथिनायनि उनाव, सोरबा अजा-कबिराजा फैनानै थालिर बिलाइ-थास' बिलाइ सायाव नॉनि हाथाइनिफ्राय एम्फौ दिहुनना होयोब्ला नों फोथायगोन ना? बिब्दि जादु दिन्थिग्रानि आखाइयाव नॉनि हाथाइनि आबारखौं हगारना दाहो। गोदान हाथाइ फाहामनायनि गियानजों गियानी हाथाइनि फाहामगिरिनि मदद ला। बेनि अनगायैबो हाथाइनि जेब्लाबो आबार लादो।

आखाइ बौवोब्ला जोंनि गोबाड सोबनानै थैखौं लॉना दोनो। बिसोर बै हाबाखौं मावनानै सानो दि देहानिफ्राय गनाय थैखौं फिन देहायाव सोफिनदों। नाथाय जोंनि देहानि थै खारग्रा राहा एबा खान्थिया जोंनि आदार हजम जाहोग्रा खान्थिनिफ्राय जुदाथार। बेनिखायनो उदैयाव थैखौं सोहरब्ला बेयो थोंजों थै खारथाइयाव थाड। फारसेथिं मैला जानानै उदैयाव हाबनायनि थाखाय बेयो खहा खालामनोसो हागौ।

हिनजाव मानसिहा मासिक जानाया जेबो बेराम नडा, बेजों जेबो जिवसा एबा जीबानु लोब्बा थाया। बेयो मोनसे जाखाग्रा जाथाइसो। सिगाडव मानसिफोरा बे जाखाग्रा बाथ्राखौं मिथियाब्लानो बिब्दि हिनजावखौं जुदा रोखोमै आखल दिन्थिदोंमोन।

बिब्दि हिनजावफोरा थारै सानफ्रोमबोनि हाबा-हुखा मावनानै थानो हागौ। खालि खारनाय, माइ सौनाय बादि गोब्राव हाबा मावाब्लानो थानाया गाहाम। नाथाय गामि-गफायाव, मासिक जानाय आइजोखौं ओंखाम संहोआब्लानो गोब्राव हाबासो मावनो होनाय जायो, गुसु हायाव एसेल' सिजोमनि एमाव उन्दु होनानै बेरामसो जाहोनो लामा लाहोनाय जायो।

गोगो लोंग्रा दैनि आंखाल एबा सावस्रि गैयि आबहावानि थाखाय जोंनि गोबां गामि गफा आरो गोबां ओनसोलाव डायेरिया, मेलेरिया, जण्डिस बायदि गोबां बेराम जेब्लाबो जेराव-मेरावनो जायो। बेफोर बेरामनि थि जाहोन दं आरो होबथानाय-फाहामनायनि गोनोखोआरि राहा दं। माबा जादु-मोन्थोर एबा थाबिज मुलिजों बेफोर बेराम सोमजिनोबो हाया एबा फाहामनोबो हाया। नाथाय माखासे सोलोगोनां आरो स्वार्थ गोनां सुबुड माखासे नखर एबा सुबुंखौं जुनियायै माखासे गोरिब आइजोखौं दाइनि साजायनानै साजा होयो आरो सिथारोबो। बेनिखुइ जुनादारि हाबा आरो नेहाद बाथ्रा मां दंबावो! माखासे सुबुड हरखाबै सिमाडव माबा गोहोनिफ्राय सुबुंनि बेराम फाहामनायनि मुलि एबा मोन्थोर मोननाय होननानै दाबि खालामो। गुबुन साफा-सानै सुबुड हरखाबै माबा सोमोनांथाव गोहोनि बिगुमा जादों होननानै, दानि-इयुननि बाथ्रा बुंनो हानाय, अदेबानि इयुनखौं सायख'ना होनो हानाय जादों होननानै आरो गासैफ्राम बेरामखौंनो फाहामना होनो हानाय जादों होनना दाबि खालामो। बिब्दि दाबिनि जेबो बिथा गैया आरो समाव बेफोर गोरोन्थि होननानै फोरमान जायो। नाथाय खानाफोथायग्रा माखासे सुबुंनि दैदेननायजों बेफोर जाथाइया जाबाय थायो। बेफोर जाथाइयानो सुबुं आरो समाजनि माबादि खहा खालामो एसे सानब्लानो मोन्दांनो हायो।

गोसोखौ उदाडै लाखिनानै गोदान गियान, गोदान खारिजो गोदान गरन्थ 'आव स 'हैनो नाजा । गासै बाथ्राखौ बिजिरना नायनो, बेखेवना नायनो सर' खालाम । गोदो गोदायनिफ्रायनो आबै-आबौनि समनिफ्रायनो सोलिबोदो होननानै खैफोद लाबोग्रा एबा जौगानायाव हेंथा सोमजि होग्रा खान्थिफोरखौ सोलिहोना दोननो नाड । खाफालनि सायाव सोनारना जिरायना थानो नाड । नौं मावनो हानायखौ मावलां ।

नुगोन थार गोनोखोगिरि सासेया जेरै गोसो, जेरै सानस्रि लानानै दावगालाडे, जेरै खान्थि बाहायो, नौंबो बिब्दि गोसोनि बिगोमा जानो हाबाय । नौंनि बे गोनोखोआरि गोसोआनो समाजनि जौगानायाव बिहोमा होगोन ।

सोदोबथि :

मानदान्दा - मानथाखो

रहस्य - गुमुर

गरन्थ' - बेखेवथि

जावले-जावले - खनले खनले

दाजेम - जोन्थोर

आवथा - बेंखन, मोनथाइ बेंखन

खारि - खौरां बिदिन्थि, तथ्य

आथाखिथा - नांबाय थानाय, ब्रा ब्रा

जेग्रेब ग्रेब - फिसाथार

जोलै - बाहायबोनाय गुदि मुवा

बराद - खाफाल, जबं

प्रसाद - फरसाद, इसोरनो बाउनाय जाग्रा मुवा

आबार - जोथोन

खारथाइ - खारनाय

आब्रुथि - गद गोनां, फारि गोनां

नायसं - नायना संनाय

बानगैयै - जुक्तिगोयि

सोंथि :

1. गोनोखोआरि गोसो होनोब्ला मा बुजियो ?
2. जौं माबोरै गोनोखोआरि गोसो दानो हागौ बुजायना लिर ।

3. गोदो गोदायनि सुबुंफोरा बसन्त बेराम जानायनि जाहोना मा होननानै सान्दोमोन ?
4. बसन्त बेराम जानायनि गोनोखो गनायनाय जाहोना मा ?
5. लिरगिरिनि बादिब्ला, गोनोखोनि सुबुं माहारिसिम गोबाडैनो बेसेन गोनांसिन बिहोमाया मा मा ?
6. बुहुत-बिरा, मोदाइ-दावदाइ बायदिनि मोखथाडारि बिथा दंना ? माखासे सुबुड बेफोराव गोथौ फोथायनाय थानायनि जाउनाव जौंनि समाजाव माबादि जेंना सोमजिदो सावराय ।
7. गोनोखोगिरिफोरा आनजाद आरो बिजिरसंनाय हाबायाव बाहायनाय मोननै दाजेमनि मुं लिर ।
8. 'सिमाडव मोननाय मुलिखौ' बेरामिया मानो बाहायैया गाहाम बुजायना लिर ।
9. बेखेवथि लिर:
 - (क) गोनोखोनि गासै खान्थियावनो बे उदां गोसोनि गोनांथिया बांसिन ।
 - (ख) सुबुड आरायबो.....नाजायो ।
 - (ग) नौंनि बे.....होगोन ।
10. सुंद 'थै फिननाय हो :
 - (क) 'गोनोखोआरि गोसो माबोरै दानो हायो' फरानि लिरगिरिया सोर ?
 - (ख) 'गोनोखोआरि गोसो माबोरै दानो हायो' फराखौ माबेनिफ्राय लाबोनाय जादो ।
 - (ग) ड° दीनेश चन्द्र ग 'स्वामीया सुजुनाय गांनै बिजाबनि मुं लिर ।
 - (घ) गोदोनि सुबुड माबोरै अरखौ दिहुनदोमोन ?
 - (ङ) उन्दै गथ 'खौ होनाय बेजी - भेक्स्निनि हाबाया मा ?

फरा गियान :

सुबुड मिथियै बाथ्रा मिथिनो लुबैयो । देहानि गोहोजो दबथायनो एबा सामलायनो हायै बेसाद एबा जाथाइखौ सोलो होबायनानै गावनि आवथायाव लाबोनो नाजायो । बे खान्थिनि गेजेरावनो गोनोखो खान्थिनिबो जुरिजेननाय । गोनोखोआव नुनाय जौं बेसाद एबा जाथाइफोरनि मोनफायै आब्रुथिगोनां बिजिरनाय

होनो नाजानाय जायो । बे बिजिरनायफोरा आनजाद खालामना नायजाथाव जानांगोन । गोनोखोगिरिफोरा खालामनाय आनजाद नायसंनायनि जाउनाव सुबुंनि आदार, थानाय जायगा आरो सिजोमनि जेंना सुफुंनायनि लामाया गोरलै जादों । गोनोखोनि बे बिहोमानि अनगायैबो सुबुं समाजसिम गुबुन गनायजाथाव बिहोमाया जादों गोनोखोआरि साननाय-हनाय, गोनोखोआरि गोसो आरो गोनोखोआरि आदब ।

आथिखालनि मुगाया जादों गोसोखौ उदाडै दोननायनि मुगा, गोनोखोनि गासै खान्थियावनो बे उदां गोसोनि गोनांथिया बांसिन । नारानाथायै बानगैयि गोजाम बाश्राफोराव नांथाबना थायाब्लानो गोनोखोगोनां गोदान बाश्रा, गोदान गरन्थ नाजावनो हानायासो समाजनि जौगानायाव बिहोमा होनो हायो । गोदोनि समाव सुबुड गोबां बाश्रा एबा जाथाइनि हाब-जाहोननि सोमोन्दै मिथियामोन । बिसोर बेफोरखौ माबा बहुत-बिरा, मोदाइ-दावदाइ बादि नुनो मोनै गोहोनि हाबा होनना फोथायनायमोन । गोदान फाहाम गोनोखोगिरिया फोरमान खालामना दिन्थिबायदि बहुत-बिरा, मोदाइ-दावदाइ होननानै जेबो गोहो गैया । बसन्त बेरामा रोखोमसे फिसा भाइरासनि गेजेरजों सोमजियो । बिब्दिनो सुबुंनि सानफ्रोमबोनि जिउजों लोगोसे लोब्बा गोनां गोबां आसार-खान्थि, सोलिबोनाय खाना फोथायनायहा सोमोन्दो दं । बेफोरनो जेब्लाबो जेंना सोमजि होयो । बहुत-बिरा, मोदाइ-दावदाइ फोथायग्रा दुथां सुबुं माखासेया आथिखालाव 'दाइनि' होननानै गोरिब-गुन्द्रा आइजो माखासेखौ जोबोरैनो इनायै बुथारगासिनो दं । बेयो खालि मुगैजाथावल' नड साजा मोनथावबो ।

जों जौगानाय समाज लोगोसे हादरनि मिजिं खालामोब्ला जोंनि गोसो-मेलेमाव गोनोखोआरि सानथाइ एबा गोसो दानो नांगोन । नडब्ला जोंनि हादरा सोदोमस्रिनि दावगा लामायाव जोबोरै उन जाना थागोन ।

उफेरा खारि:

गोनोखोआरि गोसो : गोनोखोगोनां साननाय - हनायजों माबा बेसाद एबा जाथाइ बिसार-बिजिर खालामनो हानाय गोसोनि गोहोआनो जादों गोनोखोआरि गोसो । गोनोखोआरि गोसोनि बिगुमा जानो सोरबा सासे सुबुड गोनोखोनि गोजौ डिग्रि गोना जानायनि गोनांथि गैया । नाथाय, गोनोखोनि गोजौ डिग्रि थानानैबो सोरबा सुबुंहा गोनोखोआरि गोसो थायाबो जानो हागौ, थामहिनबा बेयो सोलिबोनायखौ फोथाग्राबो जानो हागौ । समाजनि लेखाफरा रोडि; गामिनि सुबुं

सासेयाबो गोनोखोआरि गोसोनि बिगुमा जानो हागौ ।

जाथाइ-जाहोननि सोमोन्दो : माबा जाथाइ जानायनि मोगथाडारि जाहोन मोनसे थाथारनांगोन । गोमोथाव गोहोआ जेबो हाबा मावफुड । मानोना गोमाथाव गोहोनि मोन्दांथिया सानबोलाउरिनिसो ।

मुवा गुन्द्रा-सुग्रा : मुवानि फिसासिन गुन्द्राफोरनि खारथाइ बांहांग्रा जोन्थोरखौ मुवा गुन्द्रा-सुग्रा बुंनाय जायो ।

फोरोंगिरिनिसिम :

सम-खाबु दिहुननानै फरायसाफोरखौ गोथौ लोगोसे गोग्लैसोनानै थानाय गामि बायदिसिम लानानै गोनोखोआरि गोसो सोमजिनायनि थांखियै बादा, सावरायमेल, दिन्थिफुंनाय बायदि खुंनो नांगौ । गामियारि जाम्बा-जाम्बफोरखौबो बेफोरबादि समाजनि खहा जानो हाथाव फोथायनाय आरो खामानिनिफ्राय गोजान थानो सुबुरन होनांगौ ।

बुथुवा थुंग्रि

नीलकमल ब्रह्म

फराखौ सायख 'नायनि थांखि :

बर 'सुंद' सल 'नि सम्राट नीलकमल ब्रह्मआ लिरनाय सल 'फोरनि मादाव- 'बुथुवा थुंग्रि' याबो दोंसे; जेराव सुबुं समाजनि मोगथाडारि सावगारिया रोखायै बेरखांनायनि लोगोसे बर 'हारिनि थाथाइ महर-सावगारिया नंगुबै बादियै बेरखांदों। बर 'हारिनि राजखान्थियारि, रांखान्थियारि थाथाइया समनि लोगोसे गोबां दैदेनगिरिफोर सरकारनि खाथियाव दाबि-दाबा खालामसेयावबो थोंगोरथि महर मोनाखै। बर 'हारिनि गेजेराव सुबुं सांग्रांथिनि आंखालाबो बेनि मोनसे जाहोन होन्ना बुंजायो। सागोर मुंनि सासे हारिखौ मोजां मोनग्रा, मेलेम गोनां सुबुडा बेनि बागै सांग्रां नोजोरै गाव सानखांथिखौ गनायथाव महरै फोरमायदों। जेरावबो गेजेन जानानै थानाय बर 'हारिनि फारसे सागोरनि बिब्दि सान्नाया थारैनो गंसे बुथुवा थुंग्रि बादिसो; मानोना बर 'फोरा दासिम थुंग्रिनि गोबौखौ मिथिरोड, हमदांस 'हाया। सुबुं समाजनि लोगोसे बर 'हारिनि बेलायाव बे मोनसे मोगथां आरो नंगुबै महर-बेरखांथाइ सावगारि। गुबैयै बे बाथ्राखौ फरायग्राफोरनो मिथिहोनो एबा गियान होनायनि थांखियै फराखौ सायख 'नाय जादों। मानोना - गोजौवाव फोरमायनाय गासै बाथ्रायानो नंथारगौ महरै- 'बुथुवा थुंग्रि' सल 'आव बेरखांदों।

लिगिरिनि सिनायथि :

नीलकमल ब्रह्मनि मुंखौ बयबो मिथिगौ। बिथाड सासे राफोद लिरगिरिमोन। बिथाड इ 1944 मायथाइनि 27 आगष्ट अक्ट 'खालि क 'कराझारनि सानजाहा फिसा आदाबारि गामियाव जोनोम जायो। बिफानि मुडा महेन्द्र चन्द्र ब्रह्म आरो बिमानि मुडा मानेश्वरी ब्रह्म।

बिथाड इ 1965 मायथाइयाव क 'कराझार गभर्नमेन्ट हायार सेकेन्दारिनिफ्राय

एइस.एस. आनजादखौ बारग 'यो। इ 1968 मायथाइयाव क 'कराझार कलेजनिफ्राय बि.ए. आनजादखौ अनार्च लानानै उथ्रियो। इ 1971 मायथाइयाव गुवाहाटी मुलुग सोलोंसालिनिफ्राय राजखान्थि बिगियानाव एम.ए. आनजादखौ बारग 'यो।

बिथाड फोरोंगिरिनि हाबा मावनानै दल 'रै जिरायनानै थायाखैमोन। बिथाड हाजासे गावनि रोंग 'थिजों बर' राव थुनलाइ लिरलांबाय। बिथांनि बे लिरनाय बिजाबफोरा जैरै - (1) मोनाबिलि सल' (2) सिलिंखार (3) सिरिनाय मान्दार बिबार (4) हाग्रा गुदुनि मै (5) साखन्द्रा (6) आदै थमनि देरा (8) आं दाबो आदाम इभनि र 'जे बायदि। बिथांनि लिरनाय "सिलिंखार" सुंद' सल' बिजाबा बर' थुनलाइ आफादजों रांसार बान्थानि थाखाय सायख 'जायो। बिथाड इ 1998 मायथाइनि 28 अक्ट 'नबेम्बरखालि जिउ गोमायो।

गुबै फरा :

'दा अवे इन हुइच इउ.....'

बाथ्राखौ आद्रा दोननानै बिथां सागोरा आंनिथिं जों नोजोरै नायहरदों।

आं हमनो हादों, बिथाड आंनि आदब-आखु, खोथा-बाथ्रा आरो साननाय-हनायखौ साबजानाय मोनाखै। आंबो नाथाय दलर जुथेयै गेजेन जानो लुबैग्रा मानसि नड। बुंदों आं :

'जेराव खोमसि गैया बेयाव सोरां गैया, जेराव इनाय गैया बेयाव उद्रायनाय गैया, जेराव जिउ गैया बेयाव थैनायबो थानो हाथावा।'

आंनि बाथ्राफोरखौ खोनासंखानानै सेरे थादों बिथां सागोरा। हादे मिनिदों। दान्दिसे उनाव स्टिलनि फल्दिं सेयारनिफ्राय सिखारनानै पर्टिक 'निफ्राय गावनि सुइट फार्से थाबायलांदों। बुंलांदों :

'लेट मि लिभ एल 'न। गुड नाइट'।

बाथ्राफ्रा दाबो गोसोआव रोखा रोखा दं।

फरेस्ट मिनिस्टार फैगोन। डेपुटि कमिसनार बिथाड मनथ्रि साहेबखौ मै बेदरजों बोथिसे सेब जाहोहरनो लाहार-फाहार खालामदों।

मै बेदर ज 'गार खालामनायनि बिबाना जॉनि।

शान्तिपुरनि भिलेज हेडमेन खर्ग बाहादुर थापाया खौरां हरदों - दासान्दि देउमियाव मैनि आंखाल गैया। गनद्राइ थांगोनफोरजोंनो थांखिथार खुबैथार मानसिफोरा बेदर फिसा जागासिनो दं।

देउमिनि फरेस्ट बांल 'आव जों जेब्ला सहैयो अब्ला अखाफोरा हाबहांबो जायाखै । बिट अफिसारनिफ्राय जों खौरां मोनदों- मैदेरनि जोबोद दुम दाखाल । अखानायसि नायसिनि सिगां हाग्रायाव हाबियानो गाहाम ।

अखाफोरा हाबसान्दि जिरायथ 'नो बांल 'नि सुइट मोनसे रिजार्भ खालामनानै जों ब्रान्दि-हुइस्किनि बाना बोहैहोदों ।

फलान हानजानि नांला-बंसा बाश्रा रायज्जलायनायजों जानाय दावराव-दावसिखौ आं सुखुनाय मोनाखै । मोनसे समाव दावराव दावसिनि गेजेरावनो आं बायजोआव खाम खेम सोदोब जानायबादि खोनानो मोनदों । मानि सोदोब जाखो होननानै उदिस लानायनि असिलायाव आं बांल 'नि पर्टिकआव ऑंखारबोदों ।

सुइटनिफ्राय ऑंखारग्रोनमोना आं नुनो मोनदों दानथाल मैदेर मानैया फरेस्ट बांल 'नि दंफांनि लांगोनाखौ गाखेब गुखेब खालामगासिनो दं ।

मैदेर हालिसेखौ नुनानै आं फेल्लेबसेबो गोमोआखै । गोमोदों पर्टिक'आव बनानै दोननाय स्टिलनि फल्लिदं सेयाराव जनानै मैदेरफोर दुनश्राइ-दुनसि खालामनायखौ गिया लना दिदोम दलरै नायबाय थानाय सासे मानसिखौ नुसननानैसो ।

मैदेर हालिसेया बांल 'नि लांगोनाखौ थेर बेथोर खालामनानै हुरुद थांफिनदों । अखाफोरा अब्लाबो हाबाखै । हाबहां जानानै सोनाबनि अख्राडव दिनदां दं । अखाफोरनि मोस्लेर सोराडव आं नुनो मोनदों - स्टिल फल्लिदं सेयाराव जबाय थानाय मानसिया गंगारनि खसाब गानदों ।

सिगारेट लाइटरनि सोरांजों आं रोखासिनै नुनो मोनदों - मोदोमै मोखाडै दाथ जालांगाद, जौम्रां-देरम्रां ।

'आर इउ फ्रम भुटान ?'

'इयेस, नाथाय आं गंगार नड ।'

हरखाब बर 'नि बुंफनांदों बिथाड ।

सोमो नांनायबादि जादों आं । गंगारनि खसाब गानदों नाथाय'गंगार नड ।

आं माबा फंसे बुंनायनि सिगां बिथाड गावनो बाश्रा जुरिफिनदों ।

'आं मिथिगौ, आंनि बाश्राफोरा फोथायजाथाव जानाय नड, नाथाय आं बर', थारैनो सासे बर 'सा ।'

फलान लोगोफोरनि सावरायलायनाया गोमसारदों । गावजों गाव रावनिखौबो खोनासंलाया । बाश्राफोरा गद गैया-नांला-बंसा ।

मोनसे समाव बिथां सागोरनि जिउनि गोमोथाव खौरांफोरखौ खोनासंनानै आंबो मनथ्रि साहेबखौ जाहोनो मै बेदर नायगिरनो फैनाय बाश्राखौ बावलांदों ।

'नोंसोर मै गावनो फैदों ?'

गावनि जिउनि बाश्राफोरखौ बुंखानानै बिथां सागोरा सोंदों आंनियाव ।

आं नाथाय अब्लाहालागैबो बिथांनि जिउनि बाश्राफोरखौनो सानगासिनो दं ।

आंखौ जेबो फिनखौ होथ 'यि नुनानै बिथाड बाश्रा जुरिफिनदों:

'मानसिखौ गिनानै सिबाइ मि-जुनारफोरा हरनि खोमसियाव आदार नायगिरबायनो ऑंखारो - गियान गोनां मानसिया जैरै अनागारिफोरनिफ्राय आनज्रायनानै थायो । दिनैनि सोरां मुलुगाव गियान गोनां मानसिहा जेबो बेसेन गैलिया । अलसिया, अगेन, उदायबाडै आरो दुथांफोरनि सुथुरसो बिसोर । बिसोर दिनै गावसोरखौ रैखा खालामनो सोरांनि आन्दोआव थाखोमाबायनांदों । नाथाय मि-जुनारफोरा जैरै खोमसियाव थाखोमाबायब्लाबो बारग'आ, गियान गोनां मानसिफोराबो दुथां अनागारिफोरनि दुम-दाखालनिफ्राय बारग'वा ।'

जानोबो हागौ । बाश्राफोरखौ आं एफा गोथौयै सानबोआखौ ।

'गेलेमनाय बिफांखौ दानफायनो मोजां मोननाया मानसिनि आंगो हुदाखा । जों मिथिगौ, बे बहुमाव जा दड- मि-जुनार, हाग्रा-बंग्रा, अन्थाइ-सोर गासिबो सानसे समाव जोबलांगोन । ओरैनो जोबखागोन जेब्ला जों जायै - लोडै बाहायगारनाया मानिथो दाय ?' - बुंदों आं ।

बिथां सागोरा हमनो हाखाबाय - आं सासे निहिलिस्ट । आंनि सानसिया बिथांनिजों गोरुबा ।

अखाफोरा हाबबाय । आंनि फलान लोगोफोरा सिखारबाय । हाग्रायाव हाबहैनांसिगौ ।

बुंबावनो सानदोंमोन आं :

'थानानै थानो थाखाय जानाय, बे सानसिया दानि सोदोमसियाव उदायलिया । जानो थाखाय थानानै थानाय, बेसो मानसिनि थांखि जानांसिगौ । आथिखालनि मुलुगाव थानानै थानो एबा उनजोलैखौ फोथानानै लाखिनो नाजानायाव जेबो मुनाफा गैलिया । बोरै गावल' मोनजानो बेनि राहाखौल' मानसिया साननांसिगौ ।'

नाथाय आं बुंनायनि सिगाडवनो बिथां सागोरा फल्लिदं सेयारनिफ्राय दुबफुं सिखारनानै गाव थाथ'फैनाय सुइट फार्से थाबायलांदों ।

फरेस्ट बांल 'निफ्राय ऑंखारनानै जों बारा गोजान थानाडसै । सार्च लाइटनि

सोरांजों चमसि र 'ड सा सा किल 'मिटारबासो थांनायनि उनाव लामा सेरावनो जो मासे फान्थि मोसौ मै मोनदों ।

मैखौ जिपाव दैखानानै लानानै जों जेब्ला फरेस्ट बांल ' मोनफैफिनो अब्ला सोरांबाय ।

बिगुर खुनाय आरो गोदानाय समाव बिथां सागोरनि बाथ्राफोरा आंनि गोसोआव सौग्राउ सौसि खालामफैदों ।

'बर 'फोरा गुबुनारिफोरजों बिगुर खुजागासिनो दं । राजखान्थियारि गोहोनि फलानफोरा बर 'फोरनि सिमां-हाबिलासखौ फैमाल खालामनो, बर 'फोरनि रैखानि थावनि ट्राइबेल बेल्ट आरो ब्लकफ्राव गुबुनारिफोरखौ गिर्जाब गिर्जाब सोफैदों । बेनि जाउनाव बर 'फोरा - जाम्बा लल्ला बर 'फोरा - बोथिसे ओंखाम, खावख्लाबसे सि, गरदसे दैनि थाखाय हालाय-हाफाय जानानै मिमां, सिलाफोथार, दैयां, रेंमायाव जालाय-जाखाय जाहैनांदों ।'

बिगुर खुखानानै थुब्ला हाखावब्ला जों मैनि गोबों ख 'आव मै फिसा गोलेँ मोनदों । अब्ला आं सानदों :

आथिखालानि राजखान्थिनि दैदेनगिरिफोरनि इनाय हाबिलासनि खाजा जानानै बेसेबांदि इयुन जोलैया बिथ 'राइयावनो रहायलांदो ! जेरैथिंबो गुन जानाय बर ' हारिनि इयुन जोलैनि इयुनखौ लाथिख 'नि बेहेराव गब्रायहोहैनो थाखाय गोहो खांखुवा, रां खांखुवा, गावजों गाव मोखाडव हाबु सारफावलायग्रा दुगामारा माखासे दैदेनगिरिफोरा बेसेबांदि फाव फान्दायगासिनो दं !

बेफोर सोलिबाय थागोन । दान्थाल मैदेर मानैया फरेस्ट बांल 'नि लांगोनाखौ गाखेब-गुखेब खालामफैनानै सिगि फैसेयावबो जों जेरै मोसौ मै गावथारनानै लायदों बर 'फोरनि गोदान जोलैया जेसेबांखि दाखाया खुद्रिया दैदेनगिरिफोरनि आखल आखुवा इसेबो सोलायनाय नड ।

बाथ्राफोरा गासिबो बिथां सागोरनि । आं रिजायदोंल ' ।

बर ' इन्टेलकसुवेलफोरनि सायाव मोथो रागा दं बिथांहा । बर ' इन्टेलकसुवेल-फोरा राजखान्थिनि जुवारिफोरजों बायलाय-फानलाय खालामामोनब्ला बर 'फोरनि राइजोआ दासिमहालागै जानानै फैसिगौमोन ।

सिबाइ सागोर ! अनखानो गोसो जायो बिथांबादि मानसिखौ ।

सासे ब्रिलियेट एम.बि.बि.एस. । खाबु मोननायमोनब्ला, रां खाउरिनि मदद मोननायमोनब्ला बुहुमनि देरसिन गिथावसिन बेरामखौ सोखानायनिबो मुलि

दिहुनननो हानायबादि मेलेम दंमोन बिथांहा ।

खाबु एबा रां मददनि बाथ्राखौ गोजानाव दोनबाव । गाव हारिनि उदै थोबसेनि बोथिसे आदारनि राहाखौनो बिथांनि एम.बि.बि.एस. दिग्रिया होनो हायाखै ।

बिमा बिफानि गरन्थ गैयि हाग्रानि फिसा सागोरा मावरिया आस्रमाव देरदों-लाउदों । मेट्रिक आनजाद होखानायनि उनाव आस्रमनिफ्राय ओंखारनानै बोरै बोरै एम.बि.बि.एस दिग्रि लालायहैनो हाखो बेखौ बुडैयानो गाहामसै । मानोना, बुडोब्ला रावहाबो फोथायनो गोसो जानाय नड ।

दिग्रि मोननायनि बोसोरथाम उनावहालागैबो साखिनि राहा जायाखै सागोरहा । आखाइयाव मुलिनि थफ्ला फिसा लानानै गंगार हाजोआव थांदों - थांनानै थानायनि राहा नायगिरनो हाग्रानि फिसा सागोरा गावनि गुमुर-सिनायथिखौ होखोमानो हाग्रामाखौनो आंगो खुलि होननानै गोबाखबहैदों ।

थांदों थाबायनानै । बै खेबसे लामा गोजान थाबायदावनायनि मदिराया दासिमबो सागोरखौ नागाराखै ।

लादाखनि हेमिस गुम्फानिफ्राय तिब्वतनि सांग्रिलासिम थाबायनानै गिदिंजोबबाय सागोरा । दासिम्बो गारि-मथर गाखोफेरा । बेनिखुइबो गोमोथावसिन बाथ्राया जादों-सागोरा ओंखाम-ओंखि जानो नागारनाया बोसोर नैजिबा जाबाय । सांग्रिलानि सासे लामानिफ्राय रोखोमसे बिफानि उदिस मोनदों बिथाड । बे बिफानि रोदायानो बिथांनि आदार ।

बेसेबां गोबावसै गावनि जोनोम थावनि, गाव देरनाय-लाउनाय आस्रम, गाव फरायनाय समाव लोगो मोननाय मानसिफोरखौ नागारलानानै हाजो हाजो गिदिंबायहैनाया ।

गोसोनि थिननायाव ओंखारबोदोंमोन - हायेनाव । देउस्रिनि फरेस्ट बांल 'आव आं लोगो मोनखालि बिथाड गंगार हाजोआव थांफिननोसो आगान सुरदोंमोन । मेंनाय मोननायखाय जिरायथ 'नोसो बांल 'आव हाबदोंमोन ।

बेदर गोदाखानानै नआव फैफिननो जिपाव गाखोनायनि सिगां बिथां सागोरखौ लोगो हमनानै रायदावसालानो होननानै आं बिथां थाथ 'नाय सुइटाव हाबहैदोंमोन । नाथाय सुइट सिडव आं बांल 'नि इनचार्ज बिट अफिसारखौसो लोगो मोनहैदों । आंनि मुंखौ सौनानै बिट अफिसार बिथाड आंनो लेफापा गांसे होदों । बुंदों:

'बे सुइटाव मैया हराव थानाय गंगार हौवाया दहाय फुडव सखिदारनि आखाइयाव बेखौ होलांदों ।'

लेफाफा सिंनि बाश्राफोरखौ फोरमायखानानै गोमजोर गिलिर गाराडै बुदोंमोन सागोरा:

‘दा अवे इन हुइच इउ लिभ - नोंसोर दा जेरै थानानै दं बे आदब हुदाखौ नागाराब्ला, गारनो नायाजाब्ला बबेबा मोनसे समाव बर’ हारिया जारिभिनजों बावजागोन।’

बे बाश्राखौनो आवरायफिननानै लाइजामाव लिरलांदों सागोरा - आथिखालनि जोंनि जिउ जानायनि आखु-आदबखौ सोलायनायनि बाश्रा।

न मोनफैजासे बिथां सागोरनि फंथामसोल’ बाश्राया आंखौ जिप सायाव सुखुवा-बुखुवा मोनहोदों। मोनसे समाव मै बेदरखौ सिन्थाइनो हाग्रायाम ज्राउ गारहरनो गोसो जादों।

सानथामसो गिदिंनानैनो सागोरा हमनो हादों - गावनि सोलेरनि आंगो बर’हारिया फसिलनि सायावसो गसंनानै दंसै। इन्तेलेकसुवेलफोरा रुलिं पार्तिनि स्केपग ‘ट राजखान्थि आरो समाजनि दैदेनगिरिफोरा एस्केपिस्ट। सानसे समनि बर’फोरनि रैखानि थावनि बेल्ट आरो ब्लकफोराव बर’फोरनो दा बाडइ बिसान, रां-खाउरिनि नाथार नास्थिया गुबुनारिनि आखाइयाव। बर’फोरनि सोरगिदिं जेरैथिंबो बेसेबा बेसेबा बेमा, हाथासि लाथिख’।

नआव सफैनानै आं सानदों - बिथां सागोरनि सिगाडव आं बुंनाय बाश्राया नंखाय जामाराखै।

चामसियाव थांब्ला बिथांखौ रयेल पेग ‘दायाव जों लोगो मोनहैगोन। माब्लाबाफोर कालचारेल रिभ’लिउसन खालामोब्ला गावनो खौरां हरनो बिथाड गावनि लाइजामाव बुंलांदों। बिथांखौ लोगो मोनब्ला आं नाथाय औरैबादिसो बुंनो सानगासिनो दं :

बर’फोरा दा खोमसियाव दं - बिसोरनो सोरां नांगौ। बर’फोरनि इनाय अनागारा बाराद्राय जाबाय - बिसोर उद्रायनांसिगौ। बर’फोरहा जिउनि हाबिलास गैलिया बिसोर थैनांसिगौ।

सोदोबथि :

बुथुवा - बुश्रा, बौयि
मोस्लेर सोरां - नुफा माफा सोरां
नांला-बसा - आबां जाबां

दुनश्राइ दुनसि - गोसोनि रागा जोंनायजों
निहिलिस्ट - निराशाबादी
इन्तेलेकसुवेल - सोलोजों जाग्रा मानसि, मेलेमजिबि
एसकेपिष्ट-खारखोमाग्रा, एरायग्रा
स्केपग ‘ट -मालायनि दायाव साजामोनग्रा
दुम दाखाल - दावराव

सोंथि :

1. लिरगिरिया सुंद’ सल’नि मुंखौ मानो ‘बुथुवा थुंग्रि’ दोनदों ?
2. बुथुवा थुंग्रिया मा ? बेनि गुमुर ओंथिया (Symbolism) मा ?
3. सागरा सोर ? बेनि गोसोनि साननाया मा ?
4. ‘बुथुवा थुंग्रि’ सुंद’ सल’नि गेजेराव बर’फोरनि मा बाश्रा बेरखांदों ?
5. ‘बुथुवा थुंग्रि’ सुंद’ सल’आव नुजानाय सुबुं माहारिनि सावगारिखौ फोरमायना लिर।

फरा गियान :

बुथुवा थुंग्रिया जेब्लाबो बौआ। मेलेम गैयि सुबुडबो बेबादिनो जेरावबो उदाया, जेखौबो सानस’हाया। बेनिखायनो गुबुनजों थगाय-थसि खालामजायो, सुसिजायो, नारसेबजायो। बर’फोरनि हालदाबो दा बेबादि थासारियाव दं। गुबुन हारिया जेरै थोनो एरैनो मावग्रा बादि मालायनि बिथोन बादियै दाबो सोलिग्रा आखुखौ गारनो हायाखिसै।

बुथुवा थुंग्रि सल’आव सागोर मुंनि सासे गोजौ थाखोनि एम बि बि एस दिग्री मोननाय बर’संग्राया बेफोरबादि खोथाखौनो बे सल’नि लिरगिरिनि सिगाडव फोरमायथिदों। गुबुन हारिनि गोजौ गिदिर मावख ‘गिरिफोरनि गोसोनि लुबैनायफोरखौ सुफुंनो थाखाय बर’फोरनि साफा सानै गावखौ गिदिर सानग्रा दुगामारा सुबुंफोराबो बेबादिनो मालाय हारिनि आथिं सिडव थानोबो लाजिया जाबाय। मावग्राफोरा बर’ आरो जाग्राफोरा गुबुन हारि। बेबादिनो थगाय-थसि खालामजानाय बर’ हारिनि हालदा। मालायनिफ्राय खारखोमाना थानो लुबैनाय, हा-हु नबथिफोरखौबो मालायनो हगारना होनाय। नाथाय बेफोरबादि हुदाखौ नागाराब्ला बर’फोरनि इयुना मा जाहैगोन बेखौनो फोरमायथिनो सागोरा बुंदों -

“नोंसोर दा जैरे थानानै दं (दा अवे इन हुइस इउ लिभ) बे आदब हुदाखौ नागाराब्ला, गारनो नाजायाब्ला बबेबा मोनसे समाव बर'हारिया जारिभिनजों बावजागोन। बर'हारिया जेनोबा गोथै बेगेंनि सायावनो गसंनानै दं।” सल'गिरियाबो बुंदों – बर'फोरा दा खोमसियाव दं। बिसोरनो सोरां नांगौ। बर'फोरहा जिउनि हाबिलास गैलिया – बिसोर थैनांसिगौ। बर'आरो ट्राइबेल हारिनि थाखाय जुनियायै लाखिनाय बेल्ट –ब्लकफोरा जोबलांबाय, बर'फोर थानाय जायगानि हाग्रामा सम्पदफोरखौबो मालाया फोजोबस्रांनो हमबाय। बेनिखायनो हुसियार जायाब्ला जाखालिया।

फोरोंगिरिनिसिमः

‘बुथुवा थुंग्रि’ सुंद’ सल’आ मा सारिनि सल’, बुथुवा थुंग्रिजों माखौ मानि थाखाय रुजुदों : बेफोरनि बागै फोरोंगिरिया फरायसाफोरनो सावरायलु महरै फोरमायगोन। सल’नि गेजेरजों बेरखांनाय रुजुथाइयारि महर-सावगारिनि सोमोन्दै फोरमायनायनि लोगोसे लिरगिरिनि सानस्रि एबा सानथौवा मा बादि बेरखांदों बेखौ थुनलाइयारि नोजौरै नायबिजिरगोन। जायनि हेफाजाबाव फरासाफोरा गोलैयै हमदां हायो एबा मिथिनो हानाय जायो। आथिखाल समनि थाखाय बे सल’नि गोनांथिया बेसेबां दड’ होन्ना सानो बेनि सोमोन्दै गुवारै फोरमायना होगोन।

बर'राव-थुनलाइयाव प्रम'द चन्द्र ब्रह्मनि बिहोमा

मंगलसिं हाज'वारी

फराखौ सायख'नायनि थांखि :

बर'राव-थुनलाइनि सासे मेंनोरोडि सिबिगिरि मावथिमोन हायेननि सुफिन बिमुं होजानाय प्रम'द चन्द्र ब्रह्मआ। बिथानि सोमोन्दै गोदान जोलैया मिथिनाया गाहाम। बे थांखियै बे रायथाइखौ सायख'नाय जादों। अरायजिउ गावखौ बर'हारिनि थुनलाइ सोरजिनायाव बाउलांनाय प्रम'द चन्द्र ब्रह्मआ उन जिउआव गावनि थाखाय जेबो दोनलांनो हायाखिसै।

लिरगिरिनि सिनायथि :

आथिखालनि सिरां जिलायाव थानाय बर'बाजारनि शिलबारि ओनसोलाव मंगलसिं हाज'वारीया जोनोम मोनो 1954 मायथाइयाव। शिलबारि गुदि फरायसालियाव फरायजेननानै बिजनी कलेजनिफ्राय बि.ए. आनजाद उथ्रियो। बेनि उनाव गुवाहाटी मुलुग सोल्लोसालिनिफ्राय असमीया आयदायाव एम.ए. आनजाद उथ्रियो। बिथाड बि.टि. डिग्रीबो लायो। बर'धोरुम हारिमु आयदायाव डक्टरेट डिग्री लानो हायो। आथिखालाव बिथाड क'कराझार बि.एड. कलेजनि गोरायुं जानानै आजिरा लाबाय। थुनलाइगिरि हाज'वारीनि बिहोमाफोरा जादों – सिमान (1980), सोमदोन (1984), जावलिया देवान, जोहोलाव दैमालु, हारिमु आरो सोदोमस्रि, जथाय बिदां, रायथाइ बिदां, बाथौ आरज, जिउनि खन्थाइ-मेथाइ, मोकथां जिउनि बिसम्बि आरो आर'ज, फैसालिनि आन्दो सल', रायथाइ आरो सानस्रि, मदाराम ब्रह्मनि जिउ खौरां।

बिथाड 2005 मायथाइयाव 'मोकथां जिउनि बिसम्बि आरो आर'ज' खन्थाइ बिजाबनि थाखाय साहित्य अकाडेमिनिफ्राय (बर'थुनलाइयाव गिबिसिन साहित्य अकाडेमि बान्था) थुनलाइयारि बान्था मोनदों।

गुबै फरा :

बर' राव-थुनलाइखौ फोथानाय, जौगाहोनाय आरो फेहेरनायाव गोसो मोदोम आरो जिउ बाउना जायफोर हाबा मावना बिहोमा होलांबाय बिसोरनि गेजेराव रूसारि प्रम'द चन्द्र ब्रह्मआबो सासे। इं 1916 मायथाइयाव क'कराझार जिल्लानि गदामारि गामियाव प्रम'द चन्द्र ब्रह्मआ जोनोम मोनो। इं 1933 मायथाइयाव मेट्रिक आनजादआव उश्रिना रंपुर कलेजाव फराय हैयो। इं 1937 मायथाइयाव कटन कलेजनिफ्राय बि.ए. आनजादाव उश्रिना 1941 मायथाइयाव कलिकता बुहुम फरायसालिनिफ्राय असमीया आयदायाव एम.ए. डिग्री लायो। बै मायथाइयावनो बिथाड ए.सि.एस. थाखोखौ उश्रिना आसाम सरकारनि सिडव गोजौ थाखोनि साखि (एस.डि.सि.) मावओ। एस.डि.सि. साखि मावनायनि मुखुब समनि गेजेरावबो बिथाड बर'राव थुनलाइनि खौरां बुथुमनाय, गामि-गामि गिदिंन बर'सल'बाथा, खुगान्थि, हारिमु, सोदोमस्रिनि गोजाम आरो गोदान आयदा बुथुमनायाव नांथाबोमोन। बे साखियावनो प्रम'द चन्द्र ब्रह्मआ प्रम'सन गैयाजासे मावना इं 1971 मायथाइयाव जिरायनाय लायो आरो बर' राव थुनलाइ, माहारि सोदोमस्रि हारिमु फोथाराव मेडाजासे हाबा मावना इं 1992 मायथाइनि 8 जानुवारीयाव क'कराझार रुपनाथ ब्रह्म चिभिल हस्पितालाव जिउ नागारना थाडे।

सुजुगिरि प्रम'द चन्द्र ब्रह्म :

फरायसा समनिफ्रायनो प्रम'द चन्द्र ब्रह्मआ थुनलाइ सिबिना 'अलंबार', हाथखि-हाला आरो सानसिरि आरो मुसिरि' लाइसिखौ सुजुदोमोन आरो बेफोरनि गेजेरजो गुबुन बर' फरायसाफोरनोबो थुनलाइ सिबिनो खाबु होदोमोन। फरायसा सम जोबनायनि उनाव बिथाड जेब्ला सरकारनि साखि मावओ, अब्लाबो बिथाड गावनि बर' बिमानि राव थुनलाइखौ सिबिनो नागाराखैमोन आरो बोराइ बैसोआवबो थैजासिम सिबिलांबाय। बै समावनो सरकारनि साखियाव थानानैबो बायदि जैना-जैसिनि गेजेरावबो बिथाड गोजाम गोदान मेथाइ आरो खन्थाइफोरखौ बुथुमना 'सनाखि बिजाब' मुनि गांसे खन्थाइ बिजाब दिहुनदोमोन। बेफोरनि अनगायैबो, इंराजी, असमीया, बांला रावनि गुबुन गुबुन लाइसियाव बिथाड लिरबिदां फोसावना थुनलाइ सिबियोमोन।

'अलंबार', 'हाथखि-हाला', 'सनाखि बिजाब' सुजुना प्रम'द चन्द्र ब्रह्मआ ईशान चन्द्र मुसाहारी, द्वारेन्द्र नाथ बसुमतारी, काली कुमार लाहारी, मनिराम समफ्रामहारी, जयभद्र हागजेर मोनबादि खन्थाइगिरि, रायथाइगिरि, सल'गिरि,

फावथाइगिरि आरो बिजिरगिरि जोनोम जानायनि खाबु होदोमोन।

प्रम'द चन्द्र ब्रह्मआ अलंबार मुगानि गावनो सासे अलंबार महरै लिरगिरिफोरखौ दैदेनोमोन आरो थुलुंगा होयोमोन। बिथानि रायथाइ, खन्थाइ, सल', बिजिरनाय लिरबिदांनि अनगायैबो सुजुगिरि महरै दोल गोनां आरो बानगोना रावजो सम सम सुजुथाइ थाफादेरोमोन। बै समनि बर' लेखा गोरों गैयि, हांखो सिनायनो रोडै-बर' माहारिनि अलखर समावबो प्रम'द चन्द्र ब्रह्मआ गुबुन गुबुन लाइसि सुजुना गुबुन गुबुन राफोद आरो मुंदांखा लिरगिरि दाना दोनलांनो हानाया थारैनो गोमोथाव आरो सानब्लाबो सान्नो हाथावयैबादि। मोजोमसे बर' लेखा गोरोंखौ लाफाना लेखा रोडै, फरा रोडै-बर' फिसाफोरनि गेजेराव बेफोर बिजाबखौ फानना फोसावनायाबो एसेल' गोब्राब हाबा नडामोन। बेनि बागै सेबखांनो दिहुनफिन्नाय 'हाथखि-हाला' नि 'फनैसो' आव एरै फोरमायदों - "बेसेबा गोबाव गोबाव सुनि गोनां जोमै दख्लायाव गोमाना दंमोन बिजाब 'हाथखि-हाला'या। सुजुग्रा जानानैबो बेनि महर मोखांखौ गावनो नुफेरैबादि जाना दंसैमोन। सोरबाफोर नायनो बिब्लानो 'गंगुबैल' होननानै सिं सिं दुखु आरो लाजि मोननानै थानांदोमोन। गासै 1000 कपि साफायदोंमोन। बेखौनो फानजोबनो हायाखै। दैबाय दैबाय फाननो हैब्लाबो 'बिक्रियानो जाथाराखै' होनजादोंमोन। जि माखासे फानदों बिबो 'बाकीसो'नो। रोखा-रोखा, रग'-रग' फानदोंब्ला थाखा-फैसाखौनो समजाय फैयाखै। बेनि अनगायैबो, गोबांथार कपियानो दाब-दाब जायगायाव गोमादों आरो सेवगारदों। बिबादि अलखर समनि उनाव माखासे गोसो गुदुं गोसो गोथौ साखि मावग्रा बर' सेंग्राफोरा 'हाथखि-हाला'खौ दिहुनफिननो लामा लानाया जोबोर गेदेर जोबोर दुखुनि बाथा जादों।" गोजौआव रायखांनय थुनलाइयारि हाबाफोरनि अनगायैबो प्रम'द चन्द्र ब्रह्मनि बर' राव-थुनलाइ सिबिनायनि देरसिन नेशोन आरो बिदिन्थिया जाबाय आथिखाल बर' थुनलाइ आफादा सुजुना दिहुननो लानाय "बर' सोदोब बिहुं।" बे हाबायाव बिथाड गोबां बोसोर नांथावना थानानै रोजा रोजा सोदोबजो आबुं थानाय "बर' सोदोब बिहुं" सुजुना सेबखांनय महर मोनै समावनो इं 1992 मायथाइनि 8 जानुवारी खालाराव रुपनाथ ब्रह्म चिभिल हस्पितालाव जिउ नागारनानै थाडे।

खन्थाइगिरि प्रम'द चन्द्र ब्रह्म :

लाइसि सुजुनायनि अनगायैबो प्रम'द चन्द्र ब्रह्मआ खन्थाइ, रायथाइ गोबां लिरना बर' राव थुनलाइनि बाखियाव गोबां भान्दारि होलांबाय। बिथाड माखासे

र 'मान्दिक खन्थाइ लिरदोंमोनब्लाबो मिष्टिक खन्थाइनि थाखायनो बांसिन गोसो खांजागोन । अलंबार मुगानि दैदेनगिरि आरो देरसिन खन्थाइगिरिया जादों प्रम 'द चन्द्र ब्रह्म । बिथानि रेबगननिफ्राय जोनोम मोननाय खन्थाइफोरा जादों -1.हायेननि सुफिन, 2. दै-बाज्रुम, 3. दाहा, 4. दानसोरां हराव, 5. खामाइनि बिसार, 6. बायदि बरन, 7. कबि नों, 8. अरन, 9. उनदाहा, 10. आरज हाला, 11. सोर हमनायनि, 12. आनान ग 'साइ, 13. बिदा-फंबाय, 14. जिउनि बेलासेयाव, 15. मुं बे मुं गोनां, 16. थैनाय, 17. गामि गोदान, 18. रथ 'लै रथ', 19. संसारनि अन्नाय, 20. हांसो बिलाथि, 21. बिमा-फिसा, 22. हालुवा, 23. सिब्राइ, सामथांसि, 24. मोसा अरनाय नुनानै ।

गोथों सानसि, गोदे देंखो, गोरोबनाय खबाम बाहायनाय, बेफोरनो जाबाय खन्थाइगिरि प्रम 'द चन्द्र ब्रह्मनि खन्थाइफोरनि मुंख 'जाथाव आखुथाइ । बबेबा खन्थाइयाव गोसो बायनायनि देंखो रिखांदोब्लाबो, बिथानि मिष्टिक खन्थाइफोराव मिजिंथिया गोखों । "हायेननि सुफिन" खन्थाइयाव खन्थाइगिरिया मिथिंगानि बायदिसिनि मुवा-बेसादफोरनि सावगारि एरखांदों आरो मिथिस्ताबा जासेनो गोसोआव रिखांदों-

“गुवार हायेन स्रां गेबें

सोरगिदिं गोगोम हाजो थरथाम,

जानो हागौ- रजिनि सुफिना बिखायाव

रिखांफैयो

जानो हागौ रजिनि साइखड गोर्बोआव गोग्लैफैयो ।”

बेरा फासैथिं बिथानि खन्थाइयाव बेरखांदों दाहा, हाथास मोन्नाय-मोनैनि “जिउनि बेलासेयाव सुख 'हायै बिदै ग 'ला ।” जिउनि बेलासे खन्थाइयाव खन्थाइगिरिया गावनि जिउनि जोबथा समाव बिथानि सिगांनि मावबोनाय गासै बाथ्रा आरो जाथाइफोरखौ हारसिं हामा दैमा गोसोखांन हारसिं मोनदों । मानोना बिथानि लोगोफोरा गासैबो बिथांखौ हारसिं नागारलांजोबबाय । बिथाड जिउनि बेलासे समावसो हमनो हाबायदि सेंग्रा समखौ जानला-मानला मावना ओरैनो हगारहरदोंमोन । बेनिखायनो दिनै बिथाड गावनि हिसाबखौ लाथिख 'मोनना दुखु खालमदों । जैरै -

“हांखौबा आरो बेसे फोथायबावो

समखिनानै हरखाब नायनायसै जेब्ला

जिउनि हिसाब बिजाबाव नुनायसै हाबाब खाफाल
फोनख 'थायाव सुख 'हायै बिदै गला ।”

बिबिदो “उनदाहा” खन्थाइयाव खन्थाइगिरिया गावनि लोगो-लेवाफोरा
नागारलांनायाव उनदाहा खालामना एरै बुंदों-

“गावनाव जानाय नंलिया, गावनिनो दाय जाबाय,
जुगुमनाय जानाय नंलिया, गावनिनो दाय जाबाय ।”

“दाहा” खन्थाइयाव खन्थाइगिरि प्रम 'द चन्द्र ब्रह्मआ बिथानि जिउ खांनायनि
मुखुब समाव लोंनाय - जानायाव सम बारग 'लांहोबाय नाथाय ग 'साइनो एसेबो
गाव लुबैनायबादि मुवा बाउहरनो रोडखिसै । बेनिखायनो दाहा खालामना एरै
फोरमायदों -

“आय', जागासे थेवबो

ग 'साइनो बाउनो रोंमोनथाय !

आय', सानगासे थेवबो

ग 'साइनाव थांहरमोनथाय !

उनाव गोलाउ जिउवा ओरैनो सुंनायफ्राव सुंलांनायखौ नुना खन्थाइगिरिया
एरै फोरमायदों.....

“उह ! सैमा अमाबादि ओरैनो जिउवा,

थांनोसै होमब्ला फेलें जाथारनोसै ?”

खन्थाइगिरिनि नोजोराव थैनाया सुबुं जिउवाव सानसे नड सानसे फैगोनखि
फैगोन । थामहिनबा रावबो थैनायनिफ्राय बारग 'नो हाया । बेयो थार सैथो । बे थार
सैथोखौ खन्थाइगिरिया एरै फोरमायदों-

“जायखौ जेबोलाबो बावनो बयबो नाजादों,

नुसे नुनानैनो जायखौ हेय 'सानदों,

सानसे बियो फैगोन फैगोन ।” (थैनाय)

खन्थाइगिरि प्रम 'द चन्द्र ब्रह्मनि खन्थाइयाव आनान ग 'साइनि सायाव गोथौ
फोरमायनाय सानसिनाय रोखायै बेरखांदों । बेनिखायनो आनान ग 'साइया जेरावखि
थाखोमाना थाया मानो खन्थाइगिरिया अराय सम खुलुमनो गोसोखांन मिजिं
थिदों-

“बबाव थाखोमाखो बबाव गोमाखो बियो दंखो ?

जेरावनो थांथों जैरैनो खांथों गोसोखां

गुगुरुब गुगुरुब बिखौ खुलुमो आं

बांबा खांबा दानसोरां दिनै हराव ।” (दानसोरां हराव)

जापाननि खन्थाइगिरि इयेन न'वसिनि साया लाना लिरनाय प्रम'द चन्द्र ब्रह्मनि 'अरण' खन्थाइयाव सोरजिगिरिजों सोरजिजानाय बिफां लाइफाडाबो आंगो जिउमाखौ संना मोनना थारैनो गोजोन्नाय मोनदों आरो सोरजिनायखौ नुना बाखनायदों ।

मुनुसमैया आरो बिफां-लाइफां गावजों गाव मानिलायना, अनलायना आरो खुलुमलायना थाना थानांगौ बे नोजोरै खन्थाइगिरिया एरै फोरमायदों-

“हाबाब माबादि आखाइनि सोरजि नों

अरण ऐ आंखौ खुलुमहर !

आंबो नोंखौ खुलुमहरो..... ।”

नोजोर होनो गोनांदि 'हालुवा', 'बिदा-फंबाय', 'बिमा-फिसा', आरो दै बाज्रुम' खन्थाइयाव खन्थाइगिरिया गावखौ 'प्रमथेश' मुडैसो सिनायथि होदों । जानो हांगौ मुडा बिथांनि लाखोमानाय मुंमोन ।

प्रम'द चन्द्र ब्रह्मआ मिष्टिक, र'मान्टिक, मिथिंगा सिबियारि, इसोर अनसाइगिरि आरो जिउनि मोनदांथिखौ गोथौ सानस्रिजों बिजिर बिजिर बेखवगिरि सासे गोजौ थाखोनि खन्थाइगिरिमोन ।

रायथाइगिरि प्रम'द चन्द्र ब्रह्म :

प्रम'द चन्द्र ब्रह्मआ गुबैयै खन्थाइगिरिमोनब्लाबो, सासे राफोद रायथाइगिरिबोमोन । बिथाडनो बर' रायथाइनि महर, सानस्रि आरो, मुस्रिनि बिथाखौ गोरायै दाना होगोदोंमोन । 'अलंबार', 'हाथखिर्-हाला', 'सानस्रि आरो मुस्रि' लाइसियाव बिथांनि बायदिसिना रायथाइफोरा ओंखारलाडो । बिथांनि सुजुनाय 'हाथखिर् हाला'याव 'बैसागु', 'फागिल' आरो 'जोहोलाव दैमालु' रायथाइया ओंखारदोंमोन । बै समनि बर' माहारिनि गेजेराव बैसागु खुंनायखौ नुना रायथाइगिरिया दुखु फोरमायथिना एरै लिरदों- 'गैमारलिया होमब्ला बर'नियाव बैसागुवा ? अनसुलि माइनाव, बिलाइजों बारजों, जोमैजों जरनाजों, बारलां गावथां, सावनारजि, अराय-सिखोला, सुग्लायहोग्रा बार, बिखौ दानिया बर'आ गोसो थोलिया ! जिउवानो गैलिया जायहा जिउवा बिहा माबोरै मोसाखांनो । बेखायनो गैलिया जायहा माबोरै बियो मोजां मोन्नो ? मैयासो संनायखांन्थि गैजारोडै गोसोहोफिनरोडै, गोथाडै-गोरान पुर्णिमा, अमाबस्या, महालया, लक्षिफुजाफोरजौल'

जाहाबजासै बर' फिसाफोर ! बेनि सायाव खैदां-खैफोद, उखैनाय-गांनायफोरबादि मेगन गोसा मोदाइया साबफानानै स'नायाव सुवासो जालायलांबाय ।'

नाथाय जों बुंनो नाडो, हे बर' फिसा, बैसागुखौ दानागार नोडो । हाजार खैफोद-हाजार आफोदब्लाबो दाबाव नोडो । साथलु हाथाइ, खाम जानायनि, दाम जानायनि, खेराइ बाथौ, दमासि, बिलागुर सावनानै आनान ग'साइनावबो बिनाय माखौ गारा जाखो नोंलाय ? आरो बेखौबो गारनो नंदों ? नंगौ उदैयानो गुदि, नाथाय बेखौबो "Man does not live by bread alone." मानसिया जानानैल' थानो हाया, नंगौ गाज्रिखौ गारनांगौ, मोजांखौ लानांगौ । नाथाय ओजोंबो नायहर, गोजाम मानि, दंनायमानि; गाज्रि जाजोबनो हाया, ज्राब गारजानायब्लाबो मोजां लानाय नड ।”

थाथारनांगौ, जातिनि रंजानाया, थाथारनांगौ । गोसोनि बिमायनो दाहा, देहानि बिमायनो लाथा (जरता) , बोसोरनि दामाल बोसोरावनो रंजानाय बाजानायाव गोजावलाडो । जाथिनि फुंखा बादि जाखांनाय गोसोखौ लिरथेनाया हामदों दाबि जोंनिया ?'

'जोहोलाव दैमालु' रायथाइनि फोरमाय जेन्नायाव रायथाइगिरिया एरै फोरमायदों-मालाय हारिनि गेदेर उन्दै गासिबो खौराडनो लेखायाव सिखारजोब्बाय बर'निल'नो हेव जाबाय ? हे बर' फिसा ! मिथिखा नोंसोर दे मालाया बर'नि मोजांखौ लिरनो दाउगां दैया जोंनो दैयाबोला ।' उनाव थुलुंगा होना लिरगिरिया एरै थास्लिमदों- 'मिथिखा नोंबो जाति, नोंबो मानसि, नोंबो इसोरनि फिसा, नोंहाबो जेबो दंमोन । नै दिनै सासेनि बर' फिसानि खौरांखौ दिन्थिनाय जाबाय नायदों नोंसोर, बोरैनि बारा बोरै थांदोंमोन, बोरै थांदों आरो बोरै थांगोन ।'

बर' हारिनि जिउयै-माहामै मोजां मोनग्रा रायथाइगिरि प्रम'द चन्द्र ब्रह्मआ जोहोलाव दैमालुनि दुखु गोनां जिउ जारिमिनखौ सल'नि रावजों फोरमायलांनो थैनोसै समाव जोहोलाव दैमालुवा गोसोजों साव होलांदों होन्ना एरै फोरमायदों- 'बर'फोर, जैरैनो सासे देरनायखौ नायनो हाया जादों, जैरै राइजो फिसा बेंग्रा जोहोलावनि जिउखौ सानस'नो हाया नोंसोर फोजोबलांबाय, बिखौ एसेबो सिनायनो, मानि रोडाखिसै, ओरैनो रावबो जोहोलाव गेदेर नोंसोरनि गेजेराव दा उजिथों ! गावजों गावनो मेगन सानानै मानिलायाजानानै नोंसोर गोदोलांगोन, हाजो खर'आव खारखो खारखो थैजोबनांगोन । हालिया, हालिया थांनोसै ! थांनोसै आं हिरिम्बा राइजो, बर' बिमा आंनि ।'

खाथिनि बाथिया स्रोब गोमोरनायसै - जोहोलावनि जिउवाबो बिरगनायसै ।
‘जोहोलाव दैमालु’ मुनि सल’, बे रायथाइनि सानसि, सोदोब आरो खबाम
बाहायनायनि आद ‘बा खन्थाइबादि ।

‘फाग्लि’ सल ‘आव मपासानि सल ‘नि साया लाना लिरनाय अनजालु गोराया
आह ‘म बर ‘नि गेजेराव जानायनि समनि दोसे गिलु-बालु सल’ खिन्थादों । सासे
खाफाल दाखुरि खर’ गाज्रि बर’ हिन्जावा डिमापुर नोगोराव बिफा थैजानाय
आरो दाननैसो उनाव फिसाइ आरो उजिगोदान गथ’ थैजानाय आरो आह ‘म सारा
गाहाइनि मेगन थिफायसन्नायाव अरणबारियाव गोथां गोथिडेनो बैसाडव सांगिना
दोनहैनाय आरो बेवनो थैनांनय बाथ्राया रोखा जाबाय जेब्ला बिजों गावथार
जानाय दाउमासार दाउखौ आबुडै लायनो थाखाय हाखराव ओंखारलाडे ।
सल ‘गिरिनि रावयै- ‘ओंखारमारैनो नुयोदि बियो गोगलैना दं थाखि-थुखि मोनसे
मानसि बेगें साखाथियावसो ! दहमैनो बिखायाव जोबोद घात मोन्नायबादि बे
फाग्लिनि खौराड थाब गोसोआव फैखांगारनायसै । एसेयावनो थाबनो आंनाव
स्रां जाजोबनायसै । जेखौबो बुजिना मोनजोबनायसै आडे । बिसोर बिखौ बे
निजोम हाग्रानि गुसुनि गेजेरावनो इनाय बानाय बिसोनायैनो गारलांगारदों - बेयाव
फैनानैबो बियो खमायाखै आसनखौ - गाराखै गावनि सर ‘खौ । आरनथाइनि
बैसिरोजा गुरै खफा बेवनो गावखौ रियै थियै खोमोरलांदों बियो थानो थाखाय
खनसेबो नाजायाखै ।’

बेनिफ्राय लखाया बिनि बेदर जालांबाय, दाउफोरा बिनि थसखनि खुनखाइखौ
लांनानै बासा बोहैबाय आरो आं उनहालागै खाफाल दाखुरिनि बेगें राइखिनि
बिबान बान्नाय जाबाय । आं बेखौल ‘नो आर ‘ज गाबो - ‘हे आनान ग ‘साइ !
जोंनि गथ’ गथायफोरा जेब्लाबो फिन दावहाखौ दानुथोंसै, दानुथोंसै ।’

बे दिन्थिनिफ्राय लिरगिरिया सल’ खिन्थग्रानि रावजों दावहानि गिलु-बालु
थासारिखौ सानहरना बागदावखांदों आरो आनान ग ‘साइनाव बिब्दि दावहानि
मोगा-मोगि जानाड बेनि थाखाय आर ‘ज गाबदों ।

रायथाइगिरि प्रम ‘द चन्द्र ब्रह्मनि सोरबा रायथाइया रुंसारि रनेन्द्र नारायण
बसुमतारी सुजुनाय दिहुनगानै (बोसोर गासे) ‘अखाफोर’ लाइसियाव ओंखारो ।
(काति दान 1361 बां) ‘सोरबा’ रायथाइया थारैनो सानसिजों आबुं जानाय गोजौ
थाखोनि रायथाइ । अबंलाउरि एबा आनान ग ‘साइनि संदान्ना नै रायथाइगिरिया
गोथौ सानथौनि बाथ्रा फोरमायदों । आनान ग ‘साइ एबा दोहोरोमनि बाथ्राया गुबुन

गुबुन रावनि थुनलाइफोरावबो गोबां गोसारना दं । नाथाय थुनलाइनि गाब होनानै
सन्दे-बन्दे बेबादि इसोरनि बाथ्रा फोरमायनाया थारैनो गुबुन गुबुन रावनि
थुनलाइफोरावबो मोन्नो थाड ! रायथाइखौ बबेबा थख’ आरो लारियै फरायनाय
लोगो लोगो रायथाइ खन्थाइ ‘Poem in Prose’ नि सानसि मोन्दां मोनो । बेनिखायनो
बे रायथाइखौ इनायनो खहाब गोनां मोनो । ‘सोरबा ‘खौ नागिरनायाव लिरगिरिया
माबा थरसे सना फिथर गोमानायखौ नागिरनायाव खना-खनला फिद फिद
नागिरनायबादि नागिरदों- बोदला बोदला नागरिदों । बेनिखायनो बे रायथाइया
जोबोरैनो ओंथि गोनां जादों । रायथाइगिरिनि रावयै ‘संसारव जोंनि खाथिसिन
आंगोसिना सोर ? बिमा आरो बेखायनो मानसि दावदायफोरा बुंलांदोंनि आइ
होन्ना नै फुजिब्ला इसोरा थाब साफिफैयो ।’ आरोबाव ‘बेनिखायनो इसोरानो
जोंनि बिमा-बिफा ।’

‘फोर्ला बाबाजि आरो बर ‘नि हारिमु’ रायथाइयाबो बेसेबा बेसेन गोनां रायथाइ ।
बेयाव ब्रह्म दोहोरोमनि गुरु कालीचरण ब्रह्म आरो बिथानिनो आगदा आखान्थि
फोर्ला बाबाजिनि गेजेराव बर’ हारिमुनि गोनां आयदा खाम-सिफुं-जथाखौ लाना
बाथ्रा दानथेलायनाय आरो उनाव फोर्ला बाबाजिनि बानबुंथाइयायो गनायजानायनि
बाथ्राखौ रायखांन एरै लिरदों - ‘समनि एरायनो हायै फाखनाव गोगलैना नै
बर ‘फोरा बाथौ दोहोरोमखौ गारदों एबा गारनो गोनां जादों । बर ‘नि ब्रह्म, खिष्टान,
शङ्करी, सतसंगआरि दोहोरोम गुरुफोरा बुंदों जोबोर गोजाम सुरि हारिमुखौ ब्राब
गारगार, सिफुंखौ गाखुब, खाम-सेरजाआरिखौ दानखुबनानै बन जनगार । खोथामते
खामानियाबो जानो हमदोंमोन । शरनीया, खिष्टान, लोगोसे ब्रह्मफोराबो गारजोबनो
लामा लाथारबायमोन । मिथिं दावथिंफोरावबो थांखि दिखांबायानोमोन दि दाखोर
दाला बादि हारिमुखौ गारगारनांगौ । बे लामायाव दावगादोंमोन बर ‘नि गुरुदेब मेच
गान्धी कालीचरण सिनथाय । बिथाड सानदोंमोन बर ‘नि हारिमु माने बाथौ दोहोरोम
आरो बाथौ दोहोरोमानो जादों बर ‘नि नोरखोफुरि । गुरुदेबनि गोखों बोसोनखौ
दानगारनो हायैनि थाखाय सारा ब्रह्म दोहोरोमारिया बर’ हारिमुनि जोलैखौनो
एवस्रांनो लामा लाथारबायमोन । एसेयावनो बर ‘नि सासे दोहोरोम जोहोलाव खा
खा दाद गसंथेनायसै । बिथाड बुंनायसै बेबादि लामाया थिख जानाय नडा ।
बर ‘नि हारिमुवा गोमब्ला बर’ हारिया गोमालांगोन, दालाइ बिलाइखौ थाख्नायब्ला
बिफाडनो थैथारनायबादि । ब्रह्म दोहोरोमखौथ’ बुंनो नालिया । बर ‘नि हारिमुवा
थानांगोन अब्लासो बर’ हारियाबो थांगोन । ब्रह्म दोहोरोमाबो थांन थागोन ।

सोर्गोफुरिनि बाजोनाबादि गोदै, गोथौ सेरजा, सिफुं, खाम-जथाखौ मोजां मोनरोडै ब्रह्म दोहोरोमा माबादि दोहोरोमलाय ? ब्रह्म दोहोरोमा बेसे गोबावनि ? बर 'नि हारिमुवा अराय समनि । जेसेखि बुंथौ ब्रह्म दोहोरोमा गोदान गुबुनसोमोन । सोरमोन बे दोहोरोम जोहोलावालाय ? बिथाडनोमोन बयनिबो मानिनां फुजिनां दोहोरोम गुरु सादोनगिरि मेफाल ब्रह्मचारी फोर्ला बाबाजि ।'

बे रायथाइनिफ्राय फोर्ला बाबाजिनि बर 'हारिमुनि गोनां आयदा खाम-सिफुं जथा, सेर्जाखौ लाखिनायनि गोनांथि आरो रायथाइगिरिनि बाथौ दोहोरोम फासैं अनसायनाय आरो फोथायनाया रोखा बेरखांदौं । जोबनायाव लिरगिरिया एरै फोरमायदौं - हाजारसेया नाजावदो आफा गुरु जौनि । नाथाय दुखु थाबाय जौंहा, नौंथाड सासे जात 'शिश्य' गालांनाय जायाखिसै गोरोनथि जाबाय, जौंहाबो, जौं सासेबो नौंथांनि लामाखौ हमदांनो हायाखिसै ।'

थुनलाइगिरि प्रम 'द चन्द्र ब्रह्मआ जिउवै माहामै, गोसो-गोर्बोथै बर 'फिसामोन । बायदिसिना जेंना-जेंगोना आरो सुबुं बिसाननि सोमोन्दै लाइसियाव असमीया रावजौंबो लिरदौंमोन । बिथांनि जिउनि गुबै आरो गाहाइ थांखिया बर 'राव थुनलाइ सिबिनाय आरो जौगाहोनाय । बर 'सानि गुलाय-गुजाय आबु गोयै राइजो जानायखौ नुना बिथांनि गोसोआ गाबखाडोमोन आरो बायदि लाइसियाव सम सम फोसावनायनि थांखि लाना लिरना फोसावोमोन । बर 'बाथा फाव, बाथा फान्दाय, बाथा खोन्दोब, खुगान्थि, गहेना, जायगालायै जायगा खबाम गोरोब होनाय, गोथौ सानस्रि बाहायनाया बिथांनि लिरनायनि आखुथाइमोन ।

गुबुन राव थुनलाइयाव प्रम 'द चन्द्र ब्रह्मनि बिहोमा:

बर 'राव-थुनलाइयाव सुख 'हायै बिहोमा होनायनि अनगायैबो प्रम 'द चन्द्र ब्रह्मआ असमीया रावनि 'बागदेबी स्त्री स्त्री सरस्वती' मुनि गांसे बिजाब लिरना दिहुनदौंमोन । बे बिजाबाव बिथांनि गोथौ सानस्रि आरो सानथौ लोर्गोसे रौंग 'थिनि बाथाया आबुडै बेरखांदौं । असमीया रावाव बिथांहा राफोद आखाइ दंमोन बे बाथाया रोखायै बेरखांदौं ।

गेजेर गेजेर संस्कृत स्ल 'क, इराजी 'क'टेचन' होना बान गोनां, बिदै गोनां आरो मेहेर गोनां राव बाहायना लिरनाय बे बिजाबा प्रम 'द चन्द्र ब्रह्मनि गांसे बेसेन बह्म बिजाब आरो असमीया थुनलाइ फोथाराव सुख 'हायै गेदेर भान्दारि । बे बिजाबाव बिथाड गावखौनो ब्राह्मन्य स्त्री प्रम 'द चन्द्र ब्रह्म मुंहै सिनायथि होदौं आरो फोसावदौं । बै समाव असमीया लिरगिरि, गोरौं गोरा, सानसुमै आरो

ब्रह्म समाजाव मोनसे जांखिथाइ आरो सोमखिथाइ लाबोदौंमोन आरो सोरखारनि बाजो मेगन नोजोराव गोर्ग्लैदोमोन । गुबुन गुबुन मुंदांखा लिरगिरि, बिजिरगिरि आरो सानथौगिरि जेरै - ऋषि अरबिन्द, रामकृष्ण परमहंस, श्रीमन्त शंकरदेब मोनबादिनि बेसेन गोसा बिजिरनाय, फोरमायनाय सानस्रि आरो सानथौनि बाथाफोरखौ रायखांनायनि अनगायैबो 'बृहद्देवता', 'ब्रह्म बैवर्त्तपुरान', 'मा', 'बामन पुरान', 'ग्रिक पुरान' बिजाबाव बिमा 'सरस्वती'खौ मा मा मुं होना फोरमायदौं आरो बिथांनि गोहोमा माबादि बेफोरखौ लिरगिरिया रोखा रोखा आरो बान गोनां रावजौं बेखेवना होलांदौं । नोजोर होनो गोनांदि बे बिजाबावनो प्रम 'द चन्द्रआ बिमा सरस्वतीनि गुबुन मुड स्त्री होनना एरै फोरमायदौं - 'सरस्वतीर अइन एटा नाम स्त्री 'शतपथ ब्राह्मनत कैसे 'स्त्री बैस्वरं' (11/4/2/10) आकौ एटाइत (11/4/3/2) क 'वा हैसे 'स्त्रीदेवीर प्रजापतिर मुखर परा उतपन्न ।' 'असमर बर' जातीय महिला सकलर माजत स्त्री शब्द अति प्रिय । तेवँल 'कर नामर पाछत प्राये श्री शब्द जुक्त थाके । जेने स 'नाश्री, रुपाश्री, गयश्री, जलश्री, माइदांश्री, फुलश्री, सुखीस्त्री इत्यादि ।

इयात श्री शब्द अकल लक्षी आरु लाबन्यभावक बुज 'वा नाइ, गुणवतीत्व भाव' इयात समाइ आछे । अइन कथात बर 'भाषार श्री शब्द द्वारा लक्षी आरु सरस्वती दुय 'क' बुजाय । रुपबती आरु गुणबती छवालीक बर्णना कर 'ते साधारणते क 'वा हय 'रुपे लक्षी गुने सरस्वती ।' आकौ, बर 'जातिर श्री बा माइनाव देवी शिबर भार्या हे । मुठ कथात श्री शब्दे गुणवती देवी सरस्वतीर पक्षेहे बेछि प्रय 'ज्य ।' 'बागेश्वरी श्री श्री सरस्वती' बिजाबनिफ्रायनो प्रम 'द चन्द्र ब्रह्मनि असमीया, बांला, इराजी, संस्कृत, हिन्दी आरो गुबुन गुबुन राव-थुनलाइनि सायाव गोथौ फरायनाय, रौंगथि आरो दखल थानायखौ मिथिनो हायो । बेफोर रावनि गेजेरजौं बिथाड गावनि सानस्रि, सानबोलाउरि, रौंगथि आरो दखल थानायखौ मिथिनो हायो । बेफोर रावनि गेजेरजौं बिथाड गावनि सानस्रि, सानबोलाउरि, रौंगथि आरो सानथौखौ रग 'रग' आरो गियालना रावजौं रोखायै बिजिरना दिन्थिदौं । बेफोरनि अनगायैबो दिमासा, ककबरक, स 'न'वाल, मिसिं, गार', राभा बायदि रावनि सायावबो बिथाड दखल दंमोन । बिथां सुजुनाय 'बर' राव बिहुं 'आव बेफोर रावारि सोदोबफोरखौ खाबु लाना बाहायनो नाजादौंमोन । प्रम 'द चन्द्र ब्रह्माआ राभा, गार', लालुं, स 'न'वाल, दिमासा, ककबरक, मिसिं रावारि मानसिफोरजौं सोमोन्दो लाखिना बै जायगायाव दावबायना बिथांमोननि रावनि

सोदोब, बाश्रा फाव, सल 'बाथा, खुगान्थि बायदिखौ बुथुमना लिरना दोनोमोन आरो फोसावदोमोन। बुंनो थाडोब्ला बेफोर हाबायाव नांथाबना, गावखौ बावना बिथाड बोथोर रंग 'लांहोबाय। बर' रावजों बैफोर रावनि सोमोन्दो, गोरोंबथा, फाराग एबा जानगारनि बागै बिजिरना, संदानना, बुरखांना होलांनो नाजादोंमोन। प्रम 'द चन्द्र ब्रह्मआ थारैनो गुबुन गुबुन रावनि सायाव आखाइ गोनां राफोद राव फुण्डित (Linguist) मोन। फोथायथाव सुलुंनिफ्राय मिथिनाय बादिब्ला बिथाड बर 'नि हारिमु, राव, थुनलाइ, सोदोमस्रि, माहारिखान्थि, आसारखान्थि, दोरोहोमखान्थि, बर 'नि जिउखांनाय राहा बायदि गोनां आयदाखौ लाना बर 'नि जारिमिन सुजुनो आखाइयाव लादोंमोन। नाथाय बे हाबाया जाफुंनयनि सिगाडवनो प्रम 'द चन्द्र ब्रह्मआ बे बुहुमनिफ्राय आनज्रायलांबाय। बर' राव थुनलाइनि फोथाराव 'बर 'नि जारिमिनखौ सोराडव लाबोनो हायोब्ला बेसेन गोसा बिहोमा होनाय जागोन।

थुनलाइगिरि प्रम 'द चन्द्र ब्रह्मआ बिथानि बिजाब 'बागेश्वरी श्री श्री सरस्वती' आव 'नुजानायनि लामायाव लिरगिरिनि उननि बिजाब' होनना गाहायाव होनाय बिजाबफोरखौ रायखांदों।

- (1) बर' भाषार तुलनामुलक अभिधान (प्राय चलिछ हेजार शब्देरे सैते)।
- (2) अभक्तर दृष्टित श्रीमन्त शंकर।
- (3) श्याम आरु श्यामा (कृष्ण आरु कालीर तुलनामुलक तत्व आल 'चना)।
- (4) बर' सभ्यतार इतिहास।
- (5) इन्द्रकान्ति (गल्प)।
- (6) देबदेबी (हिन्दुर प्रधान देवता बिष्णु, शिव आरु शक्तिर आल 'चना)।
- (7) सत आरु शक्ति (बिश्व जगत आरु तात निहित शक्तिर बैज्ञानिक आरु दार्शनिक आल 'चना)।

गोजौआव मख 'नाय बिजाबफोरनि मादाव सेथि बिजाब 'बर' भाषार तुलनामुलक अभिधान (प्राय चलिछ हेजार शब्दर सैते)' नि अनगायै गुबुन माखासे बिजाबा साफायनाय महाराव गैया। बेफोरनि मादाव 'अभक्तर दृष्टित श्रीमन्त शंकर' बिजाबाबो दावराव दावसिनि जाहोनाव गोमादों होन्ना मोनसे सुलुड बुडे। गुबुन माखासे बिजाबफोरखौ साफायना सोरांनि लामायाव लाबोयोब्ला प्रम 'द चन्द्र ब्रह्मनि बायदि बिथिनि रोंगथि, सानस्रि, बिबुंथि फोरोंनाय आरो बोसोनफोरखौ मिथिनो हागोन। बेफोर बिजाबखौ सेबखांना फरायग्रा राइजो-

राजानो होनो हायोब्ला गुबुन रावारि फरायग्राफाबो बिथानि सान्नाय-हनाय, मावनाय-दांनाय, सानथौ आरो गेदेमाथिनि बाश्राखौ मिथिनो हागोन।

बर 'राव-थुनलाइ मुलुगाव अलंबार मुगानि दैदेनगिरि प्रम 'द चन्द्र ब्रह्मनि मुड अराय अलंबार महरै जोंबाय थागोन होनना जों मिजिं थिनो हायो।

फरागियान :

प्रम 'द चन्द्र ब्रह्मआ बर' राव थुनलाइनि सासे गोगेम मावथि। बिथाड गोबां बिजाब-लाइसि सुजुदोंमोन। अलंबार (1938), हाथखि-हाला (1940), सानस्रि आरो मुस्रि, सनाखि बिजाब सुजुनायनि अनगायैबो बिथानि गिदिरसिन बिहोमाया जाबाय " 'बर'-इंराजी- हिन्दी मोनथाम रावारि सोदोब बिहुं"।

बिथाड सासे गोथौ सिरिनि मिष्टिक खन्थाइगिरिबोमोन। बिथानि खन्थाइफोराव मिथिगानि समायना महरनि गेजेरजों सोरजिगिरिखौ संनो नाजानाय नुनो मोनो।

खन्थाइनि अनगायैबो बिथाड रायथाइ लिरगिरि महरैबो गावनि सिनायथिखौ होलांनो हादों। 'जोहोलाव दैमालु', 'सोरबा', 'बैसागु' बायदि रायथाइया बेनि रोखा नेरसोन।

बिथाड असमीया रावावबो थुनलाइ सोरजिना गावनि रोंसारथिखौ मिथिहोनो हादों।

सोंथि :

- (1) रायथाइगिरि महरै प्रम 'द चन्द्र ब्रह्मआ माबादि बिहोमा होलांदों ?
- (2) प्रम 'द चन्द्र ब्रह्मआ मा मा बिजाब एबा लाइसि सुजुदोंमोन ?
- (3) खन्थाइगिरि प्रम 'द चन्द्र ब्रह्मनि खन्थाइयाव मा सानस्रि बेरखांदों ?
- (4) प्रम 'द चन्द्र ब्रह्मआ बर' हारिनि राव आरो थुनलाइनि फोथाराव माबादि बिहोमा होलांदों ?

फोरोंगिरिनिमिम :

फोरोंगिरिफोरा प्रम 'द चन्द्र ब्रह्मनि समरासमरि लिरगिरिफोरनि सोमोन्दै सावरायनांगोन। बर' हारिनि थाखाय गावनि अराय जिउ मा मा मावनानै गावखौ नागारसारलांखो बेनि सोमोन्दै गुवारै फरायसाफोरजों सावरायफानाया गाहाम जागोन।

जारिमिन आरो बर' माहारि

ड° कामेश्वर ब्रह्म

फराखौ सायख'नायनि थांखि :

लिरनाय जारिमिन गैयाब्ला मोनफा हारि एबा माहारिनि गोदोनि (दिनाव) राइजो खुंनायनि सोमोन्दै मिथिनाया गोब्राब जानानै फैयो। जारिमिनआ मोनफा हारि एबा माहारिनि दलिल होन्ना बुंजायो। बर'आ मोनसे जारिमिन गैयायै हारि। गोजाम बिजाबफोराव मुंख'नाय बाश्ना-खोथाफोरखौ सं दान्नानै बर'नि जारिमिननि बागै मिथिनायनि फुंखा मोन्नो हायो। बेफोरनि बागै फरायसाफोरनो मिथिहोनो थाखाय ड° कामेश्वर ब्रह्मनि "जारिमिन आरो बर' माहारि" मुंनि रायथाइखौ सायख'नाय जादों।

लिरगिरिनि सिनायथि :

1941 मायथाइयाव ग'साइगावनि भुमका मुंनि गामियाव ड° कामेश्वर ब्रह्मआ जोनोम मोनो। बिनि बिफानि मुड ग'बिन्द ब्रह्म आरो बिमानि मुड जग ब्रह्म।

गामिनि गुदि फरायसालियाव फरायजेनानै 1968 मायथाइयाव गुवाहाटी मुलुग सोल्लोसालिनिफ्राय जारिमिन आयदायाव एम.ए. आनजादखौ उश्रियो।

गुबुन गुबुन जायगायाव गुबुन गुबुन साखि मावनायनि अनगायैबो ग'साइगाव कलेजनि गोरायुं जानानै आजिरा लायो।

2008 मायथाइनिफ्राय 2016 मायथाइसिम बिथाड बर' थुनलाइ आफादनि आफादगिरिनि मासि लादोंमोन।

बिथानि थुनलाइ सोरजिफोरा जादों -1. भारतनि जारिमिन (1974), 2. ग'साइगाव चहरर चमु इतिवृत्त (1983), 3. गुरुदेव श्रीमन्त कालीचरण ब्रह्म, (1986), 4. बर' हारिमु (1988), 5. Aspects of Social Customs of the Bodos, 6. A Study in Cultural Heritage of the Bodos, 7. A Study of Socio-Religious Beliefs, Practices and Ceremonies of the Bodos.

गुबै फरा :

सानसुमाफोरा जारिमिननि सोमोन्दै बुंदों - "History repeats itself" आरो बे बाश्नाखौनो Critics एबा समाल' चकफोराबो गनायना लाबोदों। माहारिनि थाखाय जारिमिना जोबोर गोनांथाखा। मानोना जारिमिनानो माहारिनि फान्जामुथि। माहारिया गोथाडै'दड' ना गैया बेखौ जारिमिनानो दिन्थिना होयो।

बुंनो थांब्ला बर' माहारिहा लिरनाय जारिमिन गैयाया। आसाम हादाबाव (गोदोनि कामरुप राइजो फाथिनानै बर' राजाफोरा राइजो खुंलांदोंब्लाबो जारिमिन लिरनो रोडमोन एबा लिरनांगौ होनना सानाखैमोन। गुबुन माहारिनि लिरगिरिफोरा एफा एनै लिरनानै गालांदोंब्लाबो बर' माहारिनि सोमोन्दै गुदिनिफ्राय फारि लानानै लिरनाय गैया।

बर' माहारिनि गेजेराव गोदो जारिमिन लिरनो रोडमोन। कामरुप हादाबनि गिबिसिन असुर राजा (बर' राजा?) 'महीरङ्ग'आ थारैनो बर' नंगौना नडामोन बेखौ लानानै जारिमिनगिरिफोरनि गेजेराव बादा-बादि जालायनायानो जोबनो थाड। बेनि उनाव हटक असुर, सम्बार असुर, रत्नासुर, घटक असुर मुंनि अनार्ज्य राजाफोरा बे कामरुप हादाबावनो राइजो खुंलांदोंमोन। बिसोरो थारैनो बर'मोन होनना गोथोडैनो बुंनो हाया।

'कालिका पुराण' आरो 'महाभारत'आव 'किरात' एबा 'म्लेच्छ' होन्नाय सुबुंफोरानो गोदोनि कामरुप हादाबाव राइजो खुंदोंमोन होनना लिरनाय दड। आर्ज्य फोलेरनि लिरगिरिफोरा बर' माहारिनि मानसिफोरखौनो 'म्लेच्छ' एबा 'किरात' होनना लिरलांदों जानो हागौ। अनार्ज्यफोरखौ बिसोरो 'दानब' एबा 'असुर' होननाबो लिरदों। बिदिब्ला बै मुगानि राजा महाराजाफोरा बर' माहारि मङ्ग'लिय फोलेरनिमोन होनना थारैनो बुंनो हायो। मानोना, जारिमिन मुगानि सिगां (Pre-Historic) मुगानि राइजो खुंनानै देरहासार जानाय राजाफोरानो अनार्ज्य (Non-Aryan) फोलेरनि मानसिफोरमोन। बे बाश्नाया सा-सानजा भारतनि दाब-दाब जायगायाव थानाय गेदेर उन्दै राइजोफोरनि सायाव बांसिन गोरोबो।

मुंदांखा जारिमिनगिरि Sir Edward Gait साहेबा बिथानि History of Assam जारिमिन बिजाबाव लिरलांदों दि कामरुप हादाबनि गिबिसिन राजानि मुड महीरङ्ग दानबमोन। बियो किरात् फोलेरनि मानसिमोन। बे किरात फोलेरनि मानसिफोरनि आखल-आखुआ आथिखालनि बर' कछारी मङ्ग'लिय' फोलेरनि सुबुंफोरनि आखल आखुजों थारैनो गोरोबोमोन।

महाभारत बिजाबाव 'भगदत्त' मुंनि सासेबाव गोहोगोरा राजानि बाश्रा दड' । बे बाश्राखौ जारिमिनगिरिफोरा नड बुंनो हायाखै दि बेबो सासे 'किरात' फोलेरनि मानसिमोन । मानोना बिन बिफा 'नरक' (नार्खो ?) राजायाबो 'असुर' फोलेरनि मानसिमोन । बे भगदत्त राजाया कुरुक्षेत्र दावहामायाव 'किरात' आरो 'चीना' दावहारुफोरजो लोगो जानानै 'दुर्ज्यधन' खौ हेफाजाब हैदोमोन । 'नरक' एबा 'नार्खो' नि बंशआ मामोन बेखौ बुंनांगौआ गोब्राब होनना Gait साहेबा लिरलांदों । नाथाय बिसोरखौ 'असुर' होनना बुंदों जेब्ला 'नरक' एबा 'भगदत्त' नि फोलेरनि मानसिफोर आर्ज्य फोलेरनि नडमोन । बिसोरो Non-Aryan फोलेरनि मानसिमोन, बे बाश्राया थार । बिब्दिनो बर' माहारिनि मानसिफोरा जारिमिननि बिलाइयाव थादोंब्लाबो नंगौ नडनि गेजेराव थानांगौ जानानै फैबाय । मानोना बर' माहारिहा जारिमिन गैया ।

जारिमिन गैजारोडैबे 'म्लेच्छ', 'असुर', 'दानब', 'किरात' – बर' माहारिया हिन्दु दोहोरोमनि फाखनाव गोग्लैनानै, आर्ज्य-बामोनफोरनि मेगनाव थिफुद्ला गोहोखौ दिन्थिनानै, गुबुन गुबुन मुं लानानै जारिमिनाव नुजाबोदों । 'नरक', 'भगदत्त' मोननि उनाव आरोबाव सासे बर' माहारिनि गोहो बोलो गोरा सुबुड आर्ज्यनि मुं लानानै कामरुप हादाबाव राइजो खुंदोंमोन । बिथानि मुड जाबाय 'शालस्तम्भ' । 'म्लेच्छ' हारिनि सासे गोहो गोरा राजखुंगुरमोन होनना जारिमिनगिरि Gait साहेबा लिरलांदों । नाथाय बिथाड बे 'शालस्तम्भ' राजखुंगुरा दि बर' मोन बे बाश्राखौ थारै लिरलांनो हायाखै ।

दोहोरोमनि गोजाम बिजाब आरो जारिमिन बिजाबफोरखौ बोद्लाबा नुनो मोनो, बर' माहारिनि गोबां राजाफोरानो गुबुन आर्ज्य मुं लानानै बायदि बायदि मुगायाव नुजाथिदोंमोन । बे आसाम एबा कामरुप हादाबावनो गोबां गोहोगोरा बर' सुबुंफोरा आर्ज फोलेरनि मुं लानानै राइजो खुंलांदों । नरक असुरनिनो बंशनि सासे गोहो गोरा जोहोलावा 'ब्रह्मपाल' मुं लानानै 1000 A.D. मायथाइयाव राइजो खुंदोंमोन । बिथानि बंशआ 'असुर बंश' । बिदिब्ला बे 'पाल बंश' आबो दि बर' हारिमोन बेखौ नड बुंथावा ।

थामजि जौथाइनि सासे गोहोगोरा दावहारु गाहाइ जोहोलाव 'बाथु' नि मुंखौबो गुबुन गुबुन हारिनि जारिमिनगिरिया 'पृथु' एबा 'बार्थु' मुं होनानै लिरलांदों । मोजाडै बिजिरना नायब्ला बुंनो हायो दि बे 'बार्थु' एबा 'पृथु' आ आर्ज्य फोलेरनि नडमोन । बियो सासे बर' एबा मेछ हारिनि गोहोगोरा दावहारु

जोहोलावमोन । बिथाडनो थामजि जौथाइयाव तार्किसनि हादोर गाग्लोबग्रा बकटियार खिलजिजो दावहायाव मोगा-मोगि जानानै होबथादोंमोन ।

1228 मायथाइनि उनाव थाइ आह 'म फोलेरनि माहारिफोरा बे कामरुप हादाबाव हाबफैनानै उत्खारि जानानै बर' राजाफोरखौ आदब खायादाजो फेजेननानै राइजोखौ सेनानै लाफैयो । सियान (चतुर) आह 'मफोरा हारिनि जारिमिनखौ लिरना दोनदोंमोन । बे समाव बिसोरो बर' माहारिनि सोमोन्दै एफा एनै लिरलांफादोंमोन । नाथाय बिसोर लिरनाय जारिमिनाव बर' माहारिनि सोमोन्दै बेखेवना गुवारै लिरनाय गैया । गावसोरजो दावहायाव जेननानै खारखोमानाय, गोजाम राजथावनिखौ नागारनानै दाबसे गोदान जायगायाव राजथावनि फाथिहैनय, राइजो गोमा जानाय बायदि बायदिखौल' लिरलांदों । बर' राजाफोरा गावसोरनि सोमोन्दै एबा माहारिनि सोमोन्दै लिरथुमना दोननांगौनि सोमोन्दै साननो रोडामोन । बिब्दिनो बर' नि जारिमिना गोमाबोदों । दाबो बर' आ बेनिफ्राय बारग' नो हायाखै ।

सोदोबथि :

सानसुमा – सानसुमै, सानखांनो हाग्रा
समाल 'चक – सावरायगिरि
चतुर – सोलोगोरों
जारिमिनगिरि – जारिमिन लिरगिरि

सोंथि :

1. सानसुमाफोरा जारिमिननि सोमोन्दै मा बुंदों ?
2. 'कालिका पुराण' आरो 'महाभारत' आव मुंख 'नाय सुबुंफोरा मा फोलेरनि ?
3. अनार्जफोरखौ गोदो मा होन्ना लिरलांदोंमोन ?
4. बर' माहारिया मा सुबुंफोलेरनि ?
5. मुंदांखा जारिमिनगिरि Sir Edward Gait साहेबा लिरनाय बिजाबनि मुड मा ?
6. कामरुप हादाबनि गिबिसिन राजानि मुड मा ?
7. 'महाभारत' आव मुंख 'नाय गोहो गोरा राजानि मुड मा ?
8. दोहोरोमनि गोजाम बिजाब आरो जारिमिन बिजाबफोराव मुंख 'नाय बर' राजाफोरनि बागै सुंद 'थै फोरमाय ।

9. थामजि जौथाइनि सासे गोहो गोरा दावहारु गाहाइ जोहोलावा सोर ? बिथानि सोमोन्दै सुंथाबै लिर ।
10. माबे मायथाइनि उनाव मा फोलेरनि माहारिफ्रा कामरुपाव हाबफैनानै बर' राजाफोरखौ फेजेनफैदोंमोन ?
11. बेखेवथि लिर:
 - (क) बुंनो थांब्ला बर' माहारिहा जारिमिन गैजाया ।
 - (ख) महाभारत बिजाबाव 'भगदत्त' मुंनि सासेबाव गोहो गोरा राजानि बाश्रा दड' ।
 - (ग) दोहोरोमनि गोजाम बिजाब आरो जारिमिन बिजाबफोरखौ बोदलाबा नुनो मोनो, - बर' माहारिनि गोबां राजाफोरानो गुबुन आर्च्य मुं लानानै बायदि बायदि मुगायाव नुजाथिदोंमोन ।
 - (घ) सियान चतुर आह 'मफोरा हारिनि जारिमिनखौ लिरना दोनदोंमोन ।

फरा गियान :

माहारिनि थाखाय जारिमिना जोबोर गोनांथार । जारिमिनानो माहारिनि फान्जामुथि । माहारिया गोथाडैथानाय थायैखौ जारिमिना दिन्थिना होयो । बर' माहारिहा जारिमिन गैयाब्लाबो गोदो बर' राजाफोरा गुबुन गुबुन मुडैःराइजो खुंनायनि सोमोन्दै 'कालिका पुराण', 'महाभारत' बादि गोजाम बिजाबफोरनिफ्राय मिथिना मोनो । थाइ आह 'म फोलेरनि माहारिफ्रा मा बादि बर' राजाफोरखौ फेजेनफैनानै राइजो खुंफैदोंमोन बे बाश्राफोरनि बागैबो मिथिनो हानायनि फुंखा मोनो ।

फोरोंगिरिनिसिम:

बर' माहारिनि जारिमिनारि बाश्रा बेरखांनाय गोजाम बिजाबफोरखौ मुंख 'नानै फोरोंगिरिया फरायसाफोरनो गियान होनांगोन । लोगोसे बर' माहारिनि थानाय-थैनाय, जौगानाय आरो इयुनाव दावखोलानाय बिथिडव जारिमिना बेसेबां गोनांथि दड' बेनि बागैबो फरायसाफोरनो गियान होनो हानांगोन । मोनफा माहारिनि सिनायथिया जारिमिननि गेजेरजों मा बादि बेरखाडे बेनि बागैबो सावरायनायनि आदबयै फरायसाफोरनो गियान होनो नाजानाया गाहाम ।

काछारनि हरिटिकर

म 'हिनी म 'हन ब्रह्म

फराखौ सायख 'नायनि थांखि :

बर 'फोरा राव, थुनलाइ, हारिमु, राइजो आरो राजागोनां गोजाम आरो गेदेमा हारि । नाथाय बिसोरहा बेफोरनि लिरनाय नेरसोन गैया । बेनिखायनो जारिमिनबो गैया । गुबुन हारिनि लिरगिरिफोरा एफा लिरब्लाबो बेफोर आबुं आरो थार नड । बेनिखायनो बर' राइजो आरो राजाफोरनि सिनायथि मोननो गोब्राब । बेबादि जारिमिना जायगा मोनै जाथाइफोरनि मोनसेयानो बे रायथाइनि नेरसोन । बेखौनो फोरमायथिनो फराखौ सायख 'नाय जादों ।

लिरगिरिनि सिनायथि :

1918 मायथाइयाव क 'कराझार खाथिनि आदाबारि गामियाव म 'हिनी म 'हन ब्रह्मआ जोनोम मोनो । बि.ए. आनजादखौ उथिनानै बिथाड क 'कराझार बिद्यापीठ गोजौ फरायसालियाव फोरोंगिरि मावजेनो आरो बेनिफ्रायनो गाहाइ फोरोंगिरि हिसाबै जिरोन लायो । बिथाड ए.पि.एस.सि. निबो सोद्रोमा सायख 'जादोंमोन । चीन-तिब्बती रावफोलेरनि बर' रावनि सायाव बिबुंथिहोनो बिथाड चीन हादर दावबायहैदोंमोन आरो बे दावबायनायनि सायाव गांसे बिजाब लिरदों । बिथाड 'नायक' लाइसिखौ सुजुदोंमोन । बिथाड गाहाइयै रायथाइगिरि । गुवाहाटी मुलुग सोल्लोंसालिनि नायबिजिरगिरि हिसाबै मोननाय गियानजों बिथाडा 1960 मायथाइयाव Bodo Folk Songs आरो Bodo Folk Tales बिजाब गांनै सुजुना दिहुनो । 'बर' भाषा शिक्षा' बिजाबखौ बिथाड लिरदों । बिथाड बर', इराजी आरो असमीयाव लिरबिदां लिरु । बिथाड सासे सिगां सिरिनि रायथाइगिरि । 2000 मायथाइयाव बिथाड रुंसारि जायो ।

गुबै फरा :

काछार जिलानि जारिमिनानो बर' हारिनि दुखु गोनां जारिमिन । बे जायगानिफ्रायनो जिगुजौ मायथाइयाव (19 जौथाइ) बर' राजा आरो राइजो

जोबलांदोंमोन । काछारनि बर' राजाफोरनि आमोलाव दावहा नांनाय, जेननाय देरहानाय आरो राजखान्थिनि सोमोन्दै जारिभिनाव बेखेवनाय जादोंब्लाबो उन्दै उनला गासैबो गोनां जाथाइफोरखौ मखनाय जायाखै । बेनिखायनो बे सुंद' रायथाइयाव जारिभिनाव जायगा मोनै जाथाइफोरखौ रायथिनो नाजानाय जादों ।

आसाम हादराव बर' राजाफोरा ग्रोम ग्रोमै राइजो खुंनाय समाव आह 'मफोरा सानजा हादर ब्रह्मदेश आरो थाइलेण्डनिफ्राय पाटकाइ हाजोनि लामाजों दैहुं, दै बांनि सेर सेर फैनानै आसामाव हाबफैयो । बिसोरनि सिगां खासि जयन्तीया आरो मनिपुरीफोरा आसामाव हाबफैयो । राइजो लानानै बर' राजा आरो मखजानाय गुबुन गुबुन सुबुं हारिफोरजों दावहा नांबाय थानांनायमोन । बिसोरनि मादाव आह 'मफोरजों बर' राजाफोरा बांसिन आरो बावसिन दावहा नांनांदोंमोन । बर'फोरनि आखला गुरै आरो माहि । नांलाय खमलाय, हिंसा-हिंसिनि गोसो बिसोरहा गैया । बेनिखायनो जानो हागौ बर' राजाफोरा दावहानि थाखाय एसेबांमानि थाग थियारि जानानै थायामोन । बे जाहोनाव, आरो गावजों गाव खौसे थालायनो रोडैयाव आह 'म राजा चहुंमुंजों दावहायाव जेननांदों बर' राजा देतसुड । बियो जादों ख्रिष्ट 1536 मायथाइयाव ।

आह 'म राजा चुहुंमुड डिमापुर नोगोरखौ गाग्लोबबाय, सेनानै लाबाय, गावनि राइजोजों दाजाबनानै लाबाय । डिमापुराव बर' राजाफोरा 86 बोसोर (1150-1226) राइजो खुंनाया थुंगेबाय । राजा फोरजा, आरो राजथावनि स'नापुरी डिमापुर नोगोरखौ गारलांनानै खारलांबाय दाबसे जायगायाव, लोगोसे दावदाबसे दाहा लानानै बिखायाव । डिमापुरनिफ्राय उनाव सा काछार जिलानि माइबडव बर' राजाया राजथावनि गोदान गायसनहैयो माहुर दैनि साखाथियाव । बेसेबा गोबाव राइजो खुंबाय गोदान राजथावनियाव थानानै साफा साफा फारि फारि बर' फोलेरनि राजाफोरा । नाथाय मेगन गोसा जयन्तीया राजानि उदखाराव आरो आह 'म सान्त्रिफोरनि गले गले गाग्लोबनायाव बर' राजा ताम्रध्वज नारायना खासपुराव खारलाडे ख्रिष्ट 1706 मायथाइयाव । थेवबो राजथावनिया माइबडवो दंबावोमोन । उनाव राजा कीर्ति चन्द्र नारायननि आमोलाव राजथावनि गोदान गायसनहैनाय जायो ख्रिष्ट 1750 मायथाइयाव खासपुर नोगोराव ।

सफिद चाहाबनि बादिब्ला त्रिपुरानि राजखुंग्रिजों बर' राजा धर्मध्वज नारायनहा हाबा जानायाव त्रिपुरा राजाया बिजामादैनि जोथोब (जौतुक) हिसाबै काछारखौ हगारनानै होयो । दानि काछार जिलायाय त्रिपुरा राजानि हादर सिडवमोन । बे काछार जिलायानो खासपुर । सोरगिदिं ग्रोम ग्रोम बमफां लाइफांनि गेजेरावनो

खासपुर नोगोर । खाथिजों बोहैलांदों माहुर दै । नाथाय दा बे दैया गोजान जालांबाय । राजा थाग्रा न'आव थानोब्ला लांगोनानि सिंह दरजाजों हाबलांनांगौ । सिंह दुवारनि खाथियाव रोनसोन्द्रि मन्दिर । राजखारेंनि खाथियाव आरो दंबावोमोन रोनोसोन्द्रि मन्दिर । साखाथियाव शिव दौल आरो दंबावो फुख्रि खरसे । नोगोरनि सोरगिदिं गोथौ गुवार गोरखाय । बे गोरखायनि थाखाय सुथुरफोरा नोगोराव हाबफैनो हायामोन । राजखारेंनि मोखाडव दुलाराय फोथार गुवार । थानसालियाव राजाया दावहायाव थानो ओंखारब्लानो आरो दावहानिफ्राय फैफिनब्ला रोनोसोन्द्रि मोदायजोखौ खुलुमनायमोन । रोनोसोन्द्रिनि गुबुन गुबुन मुड जादों दुर्गा देबी, जगतमाता, जगधात्री । ड० सुनीति कुमार चेटार्जीया रोनोसोन्द्रिखौ "कालीमाता" होननानै बुंदों । बि मोदायजोखौनो केचाइ खायती (गोथाडै जाग्रा) बुंदों । बिनो ताम्रेश्वरी, बिनो कामाख्या देबीबो ।

उपेन्द्र चन्द्र गुहनि बादियैब्ला बर'फोरा क'च हारिनि मानसिफोरखौ खुंसा बुंनायमोन । बिसोर नाथाय जायगाखौ खुसपुर होननायमोन । उनाव खुसपुरनिफ्राय खासपुर जाबोदों होननानै बिथाड बुंदों । (काछारेर इतिबृत्त पृ: 34) । बिथांनि बादियैब्ला गोदो खासपुराव क'चफोर दंमोन । जायखि जाया मानो एसेबां गोखों आरो गोमोथाव कारुकार्य गोनां राजथावनि खासपुरखौबो सुथुरफोरनि गले गले उदखाराव थावरिनो हायैलाय राजा ग'बिन्द चन्द्रआ गारनानै सिरि सिरि "हरिटिकर" मुनि दाबसे जायगायाव खारखोमा लाडे । बेहायनो बियो गायसंहैयो गोदान राजथावनि ।

हरिटिकरा दरसे फिसा गामिसो । बे जायगानिफ्राय बारा गोजान नड-बराक (बख्रब ?) दैया बोहैलांनानै उनाव दोंनै जाहैदों । दोंसेआ कुसियारा, दोंसेआ सुरमा । सोरगिदिं गाहाइ गोजौ हाजो थिला । सोमखोर हाग्रा बेन्दों बेनला । हाजो सेर सेर ग्रौ ग्रौ अरं गेजेर गेजेर खोल खोल जिर जिर दै बोहैनाय रिनदाउ रिनसि दाउमा दाउसा मेथाइ खननाय, सान हर मोसा लखा सोगोमनाय । बेयावहाय नुनो मोनो खोलो खोलो बार बारनायजों देमगलाय देमसि बंफां लाइफां मोसानाय । गफा गफि सनाहालि माइ बिसं, हाग्रा सेर सेर नुहां नुवाहां सुबुंनि सं । फालो फालो खोथिया फाखा, थेखा थेख्रि सखा । अमा सिनारि, अमा थावख्रि आरो बायदि बायदि हाग्रानि जुनार- बेसे नायनोमोन । सनालु, आवजार सेरफां, फालासु मान्दार, बायदिमैया, गोमो गोजा गुफुर गोथां बिबारनि मेला, रं बेरंनि सिख्रि बाहां बिरहां हालो दैलो बिबार सोबनाय मोसानाय बेसे समायना, बेसे रमायना, बेसे गोजोन, बेसे सुदेम - आय' बे जायगायालाय । बेखौनो बुडे सनापुरी सोरगोफुरि

हरिटिकर गामि। बेयावहायनो सान्दोंमोन राजा ग'बिन्द चन्द्रआ आलो आलो थानो, राइजो रैखा खालमनायनि सानगोथौ साननो, फोरजा फिसाफोरखौ गोजोनै लाखिनो। बेनिखायनो बियो हरिटिकराव राजथावनिखौ बोस्लाय लांदोंमोन। बेयावहायनो बियो लुदोंमोन रोन्सोन्दि थान। रोन्सोन्दि बिमाखौ सिबियोमोन ग'बिन्द चन्द्रआ गोसो मोदोम जिउ होसारनानै, बोर मोननो लुबैनानै।

मनिपुर राजा मधुचन्द्रनि फिसाजो नायनो मोजां जारौ रौ, गन्थं मोखां गेबें - मुडा जादों इन्दुप्रभा। काछारनि राजा कृष्ण चन्द्रआ गोसो थोनानै बिखौ हाबा खालामनानै लाडे। नाथाय, बारा गोबाव राइजो मोनजायाखिसै, कृष्ण चन्द्रआ थैलाडे। बिनि उनाव गावनि फंबाय गबिन्दआ राज उलाफादाव जनानै बिबाजै इन्दुप्रभाखौ जुलि खालामनानै लायो। इन्दुप्रभानि हाबानिफ्रायनो सानथ्रनो हायै मनिपुरीफोरा काछार राइजोआव हाबफैनो सोलो मोनो। बे हाबानि फारियानो बर'फोरनि सुनि जानानै फैयो। बे हाबायानो बर' राजा आरो राइजो फोजोबनायनि मोनसे जाहोन जानानै फैयो।

ग'बिन्द चन्द्रआ इन्दुप्रभानि बाश्राखौनो गनायनानै लानांगौमोन। बिनि बुंनयावनो राजा ग'बिन्द चन्द्रआ बिनिनो बिदा गुमुर सिंखौ सान्त्रि गाहाय खालामनानै लादोंमोन। उनाव गम्भिरसिं मुं लायो। बे गुमुर सिड राजानि गुमुरखौ मोननानै लासैनो बर' राइजो काछारखौ मनिपुर राइजोजों दाजाबनो खाबु लाखोमायो। गमामायैनो उनाव गुमुर सिड नंखाय बाखाय राव लानानै राजाजों बेरेखा जायो। गम्भिर सिड राजानि बिग्रायखांनाय आखल दिन्थिबाय। मनिपुरनि राजा मारजिदसिड आरो सुरजिद सिंजों लोगो लाना ग'बिन्द राजानि हादर दरसे गाग्लोबबायानो। बे समावनो मानफोराबो काछारखौ गाग्लोबदोंमोन। राहा गैथैलाय ब्रिटिशफोरनि हेफाजाब लानानै गिलु बालु दावहा नाडे। नाथाय.....

सानसेखालिनि बाश्रा। राजा ग'बिन्द चन्द्रआ गामाखालिनि बादि दावहायाव थांनाय सिगां हरिटिकरनि रोन्सोन्दि मन्दिराव हाबनानै फुजा खालामबाय थादोंमोन। थिग बे समावनो गुमुर सिंनि मेगन थिफायनायाव सासे मनिपुरी सानथ्रिया सिं सिं थांनानै ख्लाब ख्लिब जॉनाय थुंग्रिजों ग'बिन्द चन्द्र राजाखौ गोदोनायाव थबस्र' दानस'नानै होयो। बे जादों 1832 मायथाइनि जाथाइ। हाय गसाइ! ग'बिन्द राजाया थैलांबाय। लोगो लोगो बर' राइजोआबो जोबलांबाय। किंबदन्तीया बुडे - राजा ग'बिन्द चन्द्र थैखांनानै राइजोनि रोन्सोन्दि मोदाइजोआ राइजो नागारनानै बबेयावबा खारलांबाय। फोरजा फिसाफोरा हामा-दैमा, आलाइ-सिलाइ जानांबाय। बेनो जादों हरिटिकरनि जारिमिन।

सोंथि :

1. रायथाइगिरिया “काछार जिलानि जारिमिनानो बर' हारिनि दुखु गोनां जारिमिन” होननानै काछार राइजोनि लोगोसे बर' हारि जोबलांनायनि मा दुखु गोनां जारिमिन फोरमायनो नाजादों बेखेवना लिर।
2. हरिटिकरआ मा ? बिनि गोमालांनाय गोदोनि महरखौ रायथाइजों सोमोन्दो लाखिना फोरमायना लिर।
3. इन्दुप्रभाया सोरमोन ? राजा कृष्ण चन्द्रजों बिहा मा सोमोन्दो दंमोन ? बिखौ ग'बिन्द चन्द्रआ माबोरै जुलि खालामना लानो हादोंमोन ?
4. काछारनि हरिटिकरनि गोजाम जारिमिनखौ नॉनि रावजों गुवारै लिर।
5. लिरसुंथाइ लिर:
हरिटिकर, कृष्ण चन्द्र, ग'बिन्द चन्द्र, इन्दुप्रभा, गुमुर सिं।
6. बेखेवथि :
(क) काछार जिलानि.....दुखु गोनां जारिमिन।
(ख) बे हाबायानो.....जाहोन जानानै फैयो।
(ग) किंबदन्तीया बुडे.....बबेयावबा खारलांबाय।

फरा गियान :

लिरनायनि नेरसोन थायाब्ला जारिमिन लिरनो हाया। बर'हारिया लिरनायनि सिन गैयाखायनो जारिमिनबो गैया। नाथाय बर'फोरा जारिमिनगोनां हारि। बेफोर जारिमिनारि जाथाइ आरो बाश्राफोरखौ बुरखांना लिरफिननो हाब्लासो बर'फोरखौ गुबुन हारिया सिनायनो हागोन। मालाय हारिनि लिरनायफोराबो फोथायथावै। बेनिखायनो गाव हारिनि लिरगिरिफोरा बेफोरखौ बुरखांना लिरफिननांगौ।

फोरोंगिरिनिसिम :

गोदोनि जारिमिन लिरनायनि फुंखाफोरखौ लिरनाय नेरसोन आरो खुगा खुगा सोरजिबोनाय सल', सल'नथाइ आरो सुबुं फोथाइथिफोरनिफ्राय बुथुमनाय जादोंमोन। बर' हारिनि जारिमिन लिरनायाव नाथाय गोबांखौनो बेबादि लिरनाय गैथै फुंखानिफ्रायसो गुबुन हारिनि लिरगिरिफोरा बुथुमना लाबोदोंमोन। बेफोरनि बांसिनानो आबुं नड आरो गोरोन्थिगोनांमोन। बेनिखायनो फोरोंगिरिया फरायसाफोरखौ गावबा गाव ओन्सोलनि बेबादि जाथाइ थानाय फुंखाफोरखौ बुथुमनो थुलुंगा होनांगोन।

खेराइ मोसानायव फावथिना नायबिजिरनाय

फराखौ सायख 'नायनि थांखि :

धिरेश्वर बर' नार्जी

बर 'फोरा गुदि धोरोम बाथौ खेराइ खुंनानै बाथौ ब्राइखौ फुजिनायनि थाखायनो बेखौ बाथौ धोरोम बुंनय जायो। खेराइया खेरायारिफोरनि मोनसे रंजाथाइ फोरबो। हान्थु खेराइना बाथौ ब्राइखौ आर 'ज खालामनायखायनो बे फोरबोखौ खेराइ, बुंनय जायो। खेराइ रंजाथाइखौ खेराइ मोसानायबो बुडे। मानोना रोजाबनाय, मोसानाय आरो दामनाय बे मोनथाम संमेथाइ जथाइनि गेजेराव खेराइ रंजानायव मोसानायसो गुबैसिन। बेनि उनाव दामनाय, रोजाबनायखौ खेराइयाव लाफानाय नुनो मोनो। मोसानायनि थाखायसो दामनायखौ लाफानाय जादों। खेराइयाव संमेथाइनि "ताल" आरो "लय"जों मोदोमनि साफ्रे-सुफ्रे खालामनानै सोरजिगिरिखौ गोजोन होनायानो खेराइ मोसानाय होनना लिरगिरिया बुंदों। खेराइयाव सा 18 मोदायनि गोहोखौ फोरमायनो थाखाय मोन 18 बाहागोनि मोसानायखौ दौदिनया दिन्थिफुडे। दौदिनि मोसानाय थाफायाब्ला खेराइ खुंथाइया आबुं जानो हाया होनना फोथायनाय जायो। खेराइ मोसानाय भारतनि सास्थोरारि मोसानायजोंबो लोब्बा दं। भारतनि सास्थोरारि मोसानाय जिबादि गोथौ ओंथिगोनां बेबादिनो बर 'नि खेराइ मोसानायबो गोथौ सानस्रिगोनां। बेफोर बाथ्राखौ फरायसाफोरनो मिथिहोनो थाखायनो बे फराखौ सायख 'नाय जादों।

लिरगिरिनि सिनायथि :

1949 इं मायथाइयाव अदालगुरि जिलानि 2 नं. आमगुरि गामियाव धिरेश्वर बर' नार्जीनि जोनोम जायो। बिनि बिफानि मुडा रंसारि खंराइ कछारी आरो बिमानि मुडा ब्राह्मणी कछारी।

निज कलाइगाव गुदि फरायसालियाव फरायजेननानै 1977 इं मायथाइयाव मंगलदै कलेजनिफ्राय बि.ए. उथ्रियो। बियो कलाइगाव हायार सेकेण्डारिनि फोरोंगिरि हाबा मावनानै जिरोन लायो।

बिथांनि सोरजिफोरा जादों - देखो समाव फैसालियाव (मेथाइ- 1975), जिउ गाग 'लांनय सान (सल 'मा - 1997), जोंथि (सल 'मा - 2001), मान्दार बिबार (सुंद 'सल' - 2002), सि नागिरलु सि (सुंद 'सल' - 2001), रिनि रि (सुंद 'सल' - 2007), मोन्दांथि (खन्थाइ- 2008) बायदि बायदि।

बिथाड आथिखालाव लिरनायाव मुखुब जानानै दं।

गुबै फरा:

भारतआरि मोसानायनि जोनोम जारिमिन आरो जोनोम जायगा नागिर लांब्ला नुनो मोनो दि धोरोम आरो सिबिसालिजों बेहा एंगारथावै सोमोन्दो दं। बुंनो थाडेब्ला भारतआरि गासै मोसानायानो सिबि खान्थि एबा बिथाइजों. आबुं। गोदोनि भारत हादरनि मन्दिरफ्राव देबदासी, दौदिनि एबा Prayer dancer दंमोन। मोसानाय मोनसे साबसिन कला। बे साबसिन कलाखौ बान राजानि फिसाजो उषा आरो मुनिफ्रा मुलुगाव गिबि गिबि फोसावो होननानै साननाय जायो। बे जिखि जाया मानो बे रंसारि कलाया मुलुगाव गुबैयै रंसारि गोहोखौ गोजोन होनो थाखायनो बाहायनाय जादोंमोन। बेनिखायनो बेनि जोनोमखुलिफ्राबो जादों मोदाइखुलि, मन्दिरफ्राव। गुबुन रावै बुंनो हायो दि मोसानाय मोनसे धोरोम आसार। बे मोसानायफोरखौ खायफा खान्थि एबा सास्थोर जथायनानै बै खान्थि गलाइनानै मोसानायखाय उनाव बै मोसानायखौ सास्थोरारि एबा फोसाबनाय मोसानाय होननानै मिथिजादों।

बर 'नि धोरोमा बाथौ धोरोम। बाथौ धोरोमारि आसारजोंबो मोसानायनि मोनसे गोथौ सोमोन्दो दं। बाथौवारि बर 'फोरा सासे खाय + एरग्रा + बोराइ = खयेरा बोराइ एबा खरिया बोराइ एबा सोरजिगिरि आफा अबंलावरिखौ खेराइ होननानै बुंदों। बिनि थाखाय खेराइ होनब्ला सोरजिगिरिनि खाथियाव आरज खालामनाय एबा बिथाइनि खुंथाइखौनो मिथिहोयो। आरोबाव खेराइ मोसानाय होनब्ला जों आर 'ज मोसानाय, बिथाइयारि मोसानाय बेखौनो फोरमायो। मोसानाय सोदोबा मोदोम + सानाय एबा साफ्रेनाय = मोसानाय जानानै फैदों। लय, तालजों मोदोमखौ साफ्रे-सुफ्रे खालामनानै सोरजिगिरिखौ गोजोन होनायानो खेराइ मोसानाय। मानगोनां रंसारि म 'हिनि म 'हन ब्रह्मआ बर ' मोसानाय जोनोम खुलिनि सोमोन्दै लिरदों - "बर 'नि मोसानाय, मेथाइ खननाया जोनोम मोनदों खेराइसालियाव। बेनिफ्राय हाबासालियाव आरो मावखां दोनखां रंजानायव।" बेनिखायनो मोसानायनि जोनोम थुलुंगाया बबेखानि रोखोमसेनिनो।

मानगोनां कान्तेश्वर बरगयारीनि बादिब्ला थामथि गुरु इहिउ बोराइ-इहिउ बुरैया खेराइ सोरजिजेनग्रा, मोसानाय मुसुरनायखौ दिहुनना बर' हारिखौ बिबाउ होलांदों। गुबुन फारसे खेराइ मोसानायनि जागायजेननायनि सोमोन्दै जों जाराफग्लानि सल'खौ गोसोखांनो गोनां जायो। बिहामजो मंलीखौ नागिर नागिर फाग्लाबादि जालांनाय जाराया खाम, सेरजा, सिफुं दामना खेराइनांगौ होननानै सिमाडव नुनाय बादिनो अखाफोर दानसोरां हराव जाराया खाम, सिफुं, सेरजा दामनानै खेराइनो लानायसै। खाम, सिफुं, सेरजानि रिंखांनायजों बिहामजो मंलीया दौदिनि जानानै मोसा फैनायसै। बे साननिफ्रायनो खेराइनायाव दौदिनि मोसानाय जागाय जेनो होननानै बर'फ्रा फोथायबोदों। बे सल'आ आरो मोनसे बाथ्रा रोखा खालामो दि दौदिनि मोसानाय नडब्ला खेराइ खुंथाइया जाफुंनो हाया।

बे आर'जनि खुंथाइ एबा खेराइखौ बर'फ्रा बोसोरनि गुबुन गुबुन समाव गुबुन गुबुन थांखि लानानै गुबुन गुबुन मुडै खुडो। जैरै -

1. **संसारनि खेराइ** : गोदान बोसोरखौ बरायनो आरो लोगोसे मानसि-दुमसि मिथिंगानि गासैनिबो मोजां हास्थायनानै बैसाग दाननि सेथि सान एबा हाबथायाव संसारनि खेराइ खुंनाय जायो।

2. **उमराव एबा आमथि खेराइ** : बे खेराइखौ आसार दानाव बोथोरनि आबाद फिथाइ-सामथाइ आरो सुबुंनि मोजांखौ हास्थायनानै खुंनाय जायो।

3. **दर्शन खेराइ एबा माइनाव खेराइ** : बे खेराइखौ काति दाननि सेथि सानखालि माइ-माइरं, फिथाइ-सामथाइ, रं-रुफाजों बहुमा उसिफबथों हास्थायनानै खुंनाय जायो।

4. **फालो खेराइ एबा बाथौ खेराइ** : बे खेराइखौ मागो दाननि अखाफोर गावदां हर खालि खुडो। सोरजिगिरि बाथौ बोराइनि खाथियाव सुबुं हारि, जिब-जुनाद, बिफां-लाइफां गासैनिबो मोजांनि थाखाय आरो मानसि-दुमसि, जिब जुनाद, बिफां लाइफांनि खैफोद-आफोद बेराम-आजारखौ जोबसां होनो थामहिनबा दुलाराय बहुमनि मोजांनि थाखाय आर'ज गाबनानै खेराइखौ खुंनाय जायो।

5. **न'नि खेराइ** : न'खरनि खैफोद-आफोद, बेराम-आजार जोबसां होनो एबा नखरनि मोजां मिजिंथिनानै खुंनाय खेराइखौ न'नि खेराइ होननाय जायो।

जों खेराइ मोसानाय होनब्ला बर' माहारिनि बाथौ धोरोमारि सिबि खान्थिजों सिं-बिखुं सोमोन्दो गोनां सिरिसे आर'ज मोसानायखौ फोरमायो। बाथौ बोराइखौ

बाउनाय समाव सोरजिगिरि बाथौ बोराइनि लोगोसे आरो सा 18 मोदाइखौ खेराइनाय जायो। बै सा 18 मोदाइखौ सिबिनाय समाव मोनफा मोनफा बिथाइ मोसानाय एबा खेराइ मोसानाय जायो। बाथौ बाउनाय समाव बे खेराइ मोसानायफोरखौ गारथावा। बेनि थाखाय बे मोन 18 खेराइखौ गुबै एबा गाहाइ खेराइ होननानै बुंनाय जायो। गुबै खेराइ मोसानायफोरा जादों - 1. दाहाल सिबिनाय (आइलों मोदाइ), 2. सा गोलाउ (खाजि मोदाइ), 3. खैजोमा फनाय (अब्ला खुंगुर), 4. सथलि दरंआव आग्रां (आग्रां मोदाइ), 5. दाहाल-थुंग्रि सिबिनाय (राज खुंगुर), 6. खामाव बारखोनाय (राजखान्द्रा), 7. बादालि बिरनाय (सानजानि आलि बुरा), 8. मैसो गेलेनाय (दिबावलिया), 9. बाथौ गिदिंनाय (आइ बिमा), 10. नाव भासायनाय (मोनासु), 11. मुफुर गेलेनाय (बुरलि बुरै), 12. माइनाव बरायनाय (जोनोम बिमा), 13. मोसानाय गेलेनाय (बा राजा), 14. गराइ दाब्रायनाय (बैसुमोथि), 15. गान्दौला बोननाय (खैला), 16. नाव जावनाय (रोनसोन्दि), 17. थुंग्रि गानाय (भान्दारि), 18. दाउ थै लौनाय (खामाइखा)।

बे मोन 18 गाहाइ खेराइ मोसानायनि अनगायैबो आरो माखासे खेराइ मोसानाय दं जायफोरखौ बाथौ बाउनाय समाव समफोरखौ खाबु लानानै मोसानाय जायो। बे खेराइ मोसानायफोरखौ लेडाय खेराइ होननानै बुनाय जयो। जैरै - लाइजाम बनाय, जारा फग्ला, दौदिनि ओंखारनाय, खला गानाय, बोलि दाननाय बायसेथ्रा।

खेराइ मोसानायफोरा बाथौवारि धोरोमनि गियानथौफ्ले (दर्शन) बिजिरनायावबो गोबां मदद खालामो। मानोना बै गासै खेराइ मोसानायफोरनिनो मोनफा मोनफा गोथौ आरो मोजां ओंथि दं। बे मोसानायफोरनि बिजिरथिजों एरै मोन्दों- 1. दौदिनि अनस्रानाय-मोसानाय सारि जेननाय, जिउ मोननाय, 2. लाइजाम बनाय मोसानाय अबंलावरिखौ गोसो मोदोम जिउ होसारनानै बाउनाय, 3. बाथौ थारनायजों गोसोखौ साननाय-हनायजों गोसोखौ गोथार खालामना लानाय, 4. खेराइ गुमुं मोसानायजों दसे समनि थांखिजों नांगौ समाव अबंलावरिखौ खुलुमनाय, 5. खेराइ गोलाउ मोसानायजों अबंलावरिखौ खुलुमनाय, जनानै बिनि सायाव सोनारना थानाय, 6. दाउ थै लौनाय मोसानायजों संसाराव गोसो हमथानानै सोलिनाय, 7. गान्दौला बोननाय मोसानायजों गोसो हगारा जासे उन-सिगां साननानै सोलिनाय, 8. दाहाल-थुंग्रि सिबिनाय मोसानायजों इनाय, सुथुरखौ होथेनाय, 9. थुंग्रि गानाय मोसानायजों निस्थार, गाव गोथारब्ला गासैबो मोजां, 10. सा गोलाउ मोसानायजों गोसोखौ हगारसारा जासे गोसोखौ हेंग्रा एबा हमथाना सोलिनाय,

11. नाव जावनाय मोसानायजों मोजां नखर बेंनानै संसार लैथो बारनाय, 12. गराइ दाब्रायनायजों फैलाव संसाराव रोजोबथाव जायगा नागिरना लाना राइजो जानाय, 13. बाथौ गिदिनायजों बैसोआ लासै लासै रुं लांनाय, 14. राइदों सिबनायजों अबंलावरिखौ गोरलैयै मोनदांनो हायि, 15. अर सालाइ जानाय मोसानायजों गावनि अहं गोसो आरो रागाखौ हमथानाय, 16. खैजोमा फनाय मोसानायजों नों दानागार आंबो दानागार खौसेयै राइजो जानाय, 17. माइनाव बरायनाय मोसानायजों जायै - लोडै थानानै थानायनि लाहार-फाहार, 18. सथ्रलि मोसानायजों गियान आरजिनाय आरो थार गियान बिलायनाय, 19. आग्रां मोसानायजों सोरजिनि थुलुंगा, 20. खामाव बारखोनाय मोसानाया गावनि हारिमुनि फारसे मान दिस्थिनानै जो-जोला गावजों गाव सोनारनानै राइजो जानाय, 21. बादालि बिरनाय मोसानाया गथ'-गथाइ ग्रोम ग्रोम आवग्रिना लानानै रुजु-रुमु संसार थावरिनाय, 22. नेवलाइ गेलेनाय मोसानायजों हौवा-हिनजाव सोरजिनि थांखिजों गोरोबलायनाय, 23. मैसो गेलेनाय मोसानायजों संसाराव नाखेब लायबाय थानायनि इसादि, 24. मोसा मुफुर गेलेनाय मोसानाया संसाराव अहं, अखा आखु गोनांफोरखौ सिनायनानै लानायनि इसादि, 25. जारा फाग्ला मोसानायजों अनलायनानै मोजां नखर बेंना जानाय, 26. गोथै मानखानाय मोसानायजों सि (जिउमा)नि जोरथाइ आरो जिउनि थैलाय-उजिलाय जाबाय थानायनि गियानथौफ्लेयारि गुबै बाथ्राफोरखौ फोरमायो। खेराइ मोसानायनि बे गियानथौफ्लेयारि बिजिरथिफ्रा गुबुन भारतआरि मार्ग मोसानायनि बिजिरथिनिफ्राय एसे जुदा।

भारतआरि गुबुन गुबुन आर 'ज मोसानायनि सिथ्ला मन्दिर सिं जानाय बादि बर 'नि बे खेराइ मोसानाय हाबाखौबो जाफुं होनाय जायो बाथौ गुदियाव एबा आर 'ज सालियाव। जाय थांखिजों खेराइनाय जायो बे थांखिजों दौरिया मोन्थोर रायलाडे। बे मोन्थोर रायनायनि गावनि मोनसे देंखोनि दाहार दं जायखौ मानगोनां गिरिन्द्र ब्रह्म दैमारिया बर 'नि मार्गीय मेथाइ होननानै सिनायथि होदों। लोगो लोगो दौदिनया मोगथाडव महर होनायाव आरो खायसे आइजें - आइलानि हेफाजाब नांगौ जायो। सारंगदेबआ सुजुनाय संगीत रत्नाकराव मेथाइनि सोमोन्दै एरै बुंदों - गीतं बाद्यं तथा नृत्यं त्रयं संगितमुस्यते। खुथि, दामनाय आरो मोसानायजोंसो संगीत एबा मेथाइ जायो। बेनिफ्राय रोखा जायो दि मोसानाया मेथाइनि मोनसे बाहागो, मोसानो थाखाय खुथि आरो दामनाय नांखागोन। थेवबो-नृत्यं बाद्यानुगं प्र'क्तं गीतानु-बृत्ति च। खुथि एबा गीताया गुबै। खुथिनि सिं दामनाय आरो दामनायनि सिं मोसानाया आत' गीत प्रधानत्वदन्ना। मोसानो

गोनांब्ला सिगांनो मोननै रादाब थाखानांगोन। बर 'नि मेथाइयाव बुंनाय दं-

बर 'नि धोरोमा मामोन हाय गोदो-गोदाय लोगो

बर 'नि धोरोमा मामोन

रिउ रिउ सिफुं सुनाय

फ्रिउ फ्रिउ खाम दामनाय

थिंथ' थिंथ' जथा दामनाय

बर 'नि धोरोमा बेनोमोन हाय।

बेनिखायनो नाट्य शास्त्रआव मख 'नाय रोखोमब्रैनि दामग्रा आइजें- (क) अनद्ध एबा बिगुरजों थुमनाय खाम, (ख) घन बाद्य थामहिनबा जथा, (ग) सुषिर बाद्य एबा बारजों सुनाय गुदुंबानि सिफुंआव गावबा गाव मोसानायनि थाखाय जुनिया जुनिया देंखोफोरखौ दामनानै होनाय जायो। बेनि अनगायै (घ) तत बाद्य एबा सेरजानि बाहायनायाबो बर' मोसानायाव दं।

गोदोनि हाज' ओनसोलाव मन्दिरफोराव देवदासि होननानै सिबिसालिनि मोसासुलि दंमोन होननानै मिथिनाय जादों। आथिखालाव बे देवदासिफ्रा गैला आरो बे हारिमुवाबो जोबसिनो लाबाय। गोदोनि बाथौसालिनि दौदिनया मोसानाय खेराइ सिरिनि मोसानायाबो बर 'नि हारिमुनि आखाइनिफ्राय गनानै गोमाहां गोमाहां, आंगो आखु खोमोरहां खोमोरहां। आथिखालाव खेराइनाय हाबाखौ आर 'जजौल' जाफुंहोनाय जायो। बेनि थाखाय बे गोथार खेराइ सिरिनि मोसानायखौ फोथांफिननो जों खेराइनाय एबा सिबिनायजों सरजाब फिननांगोन। नडब्ला आलादायै मनिपुरी, अडिसि, भारतनाट्यमनि राहाजों मोसानायनि मोनसे महर (शैली) होना हमथाना लाखिनांगौ। बर' मोसानायफोरखौ फोथांनो थानायाव आलादायै गंसे सोलोंसालि गायसननाय स्रायै बिजिरनाय मोनसे थि महर होना फोरोंनायनि राहा खालामथारनांगोन।

गोदो बाथौसालिनि बे आर 'ज मोसानायफोरखौ आथिखालाव खायफाखौ बुरखांना लाबोनानै मेथाइ हारिमुनि सिथ्लयाव जायगा होनाय जादों। मेथाइ हारिमुनि जथुमाव खेराइ सिरिनि मोसानायफोरखौ दिस्थिनयनि राहा खालामनाय जादों।

दा जों भारतआरि सास्थोरारि मोसानायजों बर 'नि खेराइ रुजुस्लिंनानै नायनो सानदों। भारतआरि मोसोनयनि बाथ्रा बुंनांगौब्लानो नटराज शिबनि बाथ्रा फैयो। नटराज शिबआ गावनो मोसानो मोजां सर' खालामनायमोन आरो पार्वतीजों लास्य आरो तान्दब मोननै राहाजों मोसानायमोन। शिब आरो पार्वतीयानो

मोसानायनि जोनोमगिरि । तन्दु बादि मुनिफ्रा शिबनि खाथियाव थानानै मोसानो सोल्लोनायमोन । बान राजानि फिसाजो उरखा एबा उषा आरो बिलोगो सैथि सिख्ला एबा चित्रलेखाखौ पार्वतीया मोसानो फोरोंनायमोन । बे चित्रलेखायानो द्वारकायाव मोसानायनि हारिमुखौ सिगां जागायजेन्दोंमोन ।

खेराइखौनो लानानै भारतआरि सान्थोरारि मोसानायफ्रा फाव एबा सानथौ गोथौ बिदै बहरा । मोसानायफोरखौ जाफुंहोनो आखाइनि जा फाव एबा सेव खालामो बेफोरखौ हस्त होनानै बुंनाय जायो । स्त्रीहस्त मुक्तावलिआव हस्तआ मोनथाम रोखोमनि दं होनदों । (1) असंयुक्त एबा फारसे आखाइजों दिन्थिनाय, (2) संयुक्त एबा फारनै आखाइनि मददजों फाव दिन्थिनाय आरो, (3) नृत्त हस्त । बेफोरनि अनगायैबो दा बिदाम (ताल), दावथाइ (लय) आरो खबामफोरखौ (छन्द) मोजां फोसावनो मोदोमनि गासै मोखां एबा अंगनिबो बाहायथि गोनांथार । बेनि गेजेराव (1) खर', (2) मेगन, (3) गोदोना आरो (4) आथिंआनो गाहाइ ।

मोसानायखौ सास्थोरारि राहाजों मार्ग आरो जाय मोसानायाव बिदाम दावथाइ, खबामल' थायो बेखौ देशी मोसानाय होननो हायो ।

मोसानायनि महरखौ बिजिरनानै तान्दब आरो लास्य मोननै बाहागोआव बोखावफिननो हायो । नायथाव थाव, दुथां दावथाइ, खबाम गोनां मोसानायखौ तान्दब आरो गोहैलो बिदाम, दावथाइ खबाम गोनां समायना मोसानायखौ लास्य होननाय जायो । कथाकली मोसानाया तान्दब गुबै । बीर आरो रुन्द्र बिदै आबुं । खेराइ मोसानायावबो तान्दब सिरिनि मोसानाय दं । दाहाल सिबनाय, गराइ दाब्रायनाय, मोसा मुफुर गेलेनाय बेफोर तान्दब मोसोनायनि आखु गोनां । मनिपुरी, कथक, अडिसि मोसानायाव लास्यनि गोहोमआ एसे बारा । खेराइनि माइनाव बरायनाय मोसानाया आबुडै लास्य मोसानाय ।

भारत नाट्य शास्त्रनि सायाव सोनारनानै भारत नाट्यम जादों । आन्नामालाइ नोगोरनि खाथियाव चिदबम-राम शिब मन्दिराव मोन 108 शिबनि मुसुखा दान्नाय दं । भारत नाट्यमाव बे मुसुखाफोरनि फावखौ जिउ गोनां खालामनानै मोसानायाव महर होनाय जायो । बे मोसानायनि फावफोरनि गेजेरजों सोरजि, शान्ति, बायफलेनाय एबा दहंस, दावगानायनि गोहो, रैखा होनायनि सानस्रि, गात्रि आखु गारनायनि आरो मुक्तिनि सानस्रिया बेरखाडे । खेराइ मोसानायफ्राबो बे रोखोमसेनि सानस्रिजों आबुडै आबुं जानानै दं ।

भारत नाट्यमाव मोदोम, मेगन, मोखां, गोदोना, जान्जिनि रोखा बाहायनाय दं । नाथाय खेराइ मोसानायाव मोखां गोदोनानि एसेबां बाहायनाय गैया आरो

मुसुखानि महरखौ सानथौजों मोगथाडव रुख होनाय जायब्लाबो मोदोम जानजिनि बाहायनाय दं । खेराइ मोसानायनि मोनफ्रोमनिबो जुनिया जुनियायै मोनफा सानथौ थायो । भारत नाट्यमाव गासै 35 रोखोमनि बिदाम एबा ताल दं । नाथाय बिदि रुजुनायाव कथाकलीयाव मोनबाल' बिदाम थानाय बादि खेराइनि मोसानायाव काहारबा, खेमता, त्रितालनि खबामनि बिदामफोरखौ गुबुन गुबुन बानिजों दामनाय जायो । खेराइ आरो भारत नाट्यमा हायनारि (सन्म'हन) मोसानाय । गोथौ अबंआरि सानथौ आबुं नाथाय भारत नाट्यमनि मोनथाम बाहागो दं (1) नाट्य-फावथिना खालामनाय, (2) नृत्य सानथौ बिदाम, दावथाइ खबाम गोनां मोसानाय आरो (3) नृत्य सानथौ आरो बिदै बहरा मोसानाय, नाट्य आखुथाइखौ खेराइयाव आबुडै मोननो थाड । नेवलाय गेलेनाय, मोसा मुफुर गेलेनाय, मैसो गेलेनाय, नाव जावनाय, जारा फाग्ला बादि मोसानायफ्रा एसे नाट्य आखुगोनां । सत्रावलि, माइनाव बराइनाय, दाउ थै लोनाय, राइदों सिबिनाय बायदि मोसानायफ्रा आबुडै नृत्य एबा गोथौ सानथौ आरो बिदै बहरा । कथाकली मोसानायाव सल'खौ रामायण एबा महाभारतनिफ्राय लानाय जायो आरो बे मोसानायाव 600 निफ्राय 700 सो मुद्रा दं । खेराइ मोसानायाव बिदि सलनथाइमायारि सल' एसेबां होंगो-दोंगो गैया ।

कथक मोसानाया तान्दब आरो लास्य मोसानायनि गलाय मोनदेर मोसानाय । बेयाव - 1. आमद एबा मोसानायनि जागाय जेननाय, 2. परान आरो बिदामजों आथिं आरो आगाननि बाहायनाय आरो 3. गत एबा खायफा गुसुं सल' मोसानानै दिन्थिनाय दं । कथक मोसानायाव परानआनो गुबै । तबला एबा पाखवाजाव दामग्राया पराननि ब'लफोरखौ दामलाडो आरो बिदामखौ रोखा खालामलाडो । कथक मोसानायनि, 1. आन्दाज एबा गसंनायनि फाव, 2. आमद (जागायजेननाय बिदाम), 3. थात एबा मिकाष (रोखोमसेनि गसंनाय महर), 4. गत (फिसा फिसा जाथाइ दिन्थिनाय, जेरै - कृष्णनि सिफुं, फिसकारि मारिनाय), 5. गत भाव (माबा मोनसे सानस्रि आरो फावजों फोरमायनाय), 6. बल' परम (खुगाजों ब'लफोरखौ बुंलांना आथिंजों ताल लाखिनाय) आरो 7. बेफोर गासै थाखो खेराइ मोसानाय खान्थिजों थि गोरोबो । खेराइ मोसानायनि आलाप दामनायजों कथकनि आन्दाजआ एसे गोरोबहां । बेनि अनगायै गुबुन खलबफोरखौ खेराइ मोसालांनायनि फारियाव दिन्थिनाय जाया ।

मनिपुरीफोरा गुबैयै बैष्णब । राधा-कृष्णनि रासलिलानि सायावनो सोनारनानै सोरजि जादों मुंदांखा लाइहावरा मोसानाय । बर'फोरनि बादिनो बिसोरबो नंपक

निमाव आरो पानथैबि (शिब-पार्वती)खौ सिबियो। बर'फोरा जारा फाग्लानि समनिक्राय दौदिनि मोसानाया जागायजेनो होननानै साननाय बादि चित्रांगदाया मनिपुराव मोसानायनि हारिमुखौ जागाय जेनो होननानै सानो। खेराइखौ बोसोरनि बोथोर नाथै नाथै खुंनाय बादि मनिपुरीफ्राबो बैसाग-जेठ दानाव नंपक पानथैबिखौ सिबिनो थाखाय माहारियारि आरो धोरोमारि लाइहावरा मोसायो। मोसानायाव माइबा -माइबि (सिबिसुला-सिबिसुलि) नि अनगायै गुबुनाबो मोसायो। बे मोसानाया सोरजिजो सोमोन्दो गोनां। उमैलायनि सिगाडव फज 'नाय मुसुखाफोरनि जीवन इयास (जिउ होनाय) नैथियाव नभं (अखा हानाय) आरो लेहताइ (मुलुगजो सोमोन्दो जानाय)। बे मोसानायनि ओंथिया जादो मुलुगाव सुखु-गोजोन आबाद बिथाइजो आबुं जाथो। संसारनि खेराइ आरो आमथि खेराइनि सानथौजो असे। रासलिलाया मनिपुरीफोरनि मोनसे मख 'जाथाव मोसानाय। जयसिंह महाराजनि समनिक्राय मनिपुराव रासलिला मोसानाय जागायजेनो 1. बसन्त रास बैसाग जेठ, 2. कुनज रास आघन दानाव आरो 3. महारास माघ दानाव खालामो। बे रास लिलानि मोनद' खलब दं - 1. कृष्णनि अभिसार, 2. राधानि अभिसार, 3. रास, 4. भंगी (कृष्णखौ रासआव लोगो जानो खावलायनाय), 5. मिलन (राधा-कृष्ण सानैजो गोरबना मोसानाय, 6. प्रार्थना (ग'पी आरो राधानि कृष्णखौ अराइ मोननो आर 'ज)। खेराइ मोसानायनि सानथौआव लाइहावरा मोसानायनि सानथौखौ आबुडै मोनोब्लाबो रासलिलानि बादि मोसानाय गैया। थेवबो रासलिलानि सिंनि ओंथिया रांरासिजो सिंनि गोथार गोरबथाइनि बिजो रोखोमसेनिनो दिन्थि-आसाराल' जुदा। मोन्थोर एबा स्तुनि रायनाय समाव भारतनि मोसानायाव मुद्राजो दिन्थिनायनि सोलाय खेराइयाव धियाननि मुद्रायाव थायो। बेखिनि रिजायनायनिफ्रायनो रोखा जायोदि भारतआरि सास्थोरारि शैलिजो खेराइ शैलिनि महरआ बहाबा एसे गोरबे दंब्लाबो बेनि गुणारि आखलफ्रा रोखोमसेनि। थुलुंगा, थांखि, सानथौनि गेजेराव फाराग गैया। बाइजोनि महर मोखाड जुदा जुदाब्लाबो समायनानि साधनाया रोखोमसे इसोरजो गोरबनाय।

भारतआरि सास्थोरारि मोसानायाव 8 रोखोमनि थि नोजोर, 8 रोखोमनि बिदैखौ दिन्थिनाय नोजोर, 20 रोखोमनि मेगननि नायथिं-नायदाव नोजोर, 8 रोखोमनि नायनाय, 13 रोखोमनि खर' सोमावनाय, 9 रोखोमनि गोदोनानि फाव, 7 रोखोमनि मेगननि फाव, 5 रोखोमनि आथिंनि आगान, 4 रोखोमनि करन एबा आसिनि फाव आरो नाट्य शास्त्रआव मोन 24, अभिनय-दर्पनआव मोन 33, हस्त लक्षण दिपिकायाव मोन 24, स्त्री हस्त मुक्तावलीयाव मोन 30 रोखोमनि

मुद्रानि बाथा मोननाय जायो। खेराइ मोसानायाव एसेबांखिनि जेना आबुं मुद्रानि होंगो-दोंगो गैया। जा दं बिफोरबो गोरलै गोथो आरो सास्थोरारि आखलजो स्राय खालामनानै मुद्राफोरनि आंगो मुं होनाय जायाखै। बेखौ थाबै खालामनाया हारिनि थाखाय गोनां जादो।

बिदामनि बेलायाव बिदामनि बेंखना 6 माथ्रानि (खेराइयाव गैया)। दादरा खबामनि, 8 मात्रानि काहारबा खबामनि बिदामफोरखौ मोनो। बिदामफोरा समपदीजोब, बिसमपदी बिदाम गैया।

मोसानायनि दावथाइ एबा लयआ गोख्रै (गराय दाब्रायनाय), गेजेरारि आरो लेहेम (माइनाव बरायनाय) मोनथामखौबो नुनो मोनो। गुबैयै जाय दावथाइजो मोसानाय जागायजेनो बे दावथाइजो जोबहैयो। (गराइ दाब्रायनायावल' जोबनाय फासें नै गुण जायो।

खेराइ मोसानाय समाव मुद्रा दिन्थिनो गुबै आथिंनि आगान, आखाइ आरो जान्जिखौनो बांसिन बाहायो। गोजौआव मखनाय बादि मेगननि इसारा, गोदोना, गुस्थि, आखाइनि आसि आरो एसेबां जखानि मुद्रानि बाहायनाय गैया। वीर, करुन हास्य बिर आरो आदि रस खेराइ मोसानायाव नुनो मोनो। नाथाय भारतआरि मोसानायाव मोनसे बिदैखौ मुद्रानि मददजो मोसानानै दिन्थिनाय जायो। मोनसे मोसानायावनो मोननै मोनथामनि बिदै थानो हायो। खेराइ मोसानायनि बेलायाव मोसानायनि महरनिक्रायसो बिदैया बेरखाडो।

खेराइ मोसानायफोरनि मोनफ्रोमनिबो जुदा जुदा देंखो आरो बिदाम दं। बिदाम दामनायनि बेलायाव मोनसे गुबै बिदाम थायो आरो बेजो लोगोसे मोननै एबा मोनथाम फाइखि बिदाम एबा बिस्तार थायो। दामलांनानयनि समाव सिगां गुबै बिदामखौ खननै दामखांनो खिरमै फाइखि बिदामफोरखौबो खननै दामखांनो गुबै बिदामाव फैफिननाय जायो। दामनायनि बेंखना बिदिनि सोलिबाय थायो। बे जुनिया नेमा सिखिरि दामनाय आरो हिन्दुस्थानी आरो कर्नाटकी संगीतनि दामनायनि खान्थिजो आलादा। बे राखा रोखा आंगोथि गोनां बर 'नि बेसेन गोनां मोनसे आखु।

भारतआरि मेथाइयाव थानाय मोनस्नि स्वरनिक्राय खेराइनि देंखो दामनायाव गुबैयै सरज, शुद्ध रिंसभ, शुद्ध मध्यम, पन्सम आरो शुद्ध धैवतखौ बाहायनाय नुनो मोनो। नाथाय तारा ग्रामाव गाखोनाय समाव गुरै निषादखौ माब्लाबा माब्लाबा बाहायनाय मोनो। बेराफारसेथिं भारतआरि मोसानायफ्राव हिन्दुस्थानी आरो कर्नाटकी (10 थातनि) गुबुन गुबुन राग-रागिनिनि सायाव सोनारनानै देंखो दामो

एबा खनो। बर 'नि दामनायाव बिसमपदी बिदाम गैया, दामनाय खननायाव मार्गीय राखि मोनसे नुब्लानो बेफोरखौ बुरखांना सिरि खालामनाय, बोखावनाय लोगोसे सास्थोरारि महर होनायनि राहा दिनैसिम लानाय जायाखै।

भारतआरि सास्थोरारि राग-रागिनिफोराव मुहिनि गुण दं होननानै फोथायो। जैरै दीपक रागजों अर जोंहोनो, मेघमल्लार रागजों अखा हाहोनो, बसन्त रागजों गोरान दालाइयाव बिबार बारहोनो हायो होननानै फोथायो। खेराइ मोसानाय दामनाय देंखोफोरनिबो मोदाइयारि गुण दं। सैत्र दाननि जोबथा हरनि फुंसि फुंसि समाव गोदान बोसोरखौ बरायनो दामनाय सश्रावलि देंखोआ जेसेबां गोजानसिम खोनाहैयो बे ओनसोलसिम जिबौनि बिदैया गला जाहैयो होननानै फोथायो। बेनि अनगायैबो अखा हायि खराननि समाव सिबियारि आरो दामग्रा देग्राफ्रा ओंखाम रसा थानानै गोथार गोसोजों आग्रां मोदाइखौ बाउनानै अखा लुबैनानै बे देंखोखौ दामब्ला अखा हायो होन्ना फोथायो। बिदिनो गोथार आरो मुहिनि गुण गोनां आरो गुबुन मोनसेया जादों थुंग्रि गानाय मोसानायनि देंखो।

सा सात्रां बे सावरायनायनिफ्राय जों मिथिनो हाबायदि खेराइ मोसानायफ्रा गोरलै, गुरै नाथाय गोथौ सानथौ गोनां। सास्थोरारि मोसानाया मोनसे जानो थाखाय जा जा गुण आखल नांगौ बेफोर खेराइ मोसानायाव दं। खेराइ मोसानायाव खम मुद्रा दं होननानै एबा मोदोमनि गासै बाहागोनि बाहायनाय गैया होननानै बेनि मेथाइयारि गुणा हाइलाडखै। मोसागोरोंफोरखौ बे मोसानायनि गोरलै, गुरै शौलि, आदास, सिबियारिफोरखौ सिबि सानथौ, दार्शनिकफोरखौ बेनि दर्शन, गथ'-गथाइ, साधारण मानसिखौ बेनि खबाम, समयनाया गोसो बोनो हायो। गोजोन होनो हायो बे खेराइ मोसानाया। थेवबो खेराइ मोसानायनि गोथौ गियाननि ओंथिया बे मोसानाय फोरखौ बुरखां, फोसाबखां, दाफिन-दासि स्राय स्राय खालामना आंगो आखलजों मुद्रा बिदामफोरनि मोजां बिजिरथि, सिनायथि होना सास्थोरारि महर होनो जों नाजानांगौ जाना फेदों। गंसे फोरोंसालि गायसननो गोनां जादों। हारसिडै बेखौ मावनाया एसेल' बाश्रा नड। बेनि थाखाय आसु-सु मोननाय गैयाजासे मददनि आखाइ फोलावनो नांगोन आरो हान्जासे आंगो हारिमु सिबिसुला मानसिया बेनि मुडै-जिउयै-माहामै खामानि मावफुंनो नांगोन। अब्लासो बर 'नि बे समयना हारिमुखौ जामलांनाय, थैनाय आरो आस 'खान्दा उस्तादनि महरखौ होनायनिफ्राय रैखा मोनगोन आरो हादरनि सिथ्लायव मोगथां महर फसं जागोन।

सोदोबथि :

बाथौ - मोनबा गोथौ सानसि
बिथाइ - आर 'ज, बिनाय खामानि
खुलि - जायगा
बिबाउ - बाउनाय खान्थि
अनस्रायनाय - अनसायनाय
गियानथौफ्ले - दर्शन
थारनाय - गोथार खालामनाय
हेंग्रा - बादा, होबथानाय
रोजोब - गोरोब
इसादि - इसारा
सि - जिउमा
ताल - बिदाम
बिसम - समान नडै
लय दावथाइ - खबाम, छन्द, हांखो गोरोबनाय
मार्ग - सास्थोरारि संमेथाइ, धुपदी मेथाइ, लामा एबा खान्थिगोनां
मुद्रा - मोसानायाव बाहायनाय आखाइ आसिनि फाव
खिरमै - फारियै
गोहैलो - गुरै, लासै, माहि
फाइखि बिदाम - तालनि दावगासार एबा बिस्तार थाथौ
सामग्रिक - गासै
सिखिरि - गुबुन, साफ्रोम
फुंसि फुंसि - सोरांनाय सम, सोरांहां जानाय सम, सोरांथिं
उस्ताद - अ 'स्ताद, गुरु
आसु - सु-गोरोबि, सिनायि।
जिउयै माहामै - गोसो मोदोमै, गोसो देहा होसारनाय।

सोंथि :

1. बर 'नि धोरोमा मा ?
2. खेराइ सोदोबा माबादियै सोमजिदों ?
3. मोसानाय सोदोबा माबादि सोमजिदों ?
4. खेराइ मोसानाया मा ?

5. बर 'नि मोसानाय आरो मेथाइ खननाया बबेयाव सोमजिदों ?
6. जारा फागलाया सोरमोन ? बियो खेराइखौ माबादियै खुंदोंमोन ?
7. मंलीया सोरमोन ? दौदिनि मोसानायजों बिहा मा सोमोन्दो दं ?
8. दौदिनि मोसानाया माब्लानिफ्राय जाजेनदोंमोन आरो बेखौ सोर मोसाजेन्दोंमोन होनना फोथायनाय जायो ?
9. बाथौ फुजानि गाहाइ मोदाइफोरा साबेसे आरो सोर सोर मुंख' ।
10. खेराइ मोसानायफोरनि मा मा गोथौ ओंथि दं बिजिरना लिर ।
11. बाथौ गुदि एबा आर 'ज सालियाव बर 'नि खेराइ मोसानाय हाबाखौ माबादियै मावफुं होनाय जायो ? बेयाव सोर माबौरै मदद होयो ?
12. मार्ग आरो देशी मोसानाया मा ?
13. ताण्डव आरो लास्य मोसानाया मा ?
14. भारत नाट्यम, कथक, कथाकली, मनिपुरी मोसानायफोरा मा मा ? बर 'नि खेराइ मोसानायजों बेफोरखौ रुजु जायो नामा ?
15. हिन्दुस्थानी आरो कर्णाटकी संमेथाइनि सिनायथि हो ।
16. मेथाइनि राग-रागिनिया मा ? बेनि गुणफोरा माबादि ? बर 'नि खेराइ मोसानाय-दामनायफोराव बेफोरबादि गुण दं नामा ?
17. खेराइ मोसानायाव मा मा सास्थोरारि संमेथाइनि गुण दं ?
18. खेराइ मोसानायखौ मानो आरो मा राहायै रैखा खालामनांगौ ?
19. बेखेवथि लिर:
 - (क) बर 'नि मोसानाय, मेथाइ खननाय.....रंजानाय ।
 - (ख) बे सल 'आ आरो मोनसे बाथ्रा..... जाफुंनो हाया ।
 - (ग) खेराइ मोसानायनि बे गियान थौफ्लेयारि..... एसे जुदा ।
 - (घ) सा साज्रां..... गोथौ सानथौ गोनां ।
 - (ङ) थेवबो खेराइ मोसानायनि.....बेबो थार ।

फरा गियान :

रोजाबनाय, मोसानाय आरो दामनाय बे मोनथामखौनो भारतारि सास्थोर बादियैब्ला संमेथाइ बुंनाय जायो । बेफोरनि गेजेराव रोजाबनायानो सेथि जायगा लादों । रोजाबनाय आरो मोसानायाव ताल-लयफोर होनो थाखाय बाहायनाय जायोखायनो दामनाया बे मोनथामनि उनथाराव जायगा मोनदों । बे मोनथामनि

मार्ग आरो देशी मोननैयै बाहागो दं । मार्गआ जादों संमेथाइ सास्थोरनि खान्थि मानिनानै आरो देशीया गुबुन गुबुन आन्सोलाव गावबा गाव खान्थिमते बे मोनथामखौ बाहायनाय मोननै गुबुन आदब । सास्थोरारि एबा सास्थोरारि राहा-लामा लानायखायनो बेखौ मार्गीय एबा मार्ग संमेथाइबो बुडो । भारतारि मार्ग एबा सास्थोरारि संमेथाइफोरनि गेजेराव सा भारतनि हिन्दुस्थानी आरो खोला भारतनि कर्णाटकी संमेथाइ बे मोननै बाहागो दं । भारत नाट्यम, कथक, अ'डिचि, मनिपुरी, कथाकली आरो दा आसामनि सत्रीया संमेथाइफोरखौ भारतारि सास्थोरारि एबा मार्ग संमेथाइनि सिमानथि होनाय जादों । बर 'खेराइ मोसानाया दासिम देशी एबा ओन्सोलारि संमेथाइ बादियैनो दंब्लाबो बे रायथाइनि लिरगिरि आरो गुबुन माखासे बर ' आरो गुबुन हरिनि फुण्डितफोराबो भारतनि गुबुन गुबुन सास्थोरारि संमेथाइ सिमानथि मोननाय संमेथाइफोर बादि माखासे गुण थानाय नुनो मोनदों । गुबैयै खेराइ मोसानाय बादि गुणा बांसिन आरो मोजाडैसायख 'ना सुस्रांना लायोब्ला बर ' संमेथाइयाबो भारतारि सास्थोरारि एबा मार्ग संमेथाइयाव लासै लासै हाबनो खाबु मोननो हागोन । नाथाय गोसो होसारना मावनो हाब्लासो बेयो जाफुंगोन आरो बुहुम दरबाराव बर ' हारिमुखौ सिनायथि होनो हागोन होनना लिरगिरिया बुंदों ।

फोरोंगिरिनिसिम :

खेराइ रंजाथाइयाव फालिनाय बाथौ धोरोमआव थानाय खेराइ मोसानायफोरा जोबोद गोथौ ओंथिगोनां । बेयाव बाथौब्राइजों लोगोसे फुजिफानाय सा। 8 मोदाइनि गोहो आरो बायदि मैयाफोरखौ दौदिनिया मोसानायनि फाव-फेसनजों फावथिनाबादि दिन्थिफुंना होयो । मोनफ्रोमबो खेराइ मोसानाया आबुं फावथिना नडाब्लाबो बेफोरखौ खावसे फावथिनाबादि मोनदांनो हायो । बे खेराइ मोसानायफोराव दौदिनि मोसानायनि गेजेरजों बेरखाडे । बेबादिनो बर ' खेराइ मोसानायफोराव दौदिनि मोसानायनि गेजेरजों बेरखाडे । बेबादिनो बर ' खेराइ मोसानाय रंजाथाइयाबोदि एफाग्राब गोथौ आरो सानमि बहरा बेखौ फरायसाफोरनो बिजिरना दिन्थिनांगौ । खेराइ मोसानाया मोसाना रंजानाय फोरबोल ' नडा बेनि गेजेरजों सुबुं हारिनि जिउ लामायाव नुजानाय बायदिसिना जेंना आरो बेफोरखौ बारग 'नायनि माखासे इसारा होनाय जायो होनना फोरोंगिरिया फरायसाफोरनो बिदिन्थिजों बिजिरना दिन्थिनांगोन ।

छरखौ जं नाइन बान

मदाराम ब्रह्म

फराखौ सायख 'नायनि थांखि :

छरखौ जं नाइन बान (सोरखौ जों नायनो बानो) खन्थाइया गोजाम थाखोनि बर' खन्थाइ। मदाराम ब्रह्ममोननि समआव बर' खन्थाइयाव रहस्य सानथौ एबा मिष्टिकबाद खन्थाइनि गोहोमआ बांसिनमोन। क्लासिकवाद जोबनायनि उनाव रहस्यबादआ बर' खन्थाइखौ साग्लोबदोंमोन। बेनि उनावनो र'माण्टिक मुगा हाबदोंमोन। मदाराम ब्रह्मनि समाव बर' खन्थाइयाव रहस्य सानथौ आरो र'माण्टिक सानथौवा गलाय - मोनदेर जानानै सोलिदोंमोन। बे मुगानि बर' थुनलाइखौ गोजाम थाखोनि बर' थुनलाइ बुंनय जायो। 1915 एबा 1920 मायथाइनिफ्राय बे मुगाखौ बर' साहित्य सभा गायसंनायनि 1952 मायथाइसिम हमनाय जायो। बे मुगायाव थुनलाइफोरखौ लिरगिरिफोरा गावबा-गाव रावसाजों सोरजिदोंमोन। बर' रावआ मान थाखोआव फैयाखैमोन, रावखान्थि आरो सोदोबबिहुं जाफुडाखैमोन। मदाराम ब्रह्मनि सायख 'जानाय बे खन्थाइयानो बेनि फोरमान दिन्थि। बानान आरो रावखान्थिनि नेमफोरखौ दानिबादि मानिनाय जायाखैमोन। बेफोरबादि खोथाफोरखौ फरायसाफोरनो मिथिहोनो थाखायनो बे खन्थाइ फराखौ सायख 'नाय जादों।

खन्थाइगिरिनि सिनायथि :

मदाराम ब्रह्मआ 1903 मायथाइयाव दानि क'कराझार जिलानि घुनघुनिखाथा गामियाव जोनोम जादोंमोन। धुबरी हाइ स्कुलनिफ्राय 1923 मायथाइयाव मेट्रिक आनजादखौ उथ्रिनानै कटन कलेजाव फरायहैदोंमोन। बेनि उनावा 932 मायथाइयाव बै समनि हरिसिडा माइनार स्कुलनि गाहाइ फोरोंगिरि जाहैदोंमोन। बेनिफ्राय फैनानै 1945 मायथाइयाव लकेल ब'र्डनि सोद्रोमा जायो। 1948 मायथाइयाव बियो द'तमा ब्लक डेभलेपमेन्ट ब'र्डनि मावख 'गिरि जायो। बै समावनो बै ओन्सोलनि समाजनि थाखाय गोबां हाबा मावदोंमोन। 1961 मायथाइयाव बियो

बे सरकारि साखिनिफ्राय जिरोन लायो। बर' थुनलाइनि सायाव सिगां हानजानि लिरगिरि महरै गोबां भान्दारि जगायनायनि थाखायनो बिनो आसाम सरकारा 1985 मायथाइनिफ्राय थुनलाइ पेनसन होयो। बेबादिनो भारत सरकाराबो 1988 मायथाइयाव पद्मसि मुं बान्था होयो। मदाराम ब्रह्मआ समाज सिबियारि हिसाबै क'कराझार हाइस्कुल, क'कराझार कलेज, क'कराझार बि टि कलेज गायसननायाव गोबां भान्दारि होलादों। गुरुदेब कालीचरण ब्रह्मनि धोरोम फोसावनाय, हारिनि खोमसि फोथायनाय सुझानाय, गुबुन गुबुन समाज आरो हारिमु फोसावनायफोराव गोबां मदद होदोंमोन। खन्थाइगिरि हिसाबै बर'नि गुदि सिबसा आरो आर'ज बिजाबखौ 1926 मायथाइयाव सेबखांना दिहनदोंमोन। बेनि सिगां 923 मायथाइयाव रुपनाथ ब्रह्मजों लोगोसे "खन्थाइ-मेथाइ बिजाबखौ" साफायना दिहनदोंमोन। बिनि खन्थाइफोरा धोरोमारि सानथौ, थुलुंगा आरो सथबांसाजों आबुं। मदाराम ब्रह्मआ 1903 मायथाइनिफ्राय गोलाउ जिउ भ'ग खालामनानै 1990 मायथाइनि 6 सेप्टेमबर खालि रंसारि जायो।

गुबै फरा :

छरखौ जं नाइन बान

बयखौब बिदा-फंबायछ नुय जंदि

बे मुलुगाव बिब-बिनानावछ बुंनानै दं जंनि।

छरखौ अम्बला जं नाइन बान।

बिमा माछेनि बिफा साछेनि

जं बयब फंबाय बिदा

आं गेदेर नं उन्दै सान्नानै

गावजं गाव नाइन दाबा।

सान्नानै नाय छरखौ बुंन शाला-शाली।

अबं गसाइया सिमाडव खन्थायमन

आलारि दामब्रानि बिमान

बयनिब बिबै खर' फुथुन

गाछिब लानानै साछेल' आंन।

बुं दैखौ रुबला दैया बहा थाड

अन्थाइजं अन्थाइ बुजाबब्ला अर जड
अन्थायाव अर दड बेखौ छर बुंन ?
आं जेरावब बइनावब थादं
नाथाय आंखौ छर नुन
छर आंखौ सानछ हान ।
जेब आंनावन उजिदं आंनावन गमरदं ।
छरखौ मुगैन छरखौ दान्न
बइब आंन, आंन बइब
रायजआन साछे, साछेयान रायज ।

सोदोबथि :

नाइन बान (नायनो बानो) – सैनो हायि
शाला –शाली – रायनाय राव
गमरदं (गोमोरदों) – थैदों, थैना गोरोबदों
सानछ हान (सानस' हानो) – मोनदांनो हानो
खन्थाय – सोंखारि, राय
खर 'फुथुन – खर' गोमोन, बैसो जानाय

सोंथि :

1. “छरखौ जं नाइन बान” होनना खन्थाइगिरिया बे खन्थाइयाव मा गोथौ सानस्रि बाहायनो नागिरदों ?
2. जों मानो बयखौबो गावनि आंगो असे साननांगौ होनना खन्थाइगिरिया बुंदों ?
3. “बिमा माछेनि बिफा साछेनि जं बयब फंबाय बिदा” होननानै सोरखौ सोर बिमा-बिफानि फिसा होनना माबादि बाहायनो थिनदों ?
4. “बुं दैखौ रुब्ला दैया बहा थाड” होनना खन्थाइगिरिया मा गोथौ ओंथि फोरमायनो नागिरदों ?
5. रहस्य सानथौनि गेजेरजों खन्थाइगिरिया जिउमानि सोमोन्दै मा बुंनो नागिरदों ?
6. बे खन्थाइखौ गोजाम थाखोनि बर' खन्थाइ होनना माबोरै मिथिनो हायो ? गोजाम थाखोनि एबा गोजाम मुगानि बर' थुनलाइया बबे समफारियाव सोलिदोंमोन ?

7. बेखेवथि लिर:

- (क) छरखौ जं नाइन.....नुय जंदि ।
- (ख) आलारि दामब्रानि.....आंन ।
- (ग) बुं दैखौ रुब्ला.....बेखौ छर बुंन ।
- (घ) आं जेरावब.....गमरदं ।
- (ङ) छरखौ मुगैन.....सासेयान रायज ।

फरा गियान :

बे खन्थाइयाव बर' लिरनाय थुनलाइनि गोजाम मुगानि खन्थाइ । बेनि लिरनाय समफारिखौ 1915 मायथाइनिफ्राय जागायजेननानै बर' साहित्य सभा (बर' थुनलाइ आफाद) गायसननाय 1952 मायथाइसिम हमना लानाय जायो । बै समनि खन्थाइफोरा क्लासिक आरो मिष्टिक सानथौनिमोन । खबाम गोरोबनायजों लोगोसे बै समनि खन्थाइफोरा इसोर, जिउमा, सोरगो-नोरखो बायदिसिना सानखानायनि सोंलुजों आबुंमोन । बर'फोरनि बेबादि साननाया भारतारि हिन्दु सास्थोरनि साननायजों समानै गोरोबो । बेफोरबादि सानथौखौनो आयदा महरै लानानै खन्थाइगिरिया संस्कृत सास्थोरनि “बसुधैबो कुटुम्बकम” थामहिनबा बुहुमानो बाहाइ-बाहागि-गियाथि साननांगौ होनना बिथोन होदों । बुहुमनि बयखौबो सासेल' इसोरनि फिसाबादि साननानै जों बयखौबो समानै अनना सोलिनांगौ होनना सुबुरन दिथा होदों । मानोना खन्थाइगिरिया गावबो सासे इसोरनिफ्रायनो जोनोम मोनदों । बेनिखायनो “आं” आरो “नौनि” गेजेराव गोरोबलायनाय सोमोन्दो नुनो मोनदों । आरोबाव जिउमायादि जोबनो रोड बखौबो फोरमायनो थानानै उजिलाय थैलाय बादि गिदिंबाय थानाय जिउमानि थाजिम महरखौ दिन्थिदों ।

फोरोंगिरिनिस्मि :

फोरोंगिरिया भारतारि हिन्दु सास्थोरनि इसोर-जिउमानि सोमोन्दै फरायसाफोरखौ गुवारै बिजिरना होनांगोन । अन्थाइयाव अर थानायबादि देहायावबो जिउमाया हाबना थायो । बेखौ नुवाब्लाबो गोमोरा । दैआ खफ' जानानै बारजों अखां सायाव बिरलांब्लाबो जोमै जानानै बुहुमाव अखा हादैजों गोलैफिनो । जिउमायाबो थैनायनि उनाव देहाखौल' सोलायना गोदान जोनोम जाफिनो होनना खन्थाइगिरियाबो फोथायो । थुनलाइयाव रहस्य सानथौवा मा बेखौबो बिजिरना होनांगोन ।

संसारनि अन्नाय

प्र'मद चन्द्र ब्रह्म

फराखौ सायख'नायनि थांखि :

बे खन्थाइया बर' थुनलाइनि जारिमिन बादियैब्ला गोजाम मुगानि खन्थाइ । बे मुगानि खन्थाइ थुनलाइयावबो क्लासिक आरो मिष्टिक सानथौवानो बांसिनमोन । नाथाय क्लासिक मुगानि खन्थाइ आयदा, छन्द, गहेनाफोरा एसे लोरबां जाबोनां हमदोंमोनब्लाबो मिष्टिक एबा रहस्य सानथौवा बै समाव खन्थाइ थुनलाइनिबो गाहाइ आखुथाइमोन । छन्द एबा खबाम दानाया बर' खन्थाइयावबो बै समाव बारा गोनांथार जानानै गैयामोन । नाथाय रहस्य सानथौ आरो बेनि लोगो लोगो र'माण्टिक सानथौआबो बर'खन्थाइ थुनलाइयाव माब्लाबा माब्लाबा हाबफादोंमोन । बे खन्थाइया मोनसे बेबादि मिष्टिक आरो र'मान्टिक सानथौनि गलायमोन्देर खन्थाइ । अन्नायजों मुखुब थासेयावबो माब्लाबा बेनि नेवसि जानायनि बाश्राबो सफैयो । बेनिखायनो खन्थाइगिरिया बेबादि अन्नायनि बायदि मैयाखौ नागारना अखां सायाव थानाय सोरगोसिम बिरलांनो नागिरो । मानोना इसोर होननाय सोरगोआव थाग्रा सासेयासो गुबै अनगिरि बेबादि सानस्रिगोथौ फोरमायनाय बै मुगानि खन्थाइफोरनि सोमोन्दै मिथि होनो थाखायनो बे खन्थाइखौ सायख'नाय जादों ।

खन्थाइगिरिनि सिनायथि :

प्रम'द चन्द्र ब्रह्मआ 1916 मायथाइयाव क'कराझार जिलानि ग'दामारि गामियाव जोनोम मोनो । फरायसालियाव फरायजेननानै उनाव 1933 मायथाइयाव मेट्रिक आनजादखौ उश्रिनानै ढाकानि रंपुर कलेजाव फरायहैदोंमोन । 1937 मायथाइयाव गुवाहाटीनि कटन कलेजनिफ्राय बि.ए. खौ उश्रिनानै कलिकाता मुलुग सोल्लोंसालिनिफ्राय असमीया आयदायाव 1941 मायथाइयाव एम.ए. खौ उश्रियो । बे बोसोरावनो ए.सि.एस. आनजादखौबो नैथि थाखोआव उश्रिनानै एस.दि.सि. साखि मोनो । गोलाउ सम एस.दि.सि. साखि मावनानै 1971 मायथाइयाव साखिनिफ्राय जिरोन लायो आरो 1992 मायथाइयाव रंसारि जायो ।

फरायसा समनिफ्रायनो थुनलाइ सोरजिनायाव बिथाडा नांथाबबोदोंमोन । बिबार लाइसिनि उनाव बिथाडा सुजुनानै दिहुननाय बिथ'राइ, अलंबार, हाथरखि हाला, रुप ओ चिन्ताधारा (मुस्रि आरो सानस्रि) बायदि बिजाब एबा लाइसिनि गेजेरजों बर' थुनलाइखौ जौगाहोनायनि बिबानखौ लादोंमोन । बिथाडा गुबुैयै खन्थाइगिरिमोनब्लाबो रायथाइ, सावरायथाइ, सेन्सास रिपर्टफोरखौ लिरनानै फोसावदोंमोन । बिथाडा 'सनाकी बिजाब' मुंनि खन्थाइ बिजाब सुजुनानै 1968 मायथाइयाव दिहुनो । प्रम'द चन्द्र ब्रह्मनि मख'जाथावसिन खामानिया जाबाय बर'-इंराजी-हिन्दी मोनथाम रावनि सोदोब बिहुं सुजुनाय । बेखौ 1996 मायथाइयाव सेबखांनानै दिहुननाय जायो । बिदिनो जिउ थाजासेयाव हानायमानि बर' थुनलाइयाव बिहोमा होलांनानै 1992 मायथाइयाव रंसारि जायो । 'दै बाज्रुम' खन्थाइखौ बिथाडा 'प्रमथेश' मुं लानानैसो लिरदों ।

गुबै फरा :

संसारनि अन्नाया जेसेखि आंगो जाया
जोसे नोडो गोसो जिउ होसारथारा
हुरा-हुरानो जिबौ बादिनो बिनि सौनाया खारथारा ।
जेब्लाबो बियो फुराया मदरा मेलेम थारा,
सोरबा बिखौ बोखानो हागौ
माब्लाबा बियो गोमानो हागौ
नोंनि अन्नायाबो नेवसि जानानै
जानो हागौ सानसे जेबो नडै ।
बेफोर जाबायसै गमामायैनो
गाव गावनिबोल' जुथिबोल'
बेफोर जाबाय थिखानि मावनाय दांनाय
खामाया जाग'ब्ला ब्लाद थांनाय ।
होनब्ला सोरखौथो अन्नांगौ जाखो ?
हाहु सिडव थानो हाथारलिया हालाय हाफाय ।
अबं अखां बिखायाव बिरलांनो लुबैथारबाय ।
आं लुबैयो अन्नाय औरैबादि
जायजों खारगोन जेब्लायनि गांनायनि
रावबो बोखानो हायि ।
जेब्लाबो नाजाव जायि,

जाय अन्नाया होफिन जायोबो फालासे
जेसे लुबैयो एसे ।
आं लुबैयो औरैबादि अन्नायसो-
जेसे हागौ एसे,
फिरायो फालासे,
नेवसि जाब्लाबो जिया गोदै,
सैमा बायसा नडसै ।
हाबाब बेबादि अन्नाय
बाव मोन्नाय हाबाब बाव मोन्नाय ?
गेदेरफ्रा बुंदों
इसोर होन्नाय सासेया दं,
लामा मोना जाबाय
बेखौनो नायसानांगौ जाबाय
नायसा नांगौ जाबाय ।

सोदोबथि :

मेलेमथारा - थावथारा, जुथिमोनि, गोजोनि
जुथिबोल' - जुथिल', गोसोनि रंजानायल', गोजोननायल'
गावनिबोल' - गावनिल'
हाहु - बुहुम
जिसे - जेसेबां
खामाय - खामानि
अबं अखां - अखांमा, अखांमा
फिरायो फालासे - होफिननो हायै
बायसा - बादि, बेबादि
लामा मोना- आगोर मोना, राहा गैया
जिया - जाय

सोंथि :

1. अन्नाया माबादि होननायै खन्थाइगिरिया सोंदों ?
2. खन्थाइगिरिया अन्नायखौ मानो थिखा मावनायजों रुजुनो नागिरदों ?
3. संसाराव सुबुनि अन्नायनि सायाव खन्थाइगिरिया मानो फोथायनाय गैया ?

4. थाजिम अन्नायखौ बबेयाव आरो सोरनिफ्राय खन्थाइगिरिया मोननो हास्थायदों ?
5. बेखेवथि लिर:
(क) संसारनि अन्नाय.....खारथारा ।
(ख) जेब्लाबो बियो.....जेबो नडै।
(ग) बेफोर जाबाय.....ब्लद थानाय ।
(घ) होनब्ला सोरखौथो.....लुबैथारबाय ।
(ङ) आं लुबैयो.....जेसे लुबैयो एसे ।
(च) आं लुबैयो औरैबादि.....सैमा बायसा नडसै ।

फरा गियान :

बे खन्थाइया बर 'गोजाम थुनलाइ मुगानि सोरजि । खन्थाइयाव मिष्टिक एबा रहस्य सानथौनि लोगोसे दिन्थि नेरसोन एबा प्रतीक सानथौबो सरजाबफानाय जादों । "संसारनि अन्नाय" खन्थाइनि गेजेरजों संसाराव सोलिननाय समाव मोगा मोगि जानाय राइजो जानायनि गिलिर बिबानखौनो दिन्थि नेरसोन हिसाबै बाहायनाय जादों । बे गिलिर राइजो जानाय बिबानखौ रावबो जेब्लाबो थाब्रोम नारगारनो हाया । अननाय - अनजानायनि गेजेरजोंनो संसार एबा राइजो जानाया । नाथाय रावखौबो रावबो अननायनि गेजेरजों लोगोआव लांफानो हाया । थिखा मावनायबादि राइजो जानायाबो खामानि जोबागौमानि मुखुब थानाय नाथाय खामानि जोबोब्ला फिन थांफिननाय बादि संसार जानायाबो । रावबो एखे खामानियाव जेब्लाबो थाबाय थानो हाखाया । नाथाय बेबादि गिलिर खामानिखौ सोर मावहौखो बेबो मोनसे सोंलु । बेखौ मानो मावनांगौ बेबो गुबुन मोनसे सोंलु । बेफोरनो रहस्य एबा मोनदानो हायि गुमुर । नाथाय मानसि गिदिरफोरा बुंनाय बादिब्ला इसोर होननाय बयनिबो बिगुमा सासेयानो बेखौ हरो । बे गुमुरखौनो नायबिजिरनो खन्थाइगिरिया हास्थायो ।

फोरोंगिरिनिस्मि :

फोरोंगिरिया मिष्टिक आरो र'मान्ठिक खन्थाइनि सोमोन्दै फरायसाफोरजों सावरायगोन । फरायसाफोरखौ बर' रावनि बेबादि खन्थाइ दंबावो नामा सायख'नो सावरायनायै थुलुंगा होनाया गाहाम ।

बेसे गोजोन, बेसे गोजों

नीलेश्वर ब्रह्म

फराखौ सायख 'नायनि थांखि :

सासे देंखोगिरि महरै मिथिजानाय नीलेश्वर ब्रह्मआ सासे खन्थाइगिरिमोनबो ।
बिथानि गोबां मेथाइफोराव खन्थाइनि रोसि नुनो मोनो । गोरलै रावजों फोरमायनो
हानाया बिथानि मोनसे आरखुथाइ । बेनिखायनो बिथानि बे खन्थाइखौ फरायसाफोरनो
होनाय जादों ।

खन्थाइगिरिनि सिनायथि :

1927 ईं मायथाइयाव क 'कराझार जिलानि गइबारि गामियाव जोनोम मोनो ।
बिनि बिफानि मुडा रंसारि दल 'राम ब्रह्म आरो बिमानि मुडा रंसारि गोनोमि
ब्रह्म ।

बिथां ब्रह्मआ उन्दैनफ्रायनो मेथाइ रोजाबनो जोबोद मोजां मोनोमोन । गाव
मेथाइ सोरजिनानै उन्दैनफ्रायनो खनोमोन । बिथाडा भाटखाण्डे मिउजिक कलेजाव
मेथाइनि सोलोंथाइ लाहैदोंमोन । बिथाडनो बर 'फोरनि गेजेराव गिबि गिबियै
बर 'मेथाइखौ रेडिअ 'नि गेजेरजों फोसावदोंमोन ।

बिथां नीलेश्वर ब्रह्मआ गुबैयै मेथाइ लिरगिरि । बिथांनि गोबां मेथाइयानो
खन्थाइनि गुणजों आबुं । बिथांनि बिजाबनि मुडा जादों " बालाबगानै बर 'नि
खन्थाइ" ।

1986 ईं मायथाइयाव बिथाडा रुसारि जायो ।

गुबै फरा :

बेसे गोजोन बेसे गोजों नों
आंनि गांनाय बिखायाव,
नाथाय नों साया-माया गेलेयोल'
आंनि मेगनाव ।

बावनो हालिया नोंनि
हायना महरखौ,
सोलिनो हालिया रैसुमै
नोंनि गारांखौ ।
खाराव माराव नागिरबायो
अखां सायाव,
थाद ' थाद ' खोनासडे बिजिरबायो
दाउनि गाराडव ।
नायफै नायफै बबाव नों
दाउमा दाउसा बार जानानै,
गाब्बायनाय रथ'-रथ'
मेगननि मोदै ।
बबाव थादों था नों
आलो-आलो गोजोन गोसोजों,
समा फैब्ला आंबो थांगोन
हालो-दैलो रंजा दावलजों ।
आख'-फाख' खालाम हैगोन
नोंनि मावनायाव ,
बार जोमै जानानै
थांगोन आं नोंनि देरायाव ।

सोदोबथि :

साया -माया - नुफामाफा
दावलजों - लामाजों
देरा - न'; खन्थाइयाव सोरगोखौ बुंदों ।

सोंथि :

1. खन्थाइगिरिया सोरनि हायना महरखौ बावनो हाया बुंदों ?

2. खन्थाइगिरिया सोरजों नायफै जानो लुबैदों ?
3. खन्थाइगिरिया सम जाब्ला बबेयाव थांनो नागिरदों ?

फरागियान :

खन्थाइगिरिया अनसुलि बिमाखौ, बिनि समायना महरखौ मोनदाडे, मिथियो । बियो जोबोरै गोजों आरो गोजोन । नाथाय बिखौ मोनाखैसै । सायामायाल ' मोनदाडे । नाथाय रुंसारि बिमाखौ बावनो हायाखै । गारना थानो हायाखै । बेखौ अखरां सायाव थायो होनना मिथियो । मिथिंगानि महाराव खन्थाइगिरिया बिखौ मोनदाडे, नागिरबायो । आरो सम सफैब्ला बेनि सेराव थांगोन होनदों ।

फोरोंगिरिनिसिम :

फोरोंगिरिया नीलेश्वर ब्रह्मनि खन्थाइ आरो मेथाइनि सोमोन्दैबो सावरायगोन । बेयो दोंसे दाहा खन्थाइनिबो नेरसोन ।

सम बेसम

अरबिन्द उजीर

फराखौ सायख 'नायनि थांखि :

बे सम बेसम खन्थाइया बर' रावनि दोंसे गोदान खन्थाइनि नेरसोन । गोदान खन्थाइया गुबैयै खबाम गोरौबै उदां सानस्रिनि खन्थाइ । क्लासिक आरो र 'मान्टिक मुगानि खबाम आरो गहेनानि थाखाय नांप्लेना खन्थाइ सोरजिनाय खान्थिया बेबादि गोदान खन्थाइफोराव गैया । जेंना-जेंसि बुंफबनाय संसारनि थार जाथाइनि सायाव सोनारनानैसो लिरनायमोन । कमिउनिष्ट स 'भियेट हादराव बेनि जोनोमा जाजेनदोंमोन । उनाव इंग्लेण्ड आरो आमेरिकायाव बेबादि खन्थाइ आयदाया देरनो लाउनो खाबु मोनो आरो गोदान महर मोखांजों बुहुमाव गोसारलाडे । बेबादि खन्थाइनि महरआ खन्थाइ मुलुगनि मोनसे गोदान जांखिथाइ । गोदान मुलुगनि बिगियान आरो जुन्थिनि दावगाखांनायजों बेबादि खन्थाइया सुबुं समाजखौ सोलिलानो सांग्रां खालामदों । बेबादि गोदान खन्थाइनि बिखायाव रुजुथाइ आरो नेरसोन दिन्थिथिया रोखा बेरखाडे । बेफोरबादि गोदान खन्थाइखौ सिनायथि होनायनि थाखायनो बे खन्थाइखौ सायख 'नाय जादों ।

खन्थाइगिरिनि सिनायथि :

अरबिन्द उजीरनि जोनोम जायगाया बागसानि भेबेला गामि । बिथाड गुवाहाटी मुलुग सोल्लोसालिनिफ्राय इंराजि आयदायाव एम.ए. पास खालामो । बियो फरायसा समनिफ्रायनो खन्थाइ सोरजिबोदोंमोन । बिनि दासिम सोरजिनाय खन्थाइ बिजाबनि मुडा जाबाय - मोन्दांथिनि रोजाबथाय' । खन्थाइनि अनगायैबो सम सम बियो रायथाइबो लिरनानै लाइसि बिसम्बिफोराव फोसावनाय नुनो मोनो ।

बर' थुनलाइ आफादआ बिनि मानगोनां थुनलाइ सोरजिनायनि सिनायथि होनानै ' मोन्दांथिनि रोजाबथाय' खन्थाइ बिजाबनि थाखाय 1996 मायथाइयाव रांसार बान्था होदों । 'सोदोबनि सोलेर' (2008) खन्थाइ बिजाबा बिनि गुबुन

सोरजि। दासान्दि बियो कारबि आंलंनि दकमका हाइयार सेकेन्दारि स्कुलनि इराजी आयदा फोरोंगिरि।

2010 मायथाइनि थाखाय बियो बनि 'मोदोबनि सोलेर' खन्थाइ बिजाबनि थाखाय साहित्य अकादेमि सोरजिलु थुनलाइ बान्था मोनदों।

गुबै फरा :

गोसो जाब्लानो जों

लामानि हाद्रि बिरफुं होनानै फेखाय लांहोनो हायो दावहारु गराइ

एबा साम' बादि गोहैलोयै थाथिरनो हायो गुथालनि थाखाय लैथोनि रुगुडाव।

थालांनो हागौ गराइ बादि खारनानै

एबा थांबाय थानो हागौ साम' बादि थाथ'नानै

अर जाना जोंनो हागौ गोमोर लांनायनि थाखाय

जेब्लाबो खोथा बुंनाडैनि थाखाय बुंबाय थानो हायो आन्थोर जयै खोथा

एबा खुगायाव आसि थुथाबनानै थाथ'नो हायो खोथा बुंनानायनि थाखाय।

मैया आरो दिनैनि टेबलनिफ्राय

खनखांनानै लाबोनाय घरिनि सुजों

जों दायो सम-बेसम एबा बेसम-सम।

बिबारनिफ्राय फाइलि सिरिनायनि सिगांनिफ्राय

बिफांनिफ्राय बिलाइ सिरिनायनि उनहालागै

फिथाइनिफ्राय बिफां आरो रोदानिफ्राय हा एंगार जालांनाय समहालागै

खालि बिबार आरो फिथाइनि थाखाय

समखौ जावनानै सान दिहुननानै लाबोनायनि थै-गोलोमदैजों

थांनानै थायो जोंनि जिउ।

सोदोबथि :

गोहैलोयै - गुरैयै, लासैयै

आन्थोर जयै - फारि जोबै, जोबनो गैयि

सोंथि :

1. सम बेसम खन्थाइयाव खन्थाइगिरिया मा मा रुजुथाइ आरो नेरसोन दिन्थिथिनि हेफाजाब लादों ?
2. सम बेसम खन्थाइनि गेजेरजों खन्थाइगिरिया मा गुबै सानथौ फोरमायनो नाजादों ?
3. मानसिनि जिउवा माबादि थांनानै थायो होनना खन्थाइगिरिया बुंनो नागिरदों ?
4. बेखेवथि लिर:
 - (क) मैया आरो दिनैनि.....सम बेसम।
 - (ख) खालि बिबार.....जोंनि जिउ।

फरा गियान :

मानसिनि जिउ खांनायनि लामाया जोबोद गुदु गादा। बेयो हास्थायनाय नाजानायनि गेजेरजों खारनाय आरो थाद'नायनि ज'खाल'। बायदि खामानिनि गेजेरजों मानसिनि जिउवा सोलिलाडे। बेफोर खामानि मावनायनि समफारिखौ सुबुं हारिया दानिया गोदान मुगानि बिगियान आरो जुन्थिनि दिहुननाय घरिनि सुजों सुनो लाबाय। नाथाय गोदो मिथिंगानि आखुनिफ्रायनो बेफोरखौ मोनदांनो हायोमोन। थेवबो सुबुं हारिया थैखौ गोलोमदै खालमानानै गोबां हास्थायनायनि गेजेरजोंसो गाव मावनायनि फिथाइ दिहुननानै समखौ महर होनो हायो।

फोरोंगिरिनिसिम :

फोरोंगिरिया गोदान खन्थाइनि सोमोन्दै फरायसाफोरजों बेनि फारि दावगानि सायाव गुवारै सावरायनो हायो। मानोना बर' खन्थाइ मुलुगाव दासिम गोदान खन्थाइनि आबुं सानस्रिया हाबफैयाखै। फरायसाफोरखौ बेबादि खन्थाइ सोरजिनो मावसालि (workshop) खुंनानै फोरोंगिरिया थुलुंगा होनो हायो।

मोनाबिलि

समर ब्रह्म चौधुरी

फराखौ सायख 'नायनि थांखि :

बर' खन्थाइनि दावगा लामायाव मुंख' जाथाव मुडानो जादों समर ब्रह्म चौधुरी। सासे रमाण्टक खन्थाइगिरि महरै समर ब्रह्मआ बर' थुनलाइयाव बिहोमा होलांदों। बिनि रेबगननि सोरजि 'मोनाबिलि' खन्थाइखौ फरायसाफोरनो होनाय जादों।

लिरगिरिनि सुंद' सिनायथि :

1932 मायथाइयाव कचुगाव खाथिनि पाटाकाटा गामियाव जोनोम मोनो। बिनि बिफानि मुड मालसिं ब्रह्म चौधुरी आरो बिमानि मुड सोरगोस्री ब्रह्म चौधुरीमोन। फरायसा समनिफ्रायनो ब्रह्म चौधुरीया हारि सिबिनाय आरो थुनलाइयारि हाबा मावबोदोंमोन। कटन कलेजनिफ्राय बि.ए. आनजाद उथ्रिनाय ब्रह्म चौधुरीया कटननिफ्राय फरायसाफोरा दिहुननाय - अखाफोर लाइसियाव (1954-55) 'सिजौ गेरेमसा' मुंनि खन्थाइखौ फोसावदोंमोन। समर ब्रह्म चौधुरीया गोबां लाइसि फोसावना दिहुनदों। बेफोर जादों फारियै 'बैराथी' (1970), 'बारदै सिख्ला' (1971)। बिनि खन्थाइ सोरजिनि नेरसोना खोन्दो खन्थाइमा बिजाब 'रादाब' (1968)। समर ब्रह्म चौधुरीया गोजौ सिरिनि सासे रमाण्टक खन्थाइगिरि। बिथाड 'रादाब' (1982) मुंनि गांसे सानस्नियारि रादाब बिलाइबो दिहुनदोंमोन।

बिथाड सासे राजखान्थिगिरिमोन। 1978 मायथाइयाव जनता सरकारनि दिनाव आसाम मन्थ्रि आफादनि सासे मन्थ्रि जानायनि अनगायैबो थैनाय समसिम बिथाड एम.पि. जानानै 1991 मायथाइयाव अबथिरा जिउ खोमानाडे।

गुबै फरा:

नै बे गंनीया-दैमा सेरनि शुमबिलि बारियाव
गसंनानै नायहरदों आं मोनाबिलिनि महर।
जारां खाफालाव हासिं हाथखिया
रिथि रिथि जोंदों,
गोसोम खानाइया
मुहिनि सारफावदों;
थै आरो गुस्थियाव,
मिनिखैरैदों।
आं सानदों:
बेसे गोमोथाव महर लानानै फैदों
आय' सिख्ला मोनाबिलिया,
फालोसे थियाया अखां बुंजासे
दावराव खालामनानै बिरलाडे।
मासे दाउथेबआ
थेब थेब गाबनानै
शुमबिलि बारिनि गेजेर गेजेर
हासिंडै बिरबायो।
खोलानिफ्राय सिउ सिउ बार बारो,
आंनि गोसोआ आवलियो।
गंनीया दैसानि हरै बारै गोजान हादाबाव
बिरबाय हैनो नायगिरो,
लाइमोन सिख्लानि हादराव।
नाथाय बर 'नि बादि
गोग्लैसोनाय माहारियाव
सानबोलाउरिया खंगा,
बिरखांनो हाया।

आं खनसे हांमा गोलाउ सुरनानै
शुमबिलि बिफां फांसेयाव सोनार हैयो ।

बासिखा बिबार गोजा

मोनाबिलिनि फासैं गल' नायहरो

गोसो थोनाया अनसुमैनि थाखाय गाबखांनाय

बिनि थाखायनो दा नौनि मेगनाव

हाथासिनि बबि राव

रोखा बेरखां फैयो ।

आय' मोनाबिलि,

नौनि गोमोथाव महरनि सिडाव

मोनफुडिनि दाहा बोहैनाय

आंनि मेगनाव गोग्लैयो ।

नौनि खाफालनि बै हासिं हाथखिंया

गिलुं गोसोनि सिमांबादि

थोर थोर मावो ।

पुषनि रोमोदो दुब्लियाव

सोरबा लाउखारनि

माइनारा दामनाय रिंखाडे;

माइमुथि बुथुमै बुथुमै हगारसारनाय

सोरबा दाहोनानि बालाबगासे

गंनीया-दैमानि हरै बारै गोमसारहैयो,

आंनिबो गोसोआव रिंसारफैयो ।

सिख्ला मोनाबिलि,

नौनि गोसोनि रावखौ आं मिथिमोनो ।

सोरजिजेननायनिफ्रायनो सानफ्रोमबो

अन्जिमा गैयि हाबिला लानानै नौं

अनसुमै सानखौ बरायबोदों;

रेसम खानाइजों आन्दो खालामनानै

गावनि बिखायावल' बजबना लादों ।

थेवबो मोनाबिलि, अखानायब्लानो

नौनि अनजिमा गैयि हाबिलाया

फिन नुजाफैदों

आरोबाव गोदानै मोननो

खाथिसिनाव बजबनो गोसोआ लुबैखांदों ।

मानोना

गोसो थोनाया मोननो लुबैनाय,

गोदानै, साबसिनै खाथिसिनै

मोननो लुबैनाय

सोदोबथि :

बालाबगासे - मेथाइनि देंखो स'से ।

गंनीया दै - खन्थाइगिरिनि गामि सेरजों बोहैलांनाय दैमा मोनसे ।

सानबोलाउरि - साननो नायगिरब्लाबो साननाया आगोर मोना, दावगालांनो हाया, खंगा । बिथानि बादिब्ला बर 'फोरा सानखांनानै (fancy) देरहासार जानो हाया ।

सिख्ला मोनाबिलि - मोनाबिलिखौ सासे महरगोसा सिख्लाजों रुजुनाय जादों । खोमसिहां मोनाबिलियाव अखां सायाव नुजानाय हाथखिं थरसेखौ बिनि खाफालनि फोथा, गोसोम अखां आरो मोनाबिलिनि खोमसि गाबखौ बेनि गोवप्राणाय गोसोम खानाइजों रुजुदों ।

सौंथि :

1. लिरगिरि समर ब्रह्म चौधुरीया मिथिंगानि बिखायाव मोनाबिलि सिख्लानि माबादि महरखौ फोरमायदों ?
2. खन्थाइगिरिया मोनाबिलिनो मा बाथा फोरमायदों ?

3. मोनाबिलिनि अनसुमैया सोर ?
4. गोसो थोनायनि ओंथिया मा ?

फरागियान :

मोनाबिलिया अरायबो सिख्ला महर लानानै समायना सारफावनानै गावनि लामाजों अनसुमै सानखौ लोगो हमनो फैयो। बेयो खन्थाइगिरि समर ब्रह्म चौधुरीनि र 'माण्टिक नोजोराव नुजाथिदों। खन्थाइगिरिया गंनीया दैमा सेराव गसंनानै नोजोर होदों आरो गावखौ बावगोमानो नाजादों। नाथाय हारिनि बाथा गोसोआव नांथाबना थानायाव बावगोमानो हायाखै। नाथाय खन्थाइगिरिया मोजां मोननायनि ओंथिखौ हमदांनो हादों। मोनाबिलि सिख्लाया गावनि अनसुमैखौ लोगो हमनो सानफ्रोमबो फैयो। गोदानै समायना महर लानानै फैबाय थायो। मानोना मोजां मोननाया अराय गोजोर - जोबनो थाड। बेनिखायनो मोनाबिलिनि गोर्बोआव गोजां मोननाया जोबलाडखै। गावनि अनसुमैखौ लोगो मोननायनि हाबिलासा थुंगेयाखै।

फोरोंगिरिनिस्मि :

फोरोंगिरिया र 'माण्टिक खन्थाइनि सोमोन्दै फरायसाफोरनो फोरमाय नांगोन। मोनाबिलिखौ लानानै बर' एबा गुबुन गुबुन रावाव बेबादि मा मा खन्थाइ दं सावरायनांगोन।

गोथां गाब गाथोंसै

अनजु

फराखौ सायख 'नायनि थांखि :

अनजु नार्जारीया बर 'नि सासे गोजौ सारिनि गोदान खन्थाइगिरि। बिथांनि 'गोथां गाब गाथोंसै' खन्थाइयाव गोदान खन्थाइनि आखुथाइया रोखायै बेरखांदों। गोदान खन्थाइनि बागै फरायसाफोरनो मिथिहोनो थाखाय बे खन्थाइखौ सायख 'नाय जादों।

खन्थाइगिरिनि सिनायथि:

1963 इं मायथाइनि 15 जुलाइ खालाराव क 'क्राझारनि खोला टेडापारा गामियाव अनजु नार्जारीनि जोनोम जायो। अन्जुनि आबुं मुड अन्जलि नार्जारी। बिनि बिफानि मुड मुस्त्री दयाराम नार्जारी आरो बिमानि मुड शन्तिलाल नार्जारी। टेडापारा गुदि फरायसालियाव फरायजेन्नानै क 'क्राझार हिन्जावसा गोजौ फरायसालिनिफ्राय मेट्रिक आनजादखौ उथ्रियो। गुवाहाटी कटन कलेजनिफ्राय P.U. (Sc.) आनजादखौ उथ्रिनानै सिलंनि लेडिकीन कलेजनिफ्राय B.Sc. आरो N.E.H.U. निफ्राय M.Sc. आनजादखौ उथ्रियो। आथिखालाव बियो क 'क्राझार कलेजनि मुवा-बिगियान बिफाननि गाहाइ बिबुंगिरि जानानै दड।

1982 इं मायथाइयाव अन्जुनि - 'नोंनि जिउ: आंनि बिबुंथि' मुंनि गिबि खन्थाइ बिजाबा ओंखारो। बेनि अनगायैबो अन्जुनि खन्थाइफोरा गुबुन गुबुन लाइसि, बिसम्बिफोराव गोसारना दड'। बिनि गुबुन खन्थाइ बिजाबफोरा जादों - 'फासिनि दौलेडव अखाफोर' (1995), 'गोरबोनि रादाब' (2002), 'गोरबोनि खन्थाइ' (2005)। 'फासिनि दौलेडव अखाफोर' खन्थाइ बिजाबनि थाखाय 2002 इं. मायथाइयाव बड' साहित्य सभानि रांसार बान्था मोनो। अन्जुआ' खन्थाइनि इकेबाना' मुंनि खन्थाइ बिजाब गांसे सुजुना दिहुनदों। खन्थाइनि अनगायै गुबुन गुबुन लाइसियाव अन्जुनि सुंद' सल 'फोरखौ सेबखांजानाय नुनो मोनो। अनजुआ

2016 मायथाइनि बर 'रावनि साहित्य अकाडेमी बान्थाखौ ' आं माबोरै दं दासों'
मुंनि खन्थाइ बिजाबनि थाखाय मोनो ।

गुबै फरा:

साफ्रोमबोनि गोर्बोआ
मोनफा मोनफा जाहार
हासार-बह्हा ।
जाय बेगरखौ फोयो
बेनो रज 'यो ।
बयबो गोर्बो हासारजों
कालाहान्दिखौ फबहै
आरो
एमबु ज 'रानि हाबा होनानै
अखा लिंहर
बिनि खराना खारथोंसै
अखानि दैजों
बैसुमुथिनि गोर्बोआ
गोजोनथोंसै ।
बेसेबा मिजिंक
गोदानै खिलिफिनथोंसै ।
गोर्बोआ
गोथां गाब गाथोंसै ।

सोदोबथि :

जाहार - दंफा-लाइफांजों बुंफबनाय हाग्राबारि
कालाहान्दि - उरिष्यानि आंखालजों गोथौयै नाख्रेबजानाय आरो गोग्लैसोनानै
थानाय मोनसे ओनसोल
बैसोमुथि - बुहुम

सोंथि :

1. 'गोथां गाब गाथोंसै' खन्थाइयाव खन्थाइगिरिया गोथां गाबजों माखौ फोरमायदों ?
2. गोथां गाबखौ मानि थाखाय गाथोंसै होन्ना खन्थाइगिरिया फोरमायदों ?
3. 'गोथां गाब गाथोंसै' खन्थाइयाव खन्थाइगिरिनि मिजिंकड माबादि बेरखांदों खन्थाइनि हेफाजाबै फोरमाय ।
4. 'गोथां गाब गाथोंसै' खन्थाइयाव खन्थाइगिरिया बैसुमुथिनि गोर्बोखौ मानि थाखाय गोजोनथोंसै होन्ना फोरमायदों ?
5. 'गोथां गाब गाथोंसै' खन्थाइयाव माखौ मानि थाखाय गोदानै खिलिफिनथोंसै होन्ना फोरमायदों ?
6. 'गोथां गाब गाथोंसै' खन्थाइयाव 'बिनि' होन्ना सोरखौ एबा माखौ फोरमायदों ?
7. बेखेवथि लिर:
 - (क) जाय बेगरखौ फोयो
बेनो रज 'यो ।
 - (ख) एमबु ज 'रानि हाबा होनानै
अखा लिंहर
बिनि खराना खारथोंसै ।
 - (ग) बेसेबा मिजिंक
गोदानै खिलिफिनथोंसै ।

फरागियान :

बहुमनि साफ्रोम सुबुंनि गोर्बोआ मोनफा मोनफा हासार गोनां जाहारबादि, जेराव हास्थायनाय साननायजों खामानिखौ मावफुंनो हायो । गोर्बो हासारजों कालाहान्दि बादि आंखालजों बुंफबनाय जायगाखौ फबनो हायो । रानस्रावनाय बैसुमुथिखौ अखानि दैआ जेरै गोजोन होनो हायो बिब्दिनो गोर्बो हासारजों सुबुंनि गोर्बोखौ थाजिम खालामनो हानायनि फुंखा होनो हायो ।

फोरोंगिरिनिसिम :

सुंबुनि गोर्बोआदि हासारजों बुंफबनाय बेनि सोमोन्दै खन्थाइनि हेफाजाबै फरायसाफोरखौ गियान होनांगोन । खन्थाइयाव गोसो-सानम्रियारि बिथिड माबादि बेरखादों, बेनि बागै फोरमायगोन । लोगोसे खन्थाइगिरिनि मिजिंङ माबादि बेरखांदों, बेनि सोमोन्दै खन्थाइयाव बर्नायथिनाय बिदिन्थिजों फोरमायनांगोन । बेनि अनगायैबो अन्जु नार्जारीनि गुबुन गुबुन खन्थाइफोरनि बागै फोरमाय हायो ।

दावदो दे दाव बर' हारि

नन्देश्वर बर'

फराखौ सायख 'नायनि थांखि :

हारि आरो हारिमुनि सायाव बयहाबो सांग्रांथि थानाया गाहाम । नडब्ला समनि फाखनाव मोनसे हारि एबा हारिमुवा जोबस्रांलांनो हागौ । हारि आरो हारिमुवा दावगानाय एबा जौगानायनि गेजेरजोंसो बुहमाव थांना थायो । बयबो बर' फिसायानो गावनि हारिनि फारसे सांग्रांथि थानांगोन । बेनिखायनो बिब्दि थांखि बेरखांनाय बे खन्थाइखौ सायख 'नाय जादों ।

खन्थाइगिरिनि सिनायथि:

1946 मायथाइयाव लुवासुर गामियाव नन्देश्वर बर'आ जोनोम मोनो । बिनि बिफानि मुंआ सत्यराम बर' आरो बिमानि मुंआ देबबाला बर' । गामिनि गुदि फरायसालियाव फरायजेनानै 1972 मायथाइयाव बि.एइच. कलेजनिफ्राय बि.ए. आनजाद उथ्रियो । ग'बर्धना हाइस्कुलाव फोरोंगिरिनि हाबा मावनानै आजरा लायो ।

उन्दैनिफ्रायनो खन्थाइ लिरनायाव मुखुब जाबोनाय बिथांनि खन्थाइ बिजाब गांनैया जादों - गोसोनि बारहुंखा(1976) आरो सुंबुनि राहा(1984) । जांखिथाइयारि सानम्रियानो बिनि खन्थाइ लिरनायनि गुबै थांखि । बियो बर'नि गिबि लिमारिक खन्थाइ लिरगिरि ।

'सुंबुनि राहा' बिजाबनि थाखाय बर' थुनलाइ आफादनि रांसार बान्था मोनदो ।

गुबै फरा :

बर' हारि जों बर' हारि

दावदो दे दाव फारि फारि

खाफालाव हमना मोदै गारना
ज 'ना थाना जेबोथ' मोना
दावदो दे दाव फारि फारि
बर' हारि जों बर' हारि ।

दानो दाबाव दखना
गान आगर एरना
थावखि लुना मुम्ना साना
गोदान गोदान जि गान्ना
रंजाबोबाव मोसाबोबाव ।
बर' हारि जों दाव दे दाव ।

गावनि हारिखौ फोजाना
अगेन आखल्ल गारना
जाखां सेंग्रा जाखां सिख्ला,
गाव हारिखौ बुथुमना ला;
बर' हारि जों बर' हारि,
दावदो दे दाव फारि फारि ।

दागि जोंबो माखौ गिनो
गिना थाबा माखौ मोन्नो
सानसे थोइओ सानसे थाडे
दागि जोडे मानसि जोंबो
सानसे मिनियो सानसे गाबो
खारग'आ जों गिना थाबाबो
दावदो दे दाव फारि फारि
बर' हारि जों बर' हारि ।

सानदो दानो फिसा फिसौ
बिसोरनि इयुना हाखर गोथौ
बोखांनाय समा सफैबाय
जिउ गारनाबो नाजानांबाय
जेबो गैलिया जोंहा दिनै

गोमा जोब्बाय जोबै जोबै
रां जोब्बाय रुफा जोब्बाय
जोंनि खौसेया गोमाबाय
बर' हारि जों बर' हारि
दावदो दे दाव फारि फारि ।

गान्नाय जोमनाय जोब्बोबाय
रंजानाय मोसानाय बावबोबाय
हामां हाथां लांजोब्बाय
थाबाय जोंहा मेगन मोदै
मालाइया थाबाय जों खारबाय
हालो दैलो गाबनो नांबाय
मालायनि न'आव जानो नांबाय
गावजों गावनो बावलांबाय
बर' हारि जों बर' हारि
दावगा दे दाव फारि फारि ।

सोंथि :

1. खन्थाइगिरिया बर' हारिखौ मानो दावलांनो थोनदों ?
2. गावनि हारिखौ जौगाहोनोब्ला जों मा खालाम नांगौ ?
3. खन्थाइगिरिया दानि बर' फोरनि माबादि हालोद नुदों ?
4. बेखेवथि लिर:

(क) दानो दाबाव दखना

.....

बर' हारि जों दाव दे दाव ।

(ख) दागि जोंबो माखौ गिनो

.....

दागि जोडे मानसि जोंबो ।

(ग) मालायनि न'आव जानो नांबाय

.....

दावगा दे दाव फारि फारि ।

फरागियान :

बर 'हारिया दावगा लांनंगोन । बेनिखायनो खाफाल हमनानै मोदै हुगारनानै जना थाबाय थायोब्ला जानाय नंलिया । गावनि सिनायथिखौ बोखांनो गानै-जोमै खौसेयै गेना-गोरोन्थि नागारना दावगा नांगोन । सेंग्रा -सिख्लाफोरा जान्जि खाफ्रानांगोन । गिनाय गारनानै जौनि दानि हालोदखौ उश्रिनानै लाजिनाय-बानायखौ नागारनानै दावगानांगोन । जौनि गोमानाय मोसानाय-मुसुरनाय हारिमुखौ बुरखांनो बहुमाव गसंनो जौ दावगानांगोन । खन्थाइगिरिनि बेनो हास्थायनाय ।

फोरोंगिरिनिसिम :

फोरोंगिरिफोरा हारि मोजां मोननाय एबा फोजाखांनाय सानसि गोनां खन्थाइनि सोमोन्दै रायखांनंगोन । लिरगिरिनि जांखिथाइयारि खन्थाइ माखासेनि दिन्थि होनानै सावरायगोन ।

मोदै

धरणीधर औवारि

फराखौ सायख 'नायनि थांखि :

मोदैनि बेसेनआ नेहाद नड । मोदैनि थाखायसो बे बुहुमुआ थांनानै दं । मोदैया सानजों समान बैसोनि । मोदैनि थाखायसो बुहुमआव गोबां जारिमिन सोरजि जादों ।

धरणीधर औवारीया सासे गागि खन्थाइगिरि । बिथांनि खन्थाइजों फरायसाफोरखौ सिनाय होनायनि थांखियै बे खन्थाइखौ होनाय जादों । मोदै खन्थाइया बिनि गोदान खन्थाइनि नेरसोन ।

खन्थाइगिरिनि सिनायथि:

धरणीधर औवारिया 1948 मायथाइयाव बरपेटा जिलानि लुवासुर गामियाव जोनोम मोनो । बिथाड गुवाहाटी मुलुग सोलोंसालिनिफ्राय असमीया आयदायाव एम.ए. आनजादखौ उश्रियो । बेनि उनाव बि.एड. डिग्रीबो लायो । बिथाड फोरोंगिरि हिसाबै आजिरा लाबाय ।

बिथां औवारीया सासे खन्थाइगिरि, सुंद' सल' लिरगिरि, सल'मागिरि, रायथाइगिरि आरो सावरायगिरि महरै गावनि सिनायथिखौ होनो हादों ।

बिथाड फारियै 1979 मायथाइयाव 'मोदै' (खन्थाइ बिजाब), 'गान्दु सिंनि लाइजाम गांसे' (सुंद' सल' जथाइ बिजाब); 1980 मायथाइयाव 'मैहुर' (सल'मा) आरो 2005 मायथाइयाव "बर' थुनलाइनि महर'" (सावरायथाइ बिजाब) दिहुनदों । बेफोरनि बादैबो 'दासिमबो गामिनि सिमां नुनो हायो' (2018) खन्थाइ, आरो 'गोथेनाय लामायाव गोदान आगान' (2018) सुंद' सल' बिजाब गांनैखौ लिरना दिहुनदों ।

बिथां औवारिया दाबो लिरनायाव मुखुब जानानै दं ।

गुबै फरा :

सोर बुंदों

'मोदै'खौ गोल्लैथार होन्ना ?

सौनानै नाय

“ आदाम-इभ 'नि
 संसार सोरजिजेन्नाय
 मेगन फारब्रैयाव ।
 सों, जेसेबां दं
 गुबुन गुबुन हारिनि
 धोरोमसालियाव
 बुंगोन
 बाइबेल, क 'रान, हदिछ
 महाभारत, रामायण, गासिबो ।
 खृष्टान, इछलाम, शिख, बौद्ध
 जैन, बैष्णव - भागवती
 गासिबो बुडो मोदैनि बैसोआ
 सानजों समान ।
 सोंना नाय संसारनि जारिमिनाव
 सोरनि मेगनाव बेसेबां मोदै गर्दोंमोन
 मानि थाखाय ?
 सोंजायो
 र 'म, इटाली, फ्रान्स,
 सा-खोला भियेटनाम, आफ्रिका
 इजराइल, पाक-भारत-चीन
 बाग्लादेशनि जारिमिनाव
 मा बादि मोदैनि सागर बोहैदोंमोन ।
 सोंना नाय,
 मेटचिनि, गेरिवल्दी मजिबुर
 नेप 'लियन हिटलार, इयाहा
 गान्धीजी, केनेडी, लाचित
 मुस्लि गोवलां फोरनाव
 मानो बिथांमोना मोदै हुगारदोंमोन ?
 सों,
 मोदाय हिन्जाव

भेनाच, किउपिड, चाइकी
 सीता, बेउला, जयमती,
 बयनिबो मेगनाव मानि मोदैमोन ?
 खोन्थामोन,
 र 'मिव-जुलियेट
 डान्टे-बियेट्रिछ
 लायला-मजनु
 जंकि-पानेइ
 गासिबो
 मानि दाहायाव हुगारदोंमोन
 बेसेबा मोदै ।
 आरो
 सोंदोंना-
 गणतन्त्र हादाबाव
 थापावसि खर 'गेदेर उदै बेल्लां
 राइजोखौ सानग्रा फोरनाव
 मानि थाखाय बिसोर उन्दुनो हाया ?
 नुदोंना-
 नेउलाराम, जोंख्लाब,
 खान्थाचन्द्र, दुम्ब्रां बयनिबो
 नांगोल मुथियाव नांनाय मोदैखौ ?
 नुदोंना मोदै,
 जोनोमगिरि आइनि
 गाबखावजेन्नाय मेगनाव ?
 आरो-
 गोनां गैयिनि गेजेराव
 मानि इन्जुर बेलाय
 मोदैनि नडलाय ?
 - 'थांदोदे फिसा, स 'ना',
 - 'दासो फैयो ? एफा गोबाव' ?

- 'हाबाब बबाव मोनबावनो' ?
 होन्नाय जिखिजाया अन्नायनि रावा
 हुगार हायोना मोदै ?
 सानो मोनसे
 जाबोयो मोनसे
 नायो जेखौ
 नुवा बेखौ
 बहायनो मोदैया ज्राम गबोयो ।
 संसारा अन्नायजों खाजादोंब्लाबो
 बे अन्नायनि बेन्दोछा ज 'नो गोरलै
 जिबादि
 थास 'बिलाइनि दै
 मानसिनि जिउवा, बिनो मोदै हुगारगहायि ।
 मोदैया गयो
 अराइबो थानानै थानो ।

सोंथि :

1. मोदैया मानो गयो ?
2. गणतन्त्र हादराव सुबुंनि माबादि हालोद नुनो मोनो ?
3. बुहुमनि हारि-हादर दानायाव माबादि मोदै गदोंमोन ?
4. जंकि-पानेइया सोर ?
5. मोदै ग 'नायनि जाहोना मा होननानै खन्थाइगिरिया बुंदों ?
6. खन्थाइरिगिया मोदै खन्थाइयाव जोंनि जिउखौ माजों रुजुदों आरो मानो रुजुदों ?
7. बेखेवथि लिर:
 (क) सोंना नाय संसारनि जारिमिनाव.....मोदै गदोंमोन मानि थाखाय ।
 (ख) संसारा अननायजों.....ज 'नो गोरलै ।
 (ग) जिबादि थास 'बिलाइनिमोदै हुगारग 'हायि ।

लिरसुंथाइ :

इटाली : इउर 'प हादरमानि सोनाबाव भुमध्य लैथोमानि साहा हायेनाव थानाय हादर । इटालीया गोजाम सोदोमसिनि हादर । बे ओनसोलखौ मेरु खालामनानै र 'मान साम्राज्यआ इउर 'प, आफ्रिका आरो एसियानि गोबां बाहागोआव गोहोम खोख्लैदोंमोन । नाथाय नेप 'लियन ब 'नापार्टनि (1769-1821) सिगांसिम इटाली मुंनि जेबो हादर गैयामोन ।

इटाली हादरनि राजथावनिनि मुडनो र 'म (Rome) । टाइबार दैमा सेरनि गिदिर नोगोरमाया जोबोरै गोजाम, हारिमुगोनां । बेयो ख्रिष्ट सिगां 75 आव गायसन जायो । मोनस्नि फिसा-गिदिर हाजोनि । (एभेनटाइन, किउरिनेल, केपिट 'ल लाइन, पालेटाइन, केलियन, भिमिनाल आरो एसकुइलाइन) गेजेराव समान बाहागोआव थानायखाय बेखौ स्नि हाजोनि नोगोर (City of Seven Hills) बुंनाय जायो । गोजाम बे नोगोरखौ मेरु खालामनानैनो समाव दाजादोंमोन गोजाम र 'म सोदोमसिनि । बुहुम जारिमिनाव र 'मा अराय समावनो जादोंमोन इउर 'पनि सोदोमसिनि नेरसोन ।

इटालीयाव बुहुमनि गोबां मुंदांखा महरगिरि, बिगियानी, थुनलाइगिरिनि जोनोम जादों । बिसोरनि गेजेराव लिअ 'नार्ड डा-भिन्सि, माइकेल एन्जेल, राफेल, गेलिलिअ ' गेलिलि, गुग्लियेल्म ' मार्कनि, एनरिक ' फार्मि, कलम्बाछ, मार्क पल ' बायदिनि मुछ मख 'थाव ।

र 'मआ दासिमबो हारिमु, धोरोम आरो गोथौ सानथाइनि मेरु जाना दं । 1929 मायथाइयाव बे नोगोरखौ मेरु खालामना भेटिकान हादरसा दाजायो । 1870 मायथाइयाव बेयो इटालीनि राजथावनि जायो ।

फ्रान्स : इउर 'पनि खोला-सोनाब बाहागोआव थानाय गोजाम हादर । फ्रान्सनि सुबुंफोरा फरासी होनना मिथिजायो ।

फ्रान्सनि जारिमिना जोबोरै गोजाम । ख्रिष्टसिगां 51 आव सम्राट जुलियास सिजारा फ्रान्स दखल खालामो । 1774 मायथाइयाव 16 लुइया हादरनि राजउलाफादाव जयो । बै समसिम फोरजा सुबुंफोरा राजाखान्थिनि सायाव गोजोनैनि जाहोनाव राजाखान्थिनि सोलायै सुबुंखान्थि दाजायो । बेखौ जारिमिनाव फरासी सोमावसारनाय मुडैमिथिजायो ।

फ्रान्सनि मुंदांखा सुबुंफोरनि गेजेराव नेप 'लियन ब 'नापार्ट, लुइ पेष्टिउर,

भिक्टर हुग', र'मा र'लॉ बायदिनि मुझ मख 'जाथाव ।

र'मिअ'-जुलियेट: सेक्सपीयेरनि गांसे मुदांखा ट्रेजेदि । सोनाब मुलुगनि गोमोथाव सल'आव र'मिअ-जुलियेटखौ आदर्श मोजां मोनज्जायग्रानि नेरसोन महरै गनायनाय जायो ।

चाइकी (Psyche) : मोजां मोननायनि मोदाइ किउपिदआ गोसोथोनाय सासे जोबोरै समायना सिख्ला । चाइकीखौ किउपिदआ बुंना दोनदोंमोन दि चाइकीया जाहाते माब्लाबाबो बिखौ नायनो आरो मिथिनो लुबैया । नाथाय चाइकीया सोदयै किउपिदआ उन्दुबाय थानाय समाव जेवारि लाना नायखोमानायाव थाव गुदुं थोबसे गोगलैजानानै सिरि मोनो आरो चाइकीनि फावखौ मिथिनो मोनो । बियो रागा जौना चाइकीखौ नागारना आनज्रायना थाडो । उनाव चाइकीनि आर'ज गाबनायाव गोजोनानै नुजाफैफिनो आरो चाइकीखौ जुलि लानानै गोजोर जिउ होयो ।

गेरिबल्डि आरो मेटचिनि : सानैबो इटाली हादरनि हादर अनफाउरि आरो दावहारु सुबुं ।

फरागियान :

खन्थाइगिरिया मोदैनि बैसोखौ सानजों समान होनना बुंदों । बहुमआ जेसे सान थागोन अब्लासिम मोदैयाबो थानानै थागोन ।

बहुमाव औरैनो जेबो जानानै फैयाखै । माबा मोनसे नागिरोब्ला मोदै हुगारनो गोनां जाखागोन । बेनि फिनखौ बहुमनि धोरोमसालि, हादर, हादर-दैदेनगिरि, जोहोलाव, मोजां मोनगिरि, सिमां नुगिरिनिफ्राय मिथिनो हायो ।

जों बे संसाराव देरहानो लुबैया । नाथाय जौनि साननाया अरायबो जाफुड । बेनिखायनो मोदै गयो । संसाराव सुबुंआ दान्दिजोर अननायनि दौलेंजों खाजाब्लाबो जिउवा अराय गोजोर नड । बेनिखायनो मोदै गनाडो ।

फोरोंगिरिनिसिम :

फोरोंगिरिया गोदान खन्थाइनि सोमोन्दै फरायसानो गुमुर् होनो नांगोन । बर' गोदान खन्थाइखौ नेरसोन हिसाबै थांखिनानै सावरायब्ला गाहाम जागोन ।

बेसेन मोनदांथिनि सोलोंथाइ

ड° दुलुमणि ग'स्वामी

रा.सो. - बिरूपाक्ष गिरि बसुमतारी

फराखौ सायख'नायनि थांखि :

भारतनि सोलोंथाइ राहायाव बेसेन मोनदांथिनि सायाव जेब्लाबो गोसो होनाय जाबोदों । भारतबर्षनि गोजाम सोलोंथाइ राहाया जादोंमोन बेसेन मोनदांथिनि सायाव सोनारनाय । मोनसे गोगो, गेबें आरो सुबुंथिगोनां समाजनि थाखाय बेसेन मोनदांथिनि सोरजिनाय आरो जौगानाया सिमागैयि । भारतबर्षनि गुबुन गुबुन हारि-थागिबि, गुबुन गुबुन रांखान्थि-समाजारि आरो हारिमुवारि आबहावानिफ्राय फैनाय सोलोंसाया खौसेनि गेजेरजों बयनिबो बेसेन मोनदांथिनि गेजेरजों थुलुंगाखांनाया गाहाम । फारसेथिं, आथिखालाव बेसेन मोनदांथिनि जामख'नाय एबा गुलाय-गुजायबो जेब्लाबो नुनो मोनदों । बेनिखायनो बेसेन मोनदांथिनि गियान फरायसाफोरनो होनो थाखाय दुलाराय भारत नाडै बिबिद फराखौ सोनाय जादों । बे फरायाव बेसेन मोनदांथिनि गुबुन गुबुन बिथिंनि सोमोन्दै सावरायनाय जादों ।

लिरगिरिनि सिनायथि :

ड° दुलुमणि ग'स्वामीया आथिखालाव गुवाहाटी मुलुग सोलोंसालिनि सोलोंथाइ बिफाननि बिबुंगिरि महरै हाबा मावनानै दं । बेनि सिगां सा कामरुप कलेज, बरमा कलेज आरो नगाव कलेजावबो बिबुंगिरि जादोंमोन । ड° ग'स्वामीनि बिजिरसं बिलाइया दासिम हादरारि आरो हादर गेजेरारि थाखोनि गुबुन गुबुन सावराय मेलान फराय जादों । बिनि गोबां खारिगोनां रायथाइ गुबुन लाइसि, रादाब बिलाइ बायदियाव नुजाबाय ।

गुबै फरा :

बेसेन मोनदांथि - सोलोंथाइ सानथाइया भारतबर्षनि सोलोंथाइ राहायाव

जोबोरै गोदान होनना बुंनो हाया । भारतबर्षनि गोजाम सोल्लोथाइ राहाया जादोमोन बेसेन मोनदांथिनि सायाव सोनारनाय । सोल्लोथाइनि गुबुन मोनसे थांखिया जादो बेसेन मोनदांथि सोमजिहोनाय । समाजाव सुबुंआ मानगोनांयै थांना थानांगौब्ला बेसेन मोनदांथिनि सोमजिनाय आरो जौगानायनि जोबोर गोनांथार । बेसेनमोन्दांथिनि अनगायै थारै सुबुं आरो गुबुन जिब-जुनारनि गेजेराव जुनिया फारागथि थानाय नड । गुबुन बाश्रायाव बुंनोगौब्ला बेसेनमोनदांथिनि गेजेरजोसो सुबुंआ थार जिउ खुंनयनि सोमोन्दै गियान मोननो हायो । बेसेन मोनदांथिया सुबुंनि सामाजारि जिउ सालायो ।

सोमोनां हारिमुनि हादर भारतबर्षनि सोल्लोथाइखुलिफोरसिम गुबुन गुबुन थाखोनि गथ 'फोरा सोल्लोथाइ लानो फैयो । गुबुन गुबुन रांखान्थि-समाजारि आरो हारिमुवारि आबहावानिफ्राय फैनाय गथ 'फोरा नाजावबोनाय बेसेन मोनदांथिफोरा गुबुन गुबुन जानायानो गनायथाव । फारसेथिं, आथिखालाव बिगियान जुन्थिबिद्यानि जौगानाय लोगोसे सोनाबारि हारिमुनि गोहोमाव गोदान सुबुंनि गेजेराव बेसेन मोनदांथिया गुलाय-गुजाय जाना नुजादो । बिब्दि बेलायाव बेसेनमोन्दांथि-सोल्लोथाइ लाहोनाया मोनसे गिदिर चेलेन्ज होनना बुंनो हायो ।

बेसेन मोनदांथिया मा ?

बेसेन मोनदांथि-सोल्लोथाइनि सोमोन्दै सावरायनो थांनयनि सिगाडाव जो बेसेन मोनदांथिया मा बेनि बागै एसे सावरायना लानाया गाहाम जागोन । बेसेन मोनदांथिनि सानथाइया सुबुंनि हाबा आरो सानम्रिजो ओरैबादि गोथौ आरो गुवारै लोब्बा गोनां दि बेनि बेखेवनाय होनाया जोबोरै गोब्राब हाबा । गिबियाव 'बेसेन' सोदोबा खालि रांखान्थियारि थांखियैसो बाहायनाय जादोमोन । गुवार ओंथियाव नायनो थाडोब्ला 'बेसेन'आ जादो माबा बेसाद एबा थासारि एबा हाबा, जाय सुबुंनि गोनांथि एबा नागिरनाय सुफुडे ? बेनिखायनो 'बेसेन' सोदोबा बेफोर बेसादखौनो फोरमायो जायखौ जायखि-जाया सुबुंआ नागिरो आरोबाव, सुबुंआ गोबां बेसादखौनो नागिरो, जेरै - थाखा-फैसा, सम्फथि, आदार, रैखाथि, सुखु-गोजोन बायदि बायदि । बे गासैबो सुबुंनि थाखाय गोनांथार । फारसेथिं, सुबुंआ गोबां बेसाद नागिरा एबा मिजिं खालामा; जेरै-गांनय-उखैनाय, रोडैथि, बेराम-

आरि, गोजोन गैयिथि बायदि । बेनिखायनो बेफोर बेसेन गैयि । बेनिखायनो बिब्दि ओंथियाव बेसेन मोनदांथिनि जेबो मोजां-गाज्रि एबा गोजौ गाहायनि सोंथि थाया । अदेबानि ड्रगसुनि निसागोनां सुबुंनि थाखाय ड्रगसुआनो बांसिन बेसेनगोनां बिब्दिनो सोरबा सोरखौबा जखम खालामना मोजां मोनोब्ला बेनो बिनि थाखाय बेसेनगोनांसिन जानो हागौ ।

सुबुंआ समाजारि जिब । बेनिखायनो खालि सुबुंनि गोनांथि सुफुंनयनि सानथाइजो बेसेन मोनदांथिखौ बिजिरनो हाया । सुबुंनि गोनांथि सुफुंनय बेसादखौ बेसेनगोनां नड होननानै थारै बुंनो हाया, नाथाय सुबुंनि गोनांथि सुफुंनयाव जेब्ला गुबुननि खहा जायो एबा समाजारि जिउआव खहा लाबोयो, अब्ला बिब्दि हाबानि माबा रोखोमनि बेसेन दं होनना बुंनो हायो । थारै बेसेन मोनदांथिखौ समाजारि नोजोरजोसो बिजिरनाय जायो । गोरलै ओंथियाव बेसेन मोनदांथिया जादो जौनि समाजारि जिउ गाहामै सामलायनो थाखाय एबा समाजारि जिउ सामलायनो थाखाय माखासे खान्थि आरो आदर्स-जायफोरखौ सुबुंआ फोरौथाइ आरो समाजारि खालामनायनि गेजेरजो लायो ।

बेसेन मोनदांथिया जादो सुबुं जिउनि माखासे बिथोन-खान्थि जायफोरा सुबुंनि देहायारि, गोसोआरि जौगानाय लोगोसे समाजनि जौगानायनि थाखाय गाहाम । समाजाव सोलिनाय दोहोरोम फोथायनाय, जिउ सानथौ, खान्थियारि आदर्श, राजखान्थियारि आदर्श, आसार-आखु, सानफ्रोमबो जिउनि हाबाफारि - बे गासैखौबो बेसेन मोनदांथियाव बोजबना लायो । आरोबाव, बेसेन मोनदांथिफोरखौ रावबो सुबुंआ जोनोमजो आरजिना लाबोफाया, बेखौ बुथुमो समाजारि थासारियावसो ।

बेसेन मोनदांथि सोमोन्दै सानथौगिरिफोरनि गेजेराव गुबुन गुबुन मत होनाय नुनो मोनो । बेसेन मोनदांथिफोरा अरायगोजोर ना गुस्लायसुला बेनि सोमोन्दै गुबुन गुबुन सानथौगिरिनि नोजोर दं । जेरै - आदर्शबादी सानथौगिरिफोरनि बादिब्ला, सैथो-शिव-समायना, बे मोनथामा अरायगोजोर बेसेनमोन्दांथि, जायनि जेबो सोलायनाय गैया । बे बेसेन मोनदांथिफोरा समाजावनो दं । सुबुंनि बिबाना जादो खालि बेफोरखौ संनाय आरो मोन्दांनय । अरायगोजोर बेसेन मोनदांथिफोरनि जेबो सोलायनाय गैया । मिथिगाबादि सानथौगिरिफोरा बेसेन मोनदांथिनि बेलायाव बेसादारि बहुमनि सायावसो बांसिन गोसो होदो । बिसोरनि बादिब्ला, बेसाद एबा

मिथिंगायासो बेसेन मोनदांथिखौ सायख 'यो। बाहायबादि सानथौगिरिफोरा नाथाय आबुंयै गुबुन मत फोरमायनाय नुनो मोनो। बिसोर माबा रोखोमनि अरायगोजोर बेसेन मोनदांथिखौ फोथाया। बिसोरनि बादिब्ला, बेसेन मोन्दांथिनि सोरजि जेरै समाज जाहोयो, बिब्दिनो सोलायहोयोबो समाजानो। थारै बेसेन मोनदांथिया आबुंयै समाजनि आबहावा आरो नांगौबादियै सोलायो। समाजनि सोलायनाय लोगो लोगोनो गोदान गोदान बेसेन मोनदांथिनि सोरजि जायो।

भारतारि सानथौआव बेसेन मोनदांथि:

भारतारि हारिमुआव बेसेन मोनदांथिनि सानस्रिया जोबोरै गोजाम। भारतारि सानथौआ जादों बेसेन मोनदांथिनि सानथौ। भारतारि सानथौआ सोनाबारि सानथौनि बादि खालि रहस्यनिफ्राय सोमजियाखै, नाथाय गोनांथिनि जाउनावसो सोमजिदों। समाजनि खान्थियारि आरो सोलेरारि गोनांथिनिफ्राय बेयो सोमजिदों। भारतारि सानथौनि जोनोम सुबुंनो साबसिन-हामसिन जिउ खुंनायनि राहा दिन्थिनो थाखायसो।

भारतारि सानथौआ बेसेन मोनदांथिखौ मोनब्रै बाहागोआव रानदों - (1) दोहोरोम, (2) रां-खाउरि, (3) हाबा आरो (4) म'क्ष एबा उदां जानाय। दोहोरोमा जादों खान्थियारि बेसेन मोनदांथि, जाय सुबुंखौ मावनांगौनि सोमोन्दै खिन्थिना होयो। बे बेसेन मोनदांथिखौ गुबुन मोननै बेसेन मोनदांथि रां-खाउरि आरो 'हाबा' निखुइ साबसिन होनना गनायनाय जायो। थारै 'रां-खाउरि' आरो 'हाबा' खौ' सालायनांगौ दोहोरोम थामहिनबा खान्थियानो। गुबुन बाश्रायाव मोजां एबा गाज्रि हाबानि फारागथिखौ सायख 'यो दोहोरोमानो। आरोबाव म'क्ष एबा उदां जानाया जादों सुबुंनि जिउनि साबसिन थांखि मोननायनि राहा। जाय सुबुंनि गावस्रांथांथिनि सायाव सोनारनाय। बे मोनब्रैनि अनगायैबो भारतारि जिउ सानथौआ फसंजादों मोनथाम गाहाइ बेसेन मोनदांथि 'सैथो', शिब आरो समायना 'नि सायाव जायखौ बुंनाय जादों बेसेन मोनदांथिनि 'मोनथाम खान्थि' होननायै।

भारतारि सानथौआ गोमोथाव बिहोमा होदों बेसेन मोनदांथिनि बेलायाव। हिंसागैयिया जादों भारतारि बेसेन मोनदांथिनि मोनसे गोदान दाजाबनाय।

भारतारि संबिजिरा भारतबर्षखौ गंसे जारखुंथाइ, सुबुंदारा, समाजबादि आरो दोहोरोम खानालायि हादर महरै दादों। भारतबर्षनि साप्रोमबो नोगोरारिनि उदांसि, समानथाइ, नियाय आरो गोरौबथि दानानै भारतबर्षखौ गंसे बेसेन मोनदांथि

थानाय आदर्श हादर महरै दानो नाजानाय जादों। भारतारि संबिजिरा नोगोरारिनि सुबुं मावनां हाबानि सोमोन्दैबो मख 'दों।

गुबुन गुबुन रोखोमनि बेसेन मोनदांथि :

बेसेन मोनदांथिफोरनि ओंथि, थांखि आरो बाहायथि नायनानै गोबां बाहागोआव राननो हायो। खालि मोननैसोल 'बाहागोआव राननानै सावरायब्ला सावरायनाया आबुं जानाय नड। अब्लाबो बेनि मोननैसो मख 'जाथाव बाहागोआ जादों- 1. खान्थियारि बेसेन मोनदांथि, 2. सोलेरारि बेसेन मोनदांथि, 3. समयनायारि बेसेन मोनदांथि (नान्दिक बेसेन मोनदांथि), 4. रांखान्थियारि बेसेन मोनदांथि, 5. हारिमुआरि बेसेन मोनदांथि आरो 6. राजखान्थियारि बेसेन मोनदांथि। बेनि गिबि मोनथाम बेसेन मोनदांथिनि सोमोन्दै गाहायाव सावरायनाय जादों-

1. खान्थियारि बेसेन मोनदांथि : खान्थि सोदोबनि इराजी सोदोब (Moral) आ लेटिन सोदोब 'म'रीज' निफ्राय जादों, जायनि ओंथिया जादों आसार-बाहायनाय आरो सुबुं-आसार। खान्थियारिजों समाजारि नेम-खान्थि आरो आदर्शआ लोब्बा जाना थायो। सुबुंआ जोनोम लानानैनो समाजारि सानथाइफोरखौ नाजावनो हाया। फारियै समाजारि सोमोन्दोआव फैनायनि उनाव आबहावा आरो सोलौंथाइनि गेजेरजों गोहोम खोख्लैजानानै समाजारि नेम-खान्थिफोरखौ बुथुमो। खालि जोनोमजों फैफानाय आखुफोरा मानसिखौ समाजारि जिब महरै दानो हाया। जोनोमजों फैफानाय आखुफोरनि फोसाबनायनिबो गोनांथि जायो। बेनि थाखाय सुबुंनो नांगौ गोजौ बेसेन मोनदांथि, गोजौ आदर्श आरो गोसोसानसि।

खान्थियारिया समाजनि नेम-खान्थि मानिना सोलिनायखौ बुडे। समाजनि नाजावथाव नेम-खान्थि, आसार-आखुनि उल्थायै सोलिनायखौनो खान्थिगैयि फाव होनना बुंनो हायो। खान्थियारि बेसेन मोनदांथिया सुबुंनियाव गोहोम खोख्लैयि आरो समाजारि, रांखान्थियारि, हारिमुआरि, राजखान्थियारि, खुंथाइयारि बायदि गासै बिथिडवनो बेनि रिफिखांजायो। बेनिखायनो, गथ 'नि खान्थियारि जौगानायनि ओंथिया जादों समाजनि सोलिबाय थानाय आखुफोरखौ आर्जिनो थाखाय फोरौनाय। गोसो गोनोखोगिरिफोरा गथ 'नि खान्थियारि जौगानायनि सोमोन्दै फरायसंनानै मोनब्रै जुनिया आखुनि बाश्रा सायख 'दों -

(क) बानगोनांथि - गथ 'आ मोगा-मोगि जानांनाय गुबुन गुबुन थासारिखौ बानगोनांथि बिजिरनाय।

(ख) गुबुनखौ मदद खालामनाय - गुबुन सुबुंनि सुखु-दुखुनि फारसे अननायनि नोजोरजौ नायनो हानाय जानाय आरो गोनांथि बादियै मदद खालामनाय ।

(ग) बिबाननि फारसे साग्रिद - समाजाव गावनि बिबाननि सायाव साग्रिद जानाय आरो गाव मावनाय हाबानि गेना -गोरोन्थिखौ सिमान लानाय ।

(घ) खान्थियारि उदांघि - गावनि बादियै माबा मोनसे खान्थियारि गरन्थ लानो हानायनि गोहो । गुबुनजौ सावरायब्लाबो बिब्दि रोखोमनि गरन्थनि गासै बिबानखौ सुबुंआ गावनो सिमान जानो हानाय गोसो ।

गोनोखौ - जुन्थि बिघानि सानस 'हायि जौगानाया लाबोनाय खाबु-खायदानि थाखाय सुबुंआ आरामगोनां जिउनि फारसे लेमलांदों । जाउनाव सुबुंआ बेसाद मिरुआरि जादों । जायनि जाउनाव खान्थियारि बेसेन मोनदांथिफोरा सुबुं समाजनिफ्राय फारियै जोबलांनो हमदों । बिब्दि बेलायाव खान्थियारि बेसेन मोनदांथि- सोलौंथाइनि जोबोरै गोनां होनानाँ साननाय जादों । गथ 'नि खान्थियारि जौगानायनि थाखाय माखासे मोगथाडारि राहा लानायनि बाश्ना बयबो मोनदांदों ।

2. सोलेरारि बेसेन मोनदांथि : आदर्शबादी सानथौगिरिफोरनि बादिब्ला सुबुंआ गुबुन जिब-जुनारनिफ्राय साबसिन बेनिखायनो दि सुबुंनियाव सोलेर मोनदांथि दं । भारतारि समाज-हारिमुआव सोलेर मोनदांथिनि जायगाया जोबोरै गोजौ । नाथाय सोलेरारि बेसेन मोनदांथिजों दोहोरोमारि बेसेन मोनदांथिनि सोमोन्दो दं । भारतबर्षआव बेद-उपनिषदनि मुगानिफ्रायनो गोबां सानसुमैया सोलेरारि बेसेन मोनदांथिनि सानसिमि बिहोमा होबोदों ।

आदर्शबादी सानथौफोरनि सानथाइफोरा सोलेरारि बेसेन मोनदांथिनि सायाव सोनारनाय । सोलेरारि बेसेन मोनदांथिया बेसादारि बुहुमनि सायाव गोनांथि होआब्लानो गोसो एबा सोलेरनि जौगानायनि सायावसो गोसो होयो । गोसो एबा सोलेरनि जौगानायासो सुबुंखौ गोजौ थाखोसिम लानानै थानो हागौ आरो थार सुखुखौ संहोनो हागौ । गुबुन फारसे, आथिखाल दाजेमारि सोदोमस्रिया सुबुंखौ बेसादारि बुहुमनि फारसे बांसिनै बोगथाबदों जायनि जाउनाव सोलेरारि बेसेन मोनदांथिनि गोनांथि सेंबोदों । आरामगोनां जिउनि फारसे सुबुंआ लासैयै लेमनो लादों । आदर्शबादीफोरा सानो दि सोलेरारि बेसेन मोनदांथिनि आंखालनि थाखायनो दिनैनि समाजा जालांदों आबुथिगैयै, दुर्नीतिगोनां आरो खान्थिगैयि । सोलेरारि बेसेन मोनदांथिनि जौगानाय फैगोन अब्लासो जेब्ला सुबुंआ सुबुंखौ मोजां मोननो

सोलौंगोन, हेफाजाब, अहिंसा सानसिमि, सिबिनाय, गावखौ हमथानाय, गोसो गुवारथि बायदि बांगोन । महापुरुष श्रीमन्त शंकरदेबा बुंनाय बादि, 'कुक्कुर शृगाल गदर्भर' आत्मा राम, जानिया सबाक' परि करिबा प्रणाम' । थामहिनबा सैमा, सियाल, गाद 'नि सोलेरावबो राम थायो, बेखौ मिथिनानै बयखौबो सिबि ।

3. समायनायारि बेसेन मोनदांथि (नन्दनतात्विक मूल्यब'ध) : समायनायारि बेसेन मोनदांथिया मोनसे बाश्नायाव समायना मोनदांनाय होनना बुंजायो । माखासे सानसुमै पण्डितआ मतथाइ होयो दि समायनायारि बेसेन मोनदांथिया खालि ओंगोआरि मोनदांनाय बेसादनि बेलायावल' बाहायजायो, बुहुमारि नडि-बेसादनि बेलायाव बेखौ बाहाय जाया । नाथाय सुबुंआ गासै रोखोमनि मोजां हाबा एबा जाथाइ एबा मोनदांथिखौ बेसेन होयो । बेनिखायनो बेफोरनि समायनायारि बेसेन मोनदांथि नागिरना मोननो थाडे । सुबुं जिउनि मोनथाम गुबै बेसेन मोनदांथिया जादों - (1) थार, (2) शिब, (3) समायना । बे समायनानि मोनदांथियानो जादों समायनायारि बेसेन मोनदांथि । समायनायारि समायनाया सुबुंनो गोजौ लाबोयो आरो जिउखौ समायना खालामो । जिउगोनां एबा जिउ गैयि गासै बेसादनिनो समायनायारि बेसेन मोनदांथि सुमोन्थाइ जानो हागौ । सुबुंआ गासै हाबाखौ मोनसे नोजोरजौ नायब्लाबो गोसो होनायनि गुबुन गुबुन बिन्दोनिफ्राय गुबुन गुबुन थाखोआव सुमोन्थाइ खालाम जायो । बेनिखायनो, गोसो होनायानो जादों समायनायारि बेसेन मोनदांथिनि गुबै आगुजु ।

समायनायारि एबा समायना मोनदांथिनि सोमोन्दै सानथौगिरिफोरा गुबुन गुबुन नोजोर लानाय नुनो मोनो । सानथौगिरि प्लेट 'नि बादिब्ला गासै बेसादनिनो मोनसे ग 'साइया होनाय समायना दं । जौ खालि इसोरारि साननाय-मोनदांनायनि गेजेरजौ बै समायनाखौ मोनदांनो हानांगोन । बुहुमाव थानाय गासै बेसादनिनो समायना संनो जौ उदाय नांगौ । महर्षि टलष्टया समायनाथिनि बेखेवथि होनानै बुंदों दि समायनाथिया सोनारो आबुंयै सुबुंनि गावनि नाजावथाव गोहोनि सायाव । जौ जेब्ला दोंसे खन्थाइ फरायसडे एबा गंसे सावगारि नायो एबा मोनसे मुसुखानि समायनाखौ मोनदाडे, बै समायना मोनदांथिया जौनि गावनि नाजावथाव नोजोरनि सायावसो आबुंयै सोनारो । बिनि बादिब्ला समायना मोनदांथिया बेसादारि नड, सुबुंडारिसो ।

बेसेनमोन्दांथि सायख 'नाय :

बेसेन मोनदांथिनि गोबां बाहागो एबा थाखोनि बागै जौं दासिम मख 'बाय । बेसेन मोनदांथिनि सोमोन्दै गाहामै मिथिनोब्ला बेनि सायख 'नायनिबो गोनांथि दं । समाज आरो हारिमु लानानै बेसेन मोनदांथिफोराबो गुबुन गुबुन जानो हागौ । नाथाय बेसेन मोनदांथिफोरखौ सायख 'नानै सिमागोथे खालामनाया मोगथाडरि नड । 1979 मायथाइयाव हादरारि सोल्लोथाइ आरो बिजिरसं आफादा मोन 84 रोखोमनि बेसेन मोनदांथि सायख 'नानै मोनसे फारिलाइ बानायदों । बे फारिलाइयाव थानाय बेसेन मोनदांथिफोरनि गेजेराव मख 'जाथाव मोन 10 बेसेन मोनदांथिया जादों - (1) गावखौ हमथानाय, (2) अनखांनाय, (3) हेफाजाब, (4) गुबुन हारिमुनि फारसे सिबिनाय, (5) सिखोन-साखोन, (6) गुरै गोसो, (7) सुबुंथि गोनां, (8) हिंसा गैयि, (9) हादर मोजां मोननाय, (10) समाजारि बिबानथि ।

सोदोबथि:

बेसेन मोनदांथि - बेसेन गियान

गुलाय-गुजाय - आलाय सिलाय

आदर्श - नेरसोनथि

अराय गोजोर - गोबाव दिन जोरनाय

जारखुंथाइ - जार गोराथाइ (Sovereignty)

सुमोनथाइ - बेसेन होनाय

साग्रिद - सांग्रां, थियारि

सुबुंदारा - सुबुं खान्थि, सुबुं खुंथाइ (Democracy)

सोंथि :

1. भारतनि सोल्लोथाइ राहायाव बेसेन मोनदांथिनि सानथाइया माबादियै फैंदों सुंद 'थै बिजिरना लिर ।
2. बेसेन मोनदांथि बुडेब्ला मा मिथियो फरानि सायाव सोनारनानै सुंद 'थै लिर ।
3. 'थारै बेसेन मोनदांथिखौ समाजारि नोजोरनिफ्रायसो बिजिरनाय जायो' - फरानि बे बाश्राखौ बिजिरनानै लिर ।

4. गोजोर बेसेन मोनदांथिनि सोमोन्दै सुंद 'थै बिजिरनानै लिर ।
5. आखुथाइबादी आरो बाहायबादीफोरनि मतथाइनि सोमोन्दै लिर ।
6. भारतारि सानस्रिया बेसेन मोनदांथिखौ मोनबेसे बाहागोआव रानदों ? मोनफ्रोमाबो बाहागोनि सोमोन्दै सुंद 'थै बिजिर ।
7. सुंद 'थै लिर:
 - (क) खान्थियारि बेसेन मोनदांथि
 - (ख) सोलेरारि बेसन मोनदांथि
 - (ग) समायनायारि बेसेन मोनदांथि
8. बेसेन मोनदांथि सोमोन्दै नौनि साननायखौ गावनि बादियै फोरमाय ।
9. बेसेन मोनदांथि जामख 'नायखौ होबथानो फरायसाफोरनि मावनांगौआ मा सुंद 'थै बुजायना लिर ।

फरागियान :

सोल्लोथाइनि गुबै थांखिया जादों बेसेन मोनदांथि सोमजि होनाय । गोदो गोदायनिफ्राय आथिखालसिम बेसेन मोनदांथि सोल्लोथाइनि सायाव बेनिखायनो गोनांथि होबोनाय जादों । आथिखाल गोनोखो आरो जुन्थि बिद्या जौगानाय लोगोसे सोनाबनि हारिमुनि गोहोमाव गोदान जोलैनि गेजेराव भारतारि सानथौ आरो सोनाबारि बेसेन मोनदांथिनिबो गुलाय गुजाय नुजादों ।

फोरोंगिरिनिसिम :

सोल्लोथाइनि आयदाफोरा गुबुन गुबुन जाबोनो हमदों । बेबादि सानस्रिगोथौ आयदानि सायावबो गियान बुथुमनो फरायसाफोरखौ थुलुंगा होनो नाजानांगोन ।

लाइमोन बैसो आरो बेनि गोनां सोलोंथाइ

ड० स्वर्णलता दास

रा.सो. - मुस्त्री उमेश बर'

फराखौ सायख 'नायनि थांखि :

साफा सेंग्रासा एबा सिख्लाया लाइमोन बैसोआव मोगा-मोगि जायो - बिनि सोलेरारि गोसोथियारि, गोसो सानथाइयारि, समाजारि आरो आखल-आखुवारि बिथिडाव बायदि-मैया जेथोगोनां सोलायनायनि । बे समफारिया जोबोर खैफोद गोनां बैसो, थामहिनबा बारहुंखा आरो सादजालानि सम । बै समाव हौवा-हिनजावसानि जिउवा गोबारै खारथाइनि सोलायथाइफोरखौ हमथानो थाखाय मोजां आबहावा आरो नांगौ रोखोम सोलोंथाइनि गोनां जायो, नडाब्ला - जिउ खारथाइयाव बायदि रोखोम बेले-बेजे सोमजिनायनि थासारि फैनो हागौ । लाइमोन बैसोआ जाबाय गोदान जांखिथाइनि बैसो । मेंनो रोडै गोहोनि जौगासारथाइया साफा सेंग्रा-सिख्लासानो गोदान फैसालि बेखेव होयो । लाइमोन बैसोनि सोलोंथाइ राहाया नांगौ बादि जानाया थारैनो गोनां । बेनिखायनो लाइमोन बैसोआव माबादि सोलोंथाइ होनाया बिसोरनि गोनां बेखौ मिथि होनो थाखाय बे फराखौ जथायनाय जादों ।

लिरगिरिनि सिनायथि :

1949 मायथाइयाव जोनोम जानाय ड० स्वर्णलता दासा सासे बिबुंगिरि (Lecturer) महरै साखि-जिउखौ जागाय जेनो । गिबियाव बिथाडा गुवाहाटी सन्दिकै हिन्जावसा फरायसालिमायाव बोसोरनैसो बिबुंगिरि महरै साखि मावनानै उनाव गुवाहाटी मुलुग सोलोंसालियाव सोलोंथाइ आयदानि गाहाइ बिबुंगिरि जाहैयो । जौसिन गेजेरारि थाखोनि सोलोंथाइ आयदानि फरा-बिजाब लिरनायाव लोब्बा थनाय ड० दासा गां नैजिनिखुइबो बांसिन बिजाब लिरना दिहुनबाय । बेफोरनि अनगायैबो बिथां दासनि गोबां बुरखांथाइयारि लिरबिदांफोरा हादरारि आरो मुलुगारि लाइसिफोराव सेबखां जादों ।

गुबै फरा :

सुबुं जिउनि लाइमोन बैसोखौ मोनसे महर सोलायनाय बैसो होन्ना बुनो हायो । स'नाथि उन्दै बैसोनि गोरलै-गेबें खारथाइनि सोलायै साफा हौवा एबा हिन्जावसाया बै बैसोआव मोगा- मोगि जायो - बिनि सोलेरारि, गोसोथियारि, गोसो सानथाइयारि (एबा गोसो सानखांथियारि), समाजारि आरो खान्थियारि बिथिडाव बायदि-मैया जेथो गोनां सोलायनायनि । बेखायनो लाइमोन बैसोनि सोमोन्दै गोबाडा गोबां बाश्रा फोरमायदों । खायफानि बादिब्ला - बे समफारिया जादों - बारहुंखा आरो साद-जालानि सम । बे समाव जानाय गोबारै खारथाइनि सोलायनायफोरखौ हमथानो थाखाय मोजां आबहावा आरो नांगौ रोखोम सोलोंथाइनि जोबोर गोनां । नडाब्ला - बै बारहुंखाया जिउनि खारथाइयाव बेले-बेजे सोमजिहोने हागौ । गुबुन मोनसे बिबुंथाइ लेखायै लाइमोन बैसोआ जाबाय-जिउनि गोदान जांखिथाइनि सम, बायदि बिथिडाव जानाय जौगासारथाइनि मेंनो रोडै गोहोआ साफा सेंग्रा एबा सिख्लासानो गोदान गोदान फैसालि बेखेवनायनि खाबु होयो । बे मोनै जुदाथियारि बिबुंथाइनि थाखायनो लाइमोन बैसोनि सोलोंथाइया गासै सोलोंथाइ बिखान्थियाब मोनसे गोनांथियारि जायगा मोन्नाया गनायथाव ।

लाइमोन बैसोनि समसिमनाया जादों - उन्दै आरो बैसोगोरनि गेजेर समफारि । बेखौ बैसो ज'थाइ (एबा बैसो गोरोबथाइ) बैसो महरबो मिथि जायो । गासैबो जिउनि बांसारथाइ आरो जौगासारथाइया मोनसे थाद'यै, जोबथा गैयै सोलिखान्थि आखुथाइफोरनि बागै नोजोर होना 10-11 बैसोनिफ्राय 18-19 बोसोर बैसोनि समफारिखौनो सरासनस्रायै लाइमोन बैसो महरै सिनायनाय जायो । अदेबानि आथोन जुदाथि, सुबुं जुदाथि एबा दै-बारनि फारागथिनि थाखाय गोजौआव मुंख'नाय सम सिमनाया सोलाय-सोल' जानो हागौ । बेखायनो गुसु बारहावा गोनां हादरनिखुइ गदुं बारहावागोनां हादरनि हिन्जावसानि लाइमोन महर मोन्नाया सिगांसिन जायो ।

जिउनि गोदान जांखिथाइ महर लाइमोन बैसोनि थाखाय जों माबादि सोलोंथाइ सायख'नो ? मानोना सोलोंथाया जादों - अन्नायनिनो गुबुन मोनसे फोरमायथाइ । सोलोंथाइनि गेजेरजों खुदिया, हौवासा-हिन्जावसा आरो सेंग्रा-सिख्लाखौ जों समाजसिम बरायना लाबोयो समाजनिनो मोनसे नागारहायै आंगो बाहागो महरै । अदेबानि बेनि थाखाय बिथांमोनाबो नांगौ रोखोमनि रोंगौथि दिन्थिनो हानांगोन ।

लाइमोन बैसोनि गोनांथियारि सोल्लोथाइनि बाथ्रा सावरायनायनि सिगाडवनो हौवा-हिन्जावसानि गेजेराव नुजानाय सोलायथाइफोरनि सोमोन्दै जोंहा मोनसे थि हममोनदांथि थानाया गोनां । गोसो बिगियानारि नोजोरनिफ्राय लाइमोन बैसोआ-जिउथाइयारि, गोसोथियारि, गोसो सान्थाइयारि आरो समाजारि बिथिंआव राफोद जानाय (एबा राफोद महर मोन्नाय) बाथ्राखौनो फोरमायो । बे बिथिडव सोलेरारि एबा जिउथाइयारि सोलायथाइफोरा जेसेबां रोखा महरै नुजायो गोसोथियारि एबा समाजारि गुणफोरा नुजाया, नाथाय जौगासारथाइनि मोनफोमबो बिथिडव मोनसेहा गुबुन मोनसेजों मोनफा सोमोन्दो दड। गुबुन फारसे सुबुं जिउनि जौगासारथाइनि बिथिडव बयनिखुइबो गोनांथि गोनां बैसो महरै गनायथि मोन्नाय लाइमोन एबा बैसो ज 'थाइ बैसोनि गोबां आखुथाइफोरखौ गुबुन जायखि जाया खल 'बावनो नुनो मोना ।

खुदियानि मुलुग आरो बैसोगोरानि मुलुग- बै मोनै मुलुगानि फोनांथाइयारिया जादों - लाइमोन बैसो । लाइमोननि मुलुगाव बेखायनो उन्दैनि सानबोलाउरि आरो बैसोगोरा सुबुंनि मोगथां हममोन्दांथिया नुजायो । बे मोननैनि गेजेराव लाइमोन बैसोआ जाबाय जिउनि जेथो गोनांसिन एबा गोनांथि गोनां सम ।

सोलेरारि जौगासार:

लाइमोन बैसोनि गोबरै (गोख्रै सोलेरारि जौगासारथाइखौ गोलेँयैनो हमदां हायो । जौमोन जाफुनाय लोगो लोगो जानाय जिउवारि सोलायथाइया हौवा-हिन्जावसाफोरनि सोलेरनि बायदि बाहागोनि महर लिरथाइ, लाउथाइ बांनायनि लोगोसे हौवा-हिन्जावनि सोलेर दाथाइनि फाराग (गुबुनथि) नुनो मोनो । जोनोम होनो हानायनि गोहो मोनफुंनया लाइमोन बैसोनि मोनसे गाहाइ आखुथाइ आरो बेनि जाहोनाव सोलेरनि बायदि सोलायथाइ, बाथ्रा-रिसारनि सोलायथाइ बायदिया नुजायो । बे जोबनो गैयै सोलायथाइफोरानो सेंग्रा-सिख्लासानि गोसोआव गाव-सांग्रांथियारि सान्नाय लाबोयो, जाय नंखायै लाजिनाय, गिनाय एबा उसु-खुथु सान्नाय सोमजि होयो ।

उल्था आथोननि फारसे हाबिलास, लुबैनाया लाइमोन बैसोनि गुबुन मोनसे गाहाइ आखुथाइ । उन्दै बैसोआव समान आथोननि लोगोसे गोरोबनो लुबैनायनि सोलायै हौवा-हिन्जावसाया उल्था आथोननि फारसे नोजोरथियारि सान्नाय सोमजिखाडे । थारैनो जोंनि सोलेराव थानाय सिंनि गियान मोनदांथियारि बिथोबफोरनि नुजाथिनाय फिथाइ महरै जानाय जिब-रासायनारि दाथाइ-खान्थिनिनो

बेयो मोनफा फिथाइ । बे दाथाइ खान्थियाव सोलेरनि जौमोन बिथोबफोरा गोख्रों जाखानानै लाइमोनफोरखौ जौमोननिनो फेजेन हायै गोहोनि बिगोमा जाहोयो । बे गोहोखौ मोजां लामाजों दैदेनलानो हायोब्ला लाइमोनाव नुजानाय गोबां जेंनानिफ्राय बारग 'नो हायो ।

गोसोथियारि जौगासार:

लाइमोन बैसोआव गोसोथियारि गोहोआबो आबुं खारथाइ महरै जौगासारो । गोसोथियारि गोहोआ जादों - सोलो, उदां सान्थाइनि गोहो, बिबुंथाइ गोहो, बायदि-मैया बिथिडव मिथिनो लुबैनाय बायदि बायदि । लाइमोननि जागाय जेन्नायाव गियानारि जौगासारथाइनि खारथाइया इसे खमायोब्लाबो, जोबनायथिं बेयो गोख्रै खारथाइबो जाहैयो आरो लाइमोननि जोबथाइयाव गियानारि गोहोआ बांसिनै मोजां फिथाइ मोनहैयो ।

गुबुन फारसे, उन्दै बैसोनि नुनाय एबा गुबुननिफ्राय सोल्लोनाय सोल्लोथाइनि सोलायै गावनि बिजिरनाय गोहोजों बानजाथावै सान्नो हानाय गोहोआबो जौगासारो बे बैसोआवनो । दिदोम सान्नायनि उल्थायै उदां सान्थाइनि गोहोआ लाइमोन बैसोनि मोनसे आखुथाइ, जाय उदां आरो नंगुबै सान्नाय - हनायनि जौगासारनायाव थोजासे थुलुंगा होयो । फंसे बाथ्रायाव बुंनो थाडेब्ला - देरसिन जिउ सुबुंनि गुबुन गुबुन गोसोथियारि गोहोनि आबुं जौगासारनाया जाफुंसारो बे लाइमोन बैसोआवनो ।

गोसो सान्थाइयारि जौगासार:

सेंग्रा - सिख्लासानि गोसो सान्थाइयारि बिथिडव जौगासारनाया आबुंथि गोनां होन्ना बुंनो हायो । गोसो सान्थाइ-हमदांथिया गोबां बांनायनि जाहोनाव बांसिन बिथिडवनो बिसोरनि जिउवा फुरायै गोसो सान्थाइजों दैदेन जायो । गोसो सान्थाइनि आबुं जौगासारनाया सेंग्रा-सिख्लासानि गोसो-मुलुगाव दावराव सोमजि होयो; जायनि जाहोनाव बिसोरनि गोसोआ मब्लाबा गोबां मिजिंथियारि आरो मब्लाबा गोबां फेलें मिजिंथियारि जाबायो । मोनफुंनया - मोनफुडैनि दग ' - मग 'आव गोलेना गोबां समाव गोबाडनो गुबुनजों लोगोसे गोरोबनो हायै जेंनाया नुजाथियो । गोगगो (गुफुं) महरा गावनि गोसोखौ दैदेनलानो हायैयाव गोबां समाव सेंग्रा-सिख्लासाफोरा बिग्रायारि सान्थाइ गोनां जाबायो (एबा बिग्रायलु सानग्रा जाबायो) । नख 'र आरो समाजनि फारसे नंखाय सान्नाय (फोथायै सान्नाय) सोमजिखांनया बिब्दि सेंग्रा - सिख्लासाफोरखौ नांगौ समाव मोजां (गोगगो) सोल्लोथाइ होनो हायाब्ला - समाज बेरेखा खामानिफोरा सोमजिखाडे ।

समाजारि जौगासार:

लाइमोन बैसोआव समाजारि जौगासारनाया मोनसे मुंख 'जाथाव आयदा। दोलोआरि सानथाइनि लोगोसे समान अनसायनाय गोसो बेरखांफैयो बे बैसोनि समफारियाव। समब्रा-समब्रि बैसोनि गेजेराव गोसो-गोथोवै लोगोआरि आरो सहायथियारि सानथाइ सोमजिखाडे। समब्रा -समब्रिनि लोगोसे जानाय बादायलायनाय-सहायलायनायनि आन्दोआव बेरखांफैयो मोनसे 'लेडइ-हारिमु' जायखौ लाइमोन- हारिमु होन्ना फोरमायनो हायो। लाइमोन बैसोनि फाव-फेसन, गान्नाय-जोमनाय, बाथ्रा-खोथा फोरमायनाय, सान्नाय-हनायनि अनगायैबो राजखान्थियारि सानथाइफोरावबो - बे हारिमुवा थोजासे गोहोम खोलैनाय नुनो मोनो। गोसो होनांगौ बाथ्रा दि - गोबां बिथिडव लाइमोन हारिमुवा मोजांनिखुइ गात्रिनि फारसेसो बागलायलाडे। जौनि समाजाव नुजाथिनाय समाजारि बेरामबादि फेग्रा मुवा-बेसाद बाहायनाय, द्रागसनि फारसे गोसो होनाय एबा समाज गनायथियारि आखल-आखुनि फारसे गोसो बायग्लिनाय बायदि आयदायाव लाइमोनफोरखौ मोजां सोल्लोथाइ गोनां खालामाब्ला खैफोदारि जायो।

आखल-आखुवारि जौगासार:

लाइमोन समफारियावनो सुबुंनि गाव आंगो सानथाइया सोमजिखाडे आरो आखल-आखुवारि बिथिडव इसेब्लाबो बेनि गोहोम गोलैयो। दोहोरोम, सानथौ एबा जिउनि नोजोर थान्खिनि फारसे गोनो-गोथो सोमजिखाडे आरो बेनिनो फिथाइ महरै गोसोथियारि बेले-बेजेनिबो सोमजिखांनो हागौ। खायफा बिथिडव बिमा-बिफा एबा समाजनि बैसोगोराफोरनि सान्नाय-फोथायनायनिफ्राय एरखेना गावनि बिबुंथाइ बिजिरनायजौ मोनसे गोदान आखल-आखु गोनां समाज सोर्जिनो सानबायो। जौमोननि थुंगि गैयि गोहोनि गुथाला लाइमोन गोसोआव सोर्जि होयो मोनसे गासैजौबो अनसाय जानाय-मुलुगनां अनज्जलायनायनि सानथाइ। समाज सांग्रांथिनि लोगोसे सोमजिखाडे गावनिल' नडै गोसो सानथाइ। जायनि जुनै लाइमोना गोदान समाज दानायनि सिमाडव नांथाबो। सैथोनि थाखाय जुजिनो लानाय गोसोथिनि थाखायनो मुलुगनि गोबां समाजारि जांखिथाइयाव बाहागो लानायफोरनि बांसिनानो सेंग्रा-सिख्लासा। आखल -आखुथिनि बिब्दि जौगासारनाया समाजारि बिबान गोनां, अनफाउरि एबा मुलुग अनफाउरि बायदि सान्नायनि फुंखा सोमजि होनायाव मदद खालामो। सोलेरारि, गोसोथियारि बायदि बिथिडव सोलायनाय आरो जौगासारनायनि अनगायैबो सेंग्रा-सिख्लासानि गेजेराव

गुबुन खायफा आखुथाइफोरबो नुनो मोन्नाय जायो। लाइमोननि सोल्लोथाइ बिथिडव बेफोर आखुथाइया गुबैयैनो गोसो होथाव नांगौ मानोना जौगासारनाय आद्राफोर खलबाव बेफोरबादि गुबैथियारि गोसो सानथाइ सरासनम्रायै नुनो मोना।

समायना सिमां नुनाय एबा नंखाय सानबोलाउरिया जादौं लाइमोन बैसोनि मोनसे फोरमायथियारि आखुथाइ। सानबोलाउरि गोहोनि सोमोनांथाव जौगासारनाय सेंग्रा-सिख्लासानि गोसोआव सानबोलाउरिनि माया - जे गेवसार होयो आरो गोबां बिथिडव मोगथांथिनिफ्राय एरखेना सानबोलाउरिनि मुलुगावसो बिसोरखौ दावबायनाय नुनो मोनो। अदेबानि समायना सिमांनि मोनसे मोजां बिथिबो दं-जाय लाइमोननि सोर्जियारि रोंग 'थिखौ बांहोनायाव मदद खालामनो हायो। गोसोथियारि ख 'हाबमोनफुंनो थाखाय गोबां सेंग्रा-सिख्लासायानो मेथाइ, थुनलाइ बायदि गुबुन गुबुन बिजौनि गेजेरजौ गावनि सोर्जिलु सानबोलाउरि फोरमायनो थाखाय नाजायो। गुबुन फारसे, सानबोलाउरिनि माया-जेयावल' नांथाबालासिनो गोबाडनो गोहोथियारि खामानियावबो बाहागो लानो थाखाय दावखोलाडे। खायफानि गोसोआव फिन दावबायनो लुबैनाया जाखाडे, हादर, गुबुन हादराव गिदिंबायनो हाबिलास जायो आरो माब्लाबा माब्लाबा नख 'रनि रावबो मिथियैजासे ब 'बेयावबा जायखारलांनाय सेंग्रा-सिख्लासानि बिदिन्थिबो मोन्नाय जायो।

बीरफुजानि फारसे हाबिलासा लाइमोन बैसोनि गुबुन मोनसे आखुथाइ। गाव मोजां मोन्नाय सुबुंनि नेसॉनखौ नाजावनायनि हाबिलासा बे समाव गोबरै बांसिनो आरो बेखायनो बै सुबुंनि सुबुंथियारि गासैबो गुणखौ सेंग्रा-सिख्लासाया स्रियै सोल्लो नो हमो। लाइमोनफोरा नेरसोन गोनां सुबुं महरै नाजावनाय नुनो मोनो सरासनम्रायै सावथुन मुलुग एबा गेलेनाय मुलुगजौ लोगोसे नांथाबनाय सुबुंफोरखौ। बीरफुजानि फारसे बे हाबिलासखौ थि लामाजौ लांनो थाखाय लाइमोन बैसोनि सोल्लोथाइ फरा-फारियाव गेदेमा सुबुंनि जिउखौ राडरि फरा थिसननाय जायो। सेंग्रा-सिख्लासानि गोसोनि बयनिखुइबो गोनांथि गोनां आखुथाइया जादौं गावनि गोसोजौ गाव-आंगोथिनि गोरोबलायि (Identity Crisis)। बे जैनाया लाइमोन गोसोआव जाखांफैयो उल्था सानथाइयारि बायदि-मैया हममोनदांथिनि गोहोमाव। आखल-आखुथि, बेसेनथि, समाजारि बिबान गोनां बायदि नेसॉनथिनि मोगथां मुलुगनि लोगोआव गोरोबिफोरखौ सेंग्रा-सिख्लासाया गावनि सोल्लोथियारि सान्नाय एबा सान्नाय-हनायजौ नायबिजिनो हाया। लाइमोनाव नुजाथिनाय नेसॉनथियारि सानथौनि लोगोसे मोगथांथिनि गोरोबलायिया जोनोम होयो गाव-आंगोथिनि

गोरोबलायि । समाज दानायाव बेफोरबादि गोरोबलायिया गुथाल गोहोआरि सोमजि होयो । माब्लाबा माब्लाबा बिब्दि गोरोबलायियानो समाज दाथाइखौ सोलायहोना गोदान समाज-दाथाइ सोर्जिखांनायाव थुलुंगा होनायबो नुनो मोनो ।

बेफोरबादि सोलायनाय आरो आखुथाइनि जाहोनावनो लाइमोन समफारिखौ जिउनि जेथोगोनांसिन सम महरै सिनायनाया ओंथिगोनां । जिउनि दाथाइयारि सम महरै गनाय जानाय बै बैसोनि जौगासारनि थाखाय गोनांथियारि सोलोंथाइनि राहा खालामनाया बेनिखुइ बांसिन ओंथिगोनां बाथ्रा ।

लाइमोन बैसोनि गोनांथियारि सोलोंथाइ :

लाइमोन बैसोनि थाखाय सोलिथाइ सोलोंथाइया जादों - गेजेरारि सोलोंथाइ । लाइमोन एबा बैसो - ज'थाइ बैसोनि हौवा-हिन्जावसाया फरायनाय सोलोंसालिफोरा जादों - गेजेरारि सोलोंथाइनि फसंथान । अदेबानि, लाइमोननि सोलोंथाइ - राहानि सोमोन्दै बुंनो थाडेब्ला - फसंथानारि सोलोंथाइनि लोगोसे फसंथानारि नडि (अनानुष्ठानिक) सोलोंथाइखौबो समानै गोनांथि होनांगोन ।

सुबुं जिउनि जेथो बुंफबनाय लाइमोन बैसोखौ सरजाबना गेजेरारि सोलोंथाइया गासै सोलोंथाइ राहायावनो मोनसे गोनांथि गोनां जायगा आवग्रिबोदों । मानोना गेजेरारि सोलोंथाइनि गेजेरजों मोनफा हारिनि थांखि आरो नेसोनिथिखौ (आदर्शखौ) हमदां हायो । हारिमायारि सोलोंथाइ खान्थिनि बिथांखिखौ मावफुंनो हायो बे खलबनि सोलोंथाइयावनो । उदांभ्रिनि उन जिथाइयावनो दाजानाय गेजेरारि सोलोंथाइ आयोगा (Commission, 1952-53) गेजेरारि सोलोंथाइनि मोनथाम थांखिनि सोमोन्दै फोरमायदों । बेफोर जादों - (i) हादरनि सोलिथि समनि राजखान्थियारि, समाजारि एबा रांखान्थियारि जेंनानि गुदि-बिथायाव आथिखाल आरो इयुननि दाबि सुफुंनो हानाय बादि सोलोंथाइ राहाखौ महर होनाय, (ii) दोहोरोम सायख 'थै हादरनि मोजां नोगोरारि महरै नांगौ रोखोमनि गुण सोलोंनानै रांखान्थियारि जौगाथाइयाव मदद खालामनाय आरो (iii) हारिमायारि खौसेथिनि जौगासारहोनाय । गुबुन फारसे, 1986 मायथाइयाव भारत सरकारा फोसावनाय हादरारि सोलोंथाइ खान्थियावबो गेजेरारि सोलोंथाइखौ गोनांथियारि नोजोर लानाय जादों । बे सोलोंथाइखौ खामानि मोखाडारि खालामनायनि गरन्थ लानाय जादों । बे राहानि गेजेरजों हादरनि सुबुं गोहोखौ रांखान्थियारि जौगासारनायनि फारसे आवगायलांहोना हायो । नैजिसे जौथाइनि सोलोंथाइनि थाखाय दाजानाय मुलुगनाडारि सोलोंथाइ आयोगा (1996) गेजेरारि सोलोंथाइखौ जिउनि लामादिंग्रायारि (Crossroads) होन्ना फोरमायदों,

जेराव इयुन जिउनि जोबोर गोनांथियारि फुंखाफोरखौ बुथुमना लानो हायो आरो रोंथाइ (योग्यता), लुबैनाय (हाबिलास) एबा नांगौबादियै गाव आंगो लामाजों (Avenue) जिउ-लामायाव दावखेनो हायो । मानोना सोलोंथाइया जाबाय - समाज सोलायनायनि मोनसे गोहोआरि बिजों ।

फंसे बाथ्रायाव बुंनो थाडेब्ला, गेजेरारि खलबनि सोलोंथाइया गुदि खलबनि सोलोंथाइखौ गोसार होना गोजौ खलबनि सोलोंथाइयाव हाबनायनि मोनथाइ होनाय लोगोसे गाव-उदांथि गोनां खालामो ।

गेजेरारि खलबनि सोलोंथाइनि मोनै गाहाइ गुबैथिनि गिबिया जादों - बे खल 'बनि जेबो गुबैथियारि फरा-फारि गैया । सुबुं हारिनि गासै लुबैनाय बादि फरा-फारिनि अरथाइखौ फुवारना गासैखौबो सरजाबफानाय सोलोंथाइ होनो हायो बे खलबावनो । गथ 'नि सुबुंथिया गासै बिथिडव जौगासारनायनि थाखाय बे गासैखौबो सरजाबफानाय फरा-फारियाव गुबुनथिनि बिबां बांनाया गोनां ।

नैथिया जादों - बै समफारिनि फरायसाफोरा जाबाय - लाइमोन एबा बैसो-ज'थाइ बैसोनि । बे समाव सुबुंनि बायदि सोलो, जिउ-राहाया बाडे । मिथिगानि सोमोन्दै गोथौवै मिथिनो थाखाय बिसोरो आथुर जाबायो । समाजनि फारसेबो बिसोरनि मिथिनो लुबैनाया बांलाडे । बायदि आथुर, हम मोन्दांथि आरो हाबिलासनि फिथाइ महरै लाइमोन गोसोआव सोमजिखांनाय गुलाय-गुजायनि थाखायनो बायदि रोखोमनि नांगौथिया नुजाफैयो । लाइमोननि सोलेरारि, गोसोथियारि, गोसो सान्थाइयारि एबा समाजारि नांगौथिफोरखौ सुफुंनायनि थांखियै सोलोंसालिनि गुबुनथि गोबां लेडय आयदा थिस 'न्याय, सोलोंसालि आरो नख 'रनि गेजेराव गोखों सोमोन्दो लाखिनाय, सोलोंसालि आरो गासै समाजनि गावजों-गाव सोमोन्दो गायस 'न्याय बायदियाव गोनांथि होनाय जायो । मोजां बिथाखियारिजों महर होनाय गेजेरारि सोलोंथाइया बेखायनो, लाइमोननि बायदि मोखाडारि नांगौथिफोरखौ सुफुंनायाव देरहासार जानो हायो । फरा-फारिनि सोमोन्दो गोनां बाथ्रायावल' गोनांथि होआब्लानो गोरोबथाइयारि फराफारिनि हाबाफारिखौबो नांगौ रोखोमै गोनांथि होना नायबिजिरोब्ला - बे सोलोंथाइया सेंगा - सिख्लासाफोरनि थाखाय बांसिन फिथाइ गोनां जागोन । बे बिथिडव हादरारि सोलोंथाइ बिजिरसं आरो फोरोंथाइ गथुमा ज'थायनाय हादरारि फराय-फारि रोखोमथाइ, 2005 (National Curriculum Framework, 2005) नि सुबुस्थाइफोरा गुबैयैनो गनायजाथाव । बे फरा-फारि दाथाइनि थांखि बादियै फरायसालियाव होनाय गियाना बायजो मुलुगनि

लोगोसे फरायसाफोरनि गोसोखौ फोनांजाब होनो नांगौ आरो फरा-फारिया बिजाबावल' नांथाबना थानो नाडा। बेल' नडा, गियाननि अरथाइखौ गुबै गुबै आयदायावल' सिमनागोथे खालमाब्लानो मोनसे मोजां गोरोबथाइ गोनां गियाननि फुंखाखौ फरायसाफोरनो होनो थाखाय थियारि जानो नांगौ। फरा-फारिनि गेजेरजो होनाय गियाननि मोजां-गोरोबथाइयारि जौगासारनि थाखाय सोल्लोथाइनि लोगोआव थोँजोँ आरो खेंसालियै सोमोन्दो थानाय गासै सुबुंफोर जैरै - बिमा-बिफा, नख'रनि गाहाइ, फोरोंगिरि आरो गुबुनफोरनि बिबान आरो मावनांगौआ समानै गोनांथि गोनां।

लाइमोन बैसोनि थाखाय ज'थायनाय गेजेरारि खलबनि फरा-फारियाव थानाय मोनब्रै गुदि आरो गुबै आयदाया जादों - (i) राव सोल्लोनाय, (ii) सानखान्थि, (iii) बिगियान आरो (iv) समाज बिगियान। बेनि अनगायै आरो खायफा आयदायाव गोनांथि होनो थाखाय थिरां खालामनाय जादों। दारिमिनारि सोल्लोथाइ, सावस्रि आरो सोलेरारि सोल्लोथाइ, आबहावा बिगियाननि सोल्लोथाइ, जौमोन सोल्लोथाइ आरो सुबुं सोल्लोथाइ, सुबुं मोनथाइ आरो गोजोनथिनि सोल्लोथाइ, बेसेनथियारि सोल्लोथाइ बायदि खायफा उफ्रा आयदा थिस'न्नाया गेजेरारि खलबनि सोल्लोथाइखौ गाव-आबुंथिगोनां खालामदों। बेनि जाहोनाव सेंग्रा-सिख्लासानि देहायारि,, गोसोथियारि समाजारि सोमोन्दोगोनां नांगौथिफोरखौ सुफुंनो हागोन होन्ना सान्नाय जादों।

दिनैनि मुगाया मुलुग - फोनांजाबनि मुगा, बिगियान आरो बाहाय बिगियाननि देरहासार दावखोथाइनि मुगा। गोदान गोदान संदिहुन्थाइया मुलुगनि बायदि जायगानि जानथाइखौ सुंसिन खालामदों, सुबुं-फोनांजाबनि बायदि बिजों, सोल्लोथाइनिबो बिजों महरै गनायथि मोन्दों। सावथुन, रेडिअ', टेलिभिसन, इन्टारनेट बायदि बिगियाननि आयजेंफोरा सुबं समाजाव मोनसे मुंख'जाथाव जायगा आवग्रिनो हानाय जादों। नाथाय गोसोथियारि आबुंयै राफोद महर मोनै लाइमोन बैसोनि हौवा-हिन्जावसाया खायफा बिथिडव समनि खारथाइजों गोजावलांनो लुबैनायनि हांखुरथिनाय नुनो मोनो, जाय बिसोरनि लोगोसे समाजनिबो खहा खालामो। मोनफ्रोम बेसादहानो मोजां-गात्रि मोनैबो बिथिं दं। बेखौ थख'-थख'यै नायना थार नंगौ नडा बिजिरनो हानाय गोहोखौ लाइमोन बैसोनि थाखाय सायख'नाय सोल्लोथाइया होनो हानांगोन। बे बिथिडव बेसेनथियारि सोल्लोथाइया गुबैयै ओंथिगोनां। गोरोबलायैजों बुंफ'बनाय लाइमोन बैसोनि रादायथियारि सेंग्रा-सिख्लासाफोरखौ साफा-साफा मोजां गुणगोनां देरहासार सुबुं महरा जाफुंसार

होनो थाखाय जौनो नांगौ मोनसे नेसोँनथि गोनां सोल्लोथाइ खान्थि- जेराव दं गोसो सानरोंथाइ बांनाय आरो सानमोनखांथियारि सोर्जिन थाखाय नांगौ रोखोम आबहावा जाय बयनिखुइबो साबसिन समाज दानायनि गियान होयो।

सोँथि :

1. लाइमोन बैसोनि मोनसे आखुथाइ फोरमाय।
2. माबे समफारिखौ लाइमोन बैसो होन्ना मिथिनाय जायो ?
3. सुबुं जिउनि माबे बैसोखौ महर सोलायनाय बैसो होन्ना फोरमायनो हायो ?
4. आखल-आखुवारि जौगासारनाया सेंग्रा-सिख्लानि गोसोआव माबादि सान्नायनि जाखांफुनायाव मदद होयो ?
5. लाइमोन बैसोनि थाखाय फोसावनाय सोल्लोथाइखौ मा सोल्लोथाइ होन्ना बुंनाय जायो ?
6. लाइमोन बैसोनि गोसो सान्थाइयारि आरो समाजारि जौगासारथाइनि सोमोन्दे गुवारै लिर।
7. लाइमोन बैसोनि थाखाय माबादि सोल्लोथाइया गोनांथि बिदिन्थिजों फोरमायना लिर।
8. लिरसुंथाइ लिर:
 - (क) समायना सिमां, (ख) बीरफुजा, (ग) समाज बेरेखायारि लाइमोन,
 - (घ) बैसो जथाइ बैसो, (ङ) गेजेरारि सोल्लोथाइ, (च) मुलगनाडारि सोल्लोथाइ आय'ग।
9. बेखेवना लिर:
 - (क) सुबुं जिउनि लाइमोन बैसोखौ मोनसे महर सोलायनाय बैसो होन्ना बुंनो हायो।
 - (ख) लाइमोन बैसोनि गोनांथियारि सोल्लोथाइनि बाथ्रा मोनसे थि हममोन्दांथि थानाया गोनां।
 - (ग) उल्था आथोननि फारसे हाबिलासा बैसोनि गुबुन मोनसे गाहाइ आखुथाइ।
 - (घ) लाइमोन बैसोआव समाजारि जौगासारनाया मोनसे मुंख'जाथाव आयदा।
 - (ङ) समायना सिमां नुनाय एबा नंखाय सानबोलाउरिया जादों लाइमोन

बैसोनि मोनसे फोरमायथियारि आखुथाइ ।

फरागियान :

उन्दै बैसो आरो बैसोगोरानि गेजेर समफारिया जाबाय लाइमोन बैसो । बे समफारिखौ सुबुं जिउनि महर सोलायनाय बैसो होन्ना बुंनायनि अनगायै खायफा खायफा सोल्लोथाइगिरिनि बादिब्ला बेखौ गोदान जांख्रिथाइनि बैसो होन्नाबो बुंनाय जायो । लाइमोन बैसोआव हौवा-हिन्जावसाया गुफुं महरै गावनि गोसोखौ दैदेनलानो हायैनि गोबां समाव बिग्रायारि जाबायो । बिब्दि समाव मोजां सोल्लोथाइ होनो हायाब्ला बिसोर खैफोदारि जाबायो ।

लाइमोन बैसोनि हौवा-हिन्जावसाया फरायनाय सोल्लोसालिया जादों - गेजेरारि सोल्लोथाइनि फसंथान । बे समाव फसंथानारि (आनुष्ठानिक) सोल्लोथाइनि लोगोसे फसंथानारि नडै (अनानुष्ठानिक) सोल्लोथाइनिबो समानै गोनांथि होनाया गोनां ।

1952 मायथाइयाव आय 'गा गेजेरारि सोल्लोथाइनि मोनथाम थांखिनि सोमोन्दै मुंख 'दों । बेफोर जादों -

- (i) हादरनि सोलिथि समनि राजखान्थियारि, समाजारि एबा रांखान्थियारि जेंनानि गुदि बिथायाव आथिखाल आरो इयुननि दाबि सुफुंनो हानाय बादि सोल्लोथाइ राहाखौ महर होनाय ।
- (ii) दोहोराम सायख 'थै हादरनि मोजां नोगोरारि महरै नांगौ रोखोमनि गुण सोल्लोनायै रांखान्थियारि जौगाथाइयाव मदद होनाय ।
- (iii) हारिमायारि खौसेथिनि जौगासार होनाय ।

गेजेरारि खलबनि सोल्लोथाइनि मोनै गाहाइ गुबैथिनि गिबिया जादों - बे खलबनि जेबो गुबैथिगोनां फरा-फारि गैया । सुबुं हारिनि गासै लुबैनाय बादि फरा-फारिनि अरथाइखौ फुवारना गासैखौबो सरजाबफानाय सोल्लोथाइ होनो हायो बे खलबावनो ।

नैथिया जादों - बे समाव सुबुंनि बायदि सोलो - जिउ राहाया बाडो । हाबिलासनि सोमोन्दै गोथौवै मिथिनो थाखाय आथुर जाबायो । जाहोनाव लाइमोन गोसोआव सोमजिखानाय गुलाय-गुजायनि थाखायनो बायदि रोखोमनि नांगौथिया नुजायो । बेनि थाखाय सोल्लोसालिनि गुबुनथि, गोबां नांगौ रोखोमनि आयदा थिस 'न्नाय, सोल्लोसालि आरो नख 'रनि गेजेराव सोमोन्दो गायस 'न्नाय बायदियाव गोनांथि होनाय जायो ।

लाइमोन बैसोनि थाखाय थि खालामनाय गेजेरारि खलबनि फरा-फारियाव थानाय मोनब्रै गुदि आरो गुबै आयदाया जादों । (i) राव सोल्लोनाय, (ii) सानखान्थि, (iii) बिगियान आरो (iv) समाज बिगियान । बेनि अनगायैबो दारिमिनारि सोल्लोथाइ, सावस्रि आरो सोलेरारि सोल्लोथाइ, आबहावा बिगियाननि सोल्लोथाइ, बेसेनथियारि सोल्लोथाइ बायदि गोनां आयदा थिस 'नथिनायजों गेजेरारि खलबनि सोल्लोथाइखौ गाव-आबुंथि गोनां खालामनाय जादों ।

आथिखाल मुगाया मुलुग-फोनांजाबनि मुगा, बिगियान आरो बाहाय बिगियाननि देरहासार दावखोथाइनि मुगा । बेखायनो गोरोबलायै गोनां लाइमोन बैसोनि रादायथियारि सेंग्रा-सिख्लासाफोरखौ साफा साफा मोजां गुण गोनां, देरहासार सुबुं महरै जाफुंसार होनो थाखाय जोंनो नांगौ मोनसे नेसोनथि गोनां सोल्लोथाइ खान्थि, जेराव दड'- गोसो सानरोंथाइ बांनाय आरो सानमोनखांथियारि सोर्जिनि थाखाय नांगौ रोखोम आबहावा, मोनसे बयनिखुइ साबसिन समाज दानायनि गियान ।

उफ्रा मिथिनो गोनां :

लाइमोन बैसोनि सोमोन्दै रोखाथियै मिथिनो थाखाय 'हालधीया चराये बावधान खाय' (ह 'मेन बरगोहाजनि) मुंनि बिजाबखौ फरायनांगोन आरो लाइमोन बैसोनि साद-जाला सहायनानै बोराइ बैसोआव सुबुंडा माबादि साजा मोनो बेनि थाखाय सत्यनाथ बरानि 'जीवनर शान्तिपर्व' मुंनि रायथाइखौ फरायनो हो । लोगोसे गाहायाव मुंख 'नाय बिजाबफोरखौ फरायनो होनो हायो-

- (i) Coleman, & S. : The Adolescent Society. The Free Press, Collier-Memilan Ltd., London, 1961.
- (ii) Das M. : Educational Psychology, Deep & Deep Publication, New Delhi, 1994.
- (iii) जतीन दुवरा : शिशु बिकाशर रूपरेखा, लयाई बुक ष्टल ।

फोरोंगिरिनिमिम :

फरायसाफोरखौ बिगियाननि जायखिजाया मोनसे आयदायाव बिथांखि खालामनो (ज 'थायनो) हो एबा खामानि रोंथाइनि सोमोन्दै गावनि लुबैनायबादि बिसोरखौ दिन्थिनो हो ।



Guarantee Certificate from the Publisher

Certified that this book is produced as per specification of the Memorandum of Agreement (For publication of Text Books), Clause No. 6

Which states, interlia, that

Text Paper	=	70 GSM
Cover Paper	=	150 GSM
Size	=	1/8 Demy
Binding	=	Limp sewn
Cover Printing	=	Multy Colour
Text Printing	=	Single Colour

If any of the specific mentioned above, is violated than 'otherwise' the work order will be cancelled and the security money will be forfeited.

Name of the publisher
Kitap Samlay
A.R.B. Road, Panbazar,
Guwahati-1